

YANTAJIGUICA ITIGARANCANEJIA JESOSHI

Antsatantaquemparoca

Ocatica iroguenti antsatantaquemparoca itioncaqueca Irocashi itioncacotaquerogueti yantajiguica itigarancanejia Jesoshi yagave-jacaajaquerigueti Ishire Aapani Irioshi. Irocashi teequea irio jorio. Iriguenti aavintantatsica (Cor. 4.11-14). Itsipatacari Paavoro iquenaguetanaquegueti quepatsipaequi (Ya. 16.9-10). Irocashi itioncaquero otsipa paperi tsavetacotaquerica Jesoshi, tequeratagueti in-tionquieroji ocatica. Irootaque ochoocatantacaca mavite tsavetacotaqueroca yoantanajaca Jesoshi jenoqui inquitequi (Irc. 24.50-53 aisa Ya. 1.1-11). Iquenquejajitaque itioncaquero Irocashi ocatica paperi iroaqueragueti iteroncaquerogueti otsipa itioncaqueca tsavetantaquerica Jesoshi, arica ajagantsiniqui 62 irooca otsipa ajagantsini arejevaetacaro 65. Teequea intsajiteji quero ichoocataqueni itioncaquerogueti.

Itioncaqueneri shirampari pajitatsica Teopiro aisa itsipajia teeca irio joriojia cameetsaniji intsajiaque itsavetantaqueca itigarancanejia Jesoshi, itsavetacotimojiavetacari joriojia, cotanquitsi oshequini tee inquemisantajigueroji, iriguentijia quemisantajiavaquero teeca irijorijoigueji, aisa cameetsaniji intsajiaqueniji quero icojiacani majirontajiatsica icatsimajiaquerigueti itigarancanejia Jesoshi.

Itioncacotaqueri Jesoshi icamantajiaquerigueti itigarancanejia intsavetantero Quenquetsatsar-entsi Oganejencatatsica intsavetantimojiaqueri caquinteguetatsica. Icantí: “Ariquea pintsavetantajiaquenaqueate ontaniqui Jerosarequi, pinquejetacaajiaquemparo Joreaqui aisa Samariaqui, pintsitacaguitejajianaquero. Coajica pintsitacaguitejajianaqueroqueate maasano quepatsi pintsavetantajianaquena.” (Ya. 1.8) Itioncacotaquero quero icojiaqueroni ipariajianacarogueti irinetsanajiaquero icantajiaquerica Amajirote Jesoshi. (1) Itsavetantimojiaqueri choocajianquitsica Jerosarequi (1.1-6.7); (2) itsavetantimojiaqueri choocajianquitsica quepatsipaequi pajitatsica Jorea aisa Samaria (6.8-9.31); (3) aisa itsavetantimojiaqueri choocajianquitsica otsipapaequi quepatsipae (9.32-28.31): irirajia choocajianquitsica quinteninintsiqui pajitatsica Antioquia (9.32-12.24), irirajia choocajianquitsica quepatsiqui pajitatsica Ashia (12.25-16.5), irirajia choocajianquitsica otsapijaqui quentijaniqui pajitatsica Ejeo (16.6-19.29), aisa choocajianquitsica quinteninintsiqui pajitatsica Iroma (19.21-28.31).

Irocashi itioncaqueneri Teopiro

¹ Otsipaqui paperiqui iroquetica notion-
caquempica, Teopiro, notsavetantaguetaquero
maasano yantaguetaquitica Jesoshi, aisa
itsatacaantaguetaquitica iroqueragueti
iparianacarogueti

2 irosati queate aavaetanaja savincaguiteri yaajitanajirigueti jenoqui inquitequi. Tequeratagueti iroanaje jenoqui, iquenquetsatacaajiaqueri itsatacaanejia icoguajiaqueca icamantajiaqueri intacaaguetaquerica irantajiaque, iriguente quea Ishire Aapani Irioshi agavejacaquerica Jesoshi.

3 Yatsipetacatarite imetojavetaquitagueti, cotanquitsi ariquea coajica ipochatanaji yonigaajianajari itigarancanejia, yan>taguetaquequeate oshequi cameetsanijite iramenamajajiaquerinijite intsamajajiaquenijite arimaja ipochatanaji. Yonigaajianajari 40 savincaguiteri itsavetantaguetanaqueri Aapani Irioshi quero icotani imajirontagueti.

4 Ariquea itsipajiacarigueti itigarancanejia icantajianajiriqueate:

—Coramani nocamantajiaquempi icanque Aapani intigarancajiaquempi Ishire. Imaicaquea aatota pijajigui otsipaqui, pinchoocajavaqueta acaniqui Jerosarequi poguijajavaqueta irinet-sanataquero icanqueca Aapani.

5 Irooriji irirampani Joanca iviñacajatanta que oja, cotanquitsi imaicaqueate quempejitapojaque inchoocashirentajia pojaquempi Ishire Aapani Irioshi quejetaca iroviñacajatantajitaquempi Ishire, aato oshequiaji savincaguiteri onetsanatantanaquempaca.

Jesoshi yoanajigueti jenoqui inquitequi

6 Ariquea icapiocaventajarigueti aisa icoacojiaqueri iriatimpajia icantajiguiri:

—Nomajirote, ¿ariqueate imaica aviguenti pincapiocajiajena naatimpajia ishiraerijia pimpejaempa Nomajirote, pimpigamentajiaquena cameetsanijite nonchoocajiajeniji intati?

⁷ Yacanaqueriqueate:

—Teenicate irinintacaguempiroji Aapani pintsajiguero quero oncarateni oncoguetanaquempani coajica. Iriguenti cantanquitsine Aapani.

⁸ Cotanquitsiqueate incoraquepojaquegueti Ishire inchoocashirentajiajapojaquempigueti, ariqueate iragavejacaajianaquempiqueate. Ariquea pintsavetantajiaquenaqueate ontaniqui Jerosarequi, pinquejetacaajiaquemparo Joreaqui aisa Samariaqui, pintsitacaguitejajianaquero. Coajica pintsitacaguitejajianaqueroqueate maasano quepatsi pintsavetantajianaquena.

⁹ Ariqueate iquejetanaquerogueti imaica iriatimpajiaquea yamenajavajiri yogajenocanaja yoanaji jenoqui inquitequi. Ariqueate ipeantapojajaro mararo, tee inconijatajeji.

¹⁰ Ogantagatirajaquea yamenajigui sorererere jenoqui inquitequi inejaitatiguri icatiimojiapojacari mavite shirampari, quitamarocantajiavaeque iitsaare. Icantajiajapojaqueri:

¹¹ —Aviatimpajia Garireaquitica, ¿taaqueate oajiaquempi ogantagatiraja pamenajigui jenoqui inquitequi? Imaica pinejajavajirigueti Jesoshi yoanaji jenoqui inquitequi, ariqueate inquejetapojajempa oncoramanitapojaquegueti impijaategueti.

Icoguiajiaquerigueti Matiashi impijaempari Jorashi

¹² Iriatimpajia ariqueate yoguirincajajaro Orivotsempí, ipiapaitanaja Jerosarequi. Ora Jerosare tee osamanitacoteroji Orivotsempí, ocarataque ishinetantacarica iranijitanaque savincaguiteriqui imagorejantajitaca.*

¹³ Iroompaqueate yarejerejeipojacagueti tsovironaquiqui yagatsonquijianaque otsipamencoqui jenoquitica. Aritarite oraniqui imajaigui Peerero, Joanca, Santiago,[†] Antirishi, Jeripe, Tomashi, Varitorome, Mateo, Santiago (irijanite Arejeo), Shimo (icantajitiri aisa Serote), Jorashi (irijanite Santiago).

¹⁴ Maasano iriatimpajia ogantaga icapiocap-inijiaca itsipajiacari iriguentijeguitepae Jesoshi aisa Maria iriniro jero aisa otsipapae manquigarentsijia, isavicaventajiaquero iquenquetsatacaa-jiaqueri Aapani Irioshi yamanajiaqueri.

¹⁵ Ariqueate otsipa savincaguiteri icapiocajiacosahequini tsarovenetajigarica Aapani Irioshi aricampa ivergarajiaca 120. Ariqueate icatianaca Peerero icanti:

¹⁶ “Napiguemisantarijiate, inintaque Aapani Irioshi onetsanatanaca Tioncarentsimajaca icanquegueti Ishire coramani ivagantequi Taavini issavetantsitacarigueti Jorashi amampijajiaquerica aajiaquerica Jesoshi.

* **1:12 ocarataque ishinetantacarica iranijitanaque savincaguiteriqui imagorejantajitaca.** Aricampa onaque aparo quiromeetero. † **1:13 Santiago.** Iguenquetsatsarequi guiriego ipajita **Iakobos.** Iconoagarantaca quimajareri yoguipitsocaquerogueti ivajiro ipajitiri **Santiago**, itsipa ipajitiri **Jacobo.** Mavite oponeaca iguenquetsatsarequi evereo, ipajitiri **Yaakob.** Aisa pamenero tioncanquitsica isavivanaqui otsapaqui Irc. 6.16.

¹⁷ Iroaqueragueti itsipajiavetacaji iquejejiavetacaji aatimpajia aguijajiguirigueti Jesoshi.

¹⁸ Iro cotanquitsi yaajitanaqueri imentaquitsitepae yojocajitaquenerica Jorashi incovaeguishequeniji, ivesgaratantajitacaro quepatsi. Ariquea ontaniqui iparianaquequeate ityaquisanaque imotijaqui tyaquic. Osocataetanaca iseito.

¹⁹ Irompaqueate iquemacojiaquerogueti Jerosarequitica ariquateate ipajijiaquero ora quepatsi Asererama. Oraquea iguenquetsatsarequi ocanti Irajantsiguite.

²⁰ Itioncacotaquerotarite paperiqui icantajitica Saremo ocanti:

‘Irovashantsjitaquerija itsovironaquite aatoja ichoocataji nantajemparoneca.’

Aisa ocanti:

‘Cameetsa inchoocataje piajemparineca impejaempa itigarancane Amajirote.’

²¹⁻²² “Imaicaquea imaica choocajia acaniqui atsipajiacaca coramani iroaqueragueti iviñacajataqueri Joanca Jesoshi quigonquero yoanajigueti jenoqui inquitequi. Imaica jame aajiaje itsipa piajemparineca Jorashi cameetsanijite irionijite antsipajiaquempa antsavetantajiaquerigueti Jesoshi ipochatana-jigueti iroorijite irootaque ininqueca Aapani Irioshi.”

²³ Ariqueate icajemajiaqueri mavite. Apaniro ipajita Jose aisa icantajiri Varesava Joshito. Iri-raqueate itsipa ipajita Matiashi.

²⁴ Yamanajiaqueri Aapani Irioshi icantiri:

—Nomajirote, pamenashirentajiguiri maasano caquintejia. Jeri irica mavite, ponigaajiaquenari queri picoguiaqueca

²⁵ impejaempa itigarancane Jesoshi intsipajajena, iriratarite Jorashi yovashiantaguetanaquero maasano, yoanaquequea ontaniqui otampaticataquerigueti inchoocatantanaquempaca.

²⁶ Ariqueate ipegavijijiaca cameetsaniji intsati-mentajiaqueriniji quericaca inintacaaqueca Aapani Irioshi. Ariqueate iriguenti sotoacotanquitsi Matiashi. Irioqueate peajatsi itigarancane Jesoshi. Iconoajiajariqueti inajiaji 12.

2

*Iroaqueragueti icoraquetaque Ishire
Aapani Irioshi inchoocashirentajiaqueri
tsaroventajigarica*

¹ Arikeate aapojacagueti savincaguiteri ipajijitica Pentecoshite arikeate ichoocajiaque maasano tsaroventajigarica Jesoshi icapiocajiacatsovironaquiqui.

² Arikea catsiqueti iquemajiatigiro opojimajencapojaque quejejencataca inirojenca tampija oponeajencataca jenoqui inquitequi. Iquemajiaquero maasano savicajianquitsica tsovironaquiqui.

³ Arikeate oconijaguetapojaque quejeguetaca morecaripae oashiguetanaqueri maasano apaniropae.

⁴ Arikeate ichoocashirentajapojaqueri Ishire Aapani Irioshi yagavejacaajianaqueriquea

maasano. Ariqueate imapocajianaca iquenquet-satantajianacaro otsipapae quenquetsatsarentsi teeca intsajavetempaji, iriguentitarite quenquejacaqueri Ishire Aapani Irioshi.

⁵ Ariqueate ichoocajiaque oraniqui Jerosarequi oshequini joriojia tsamajajiguiroca ition-canaqueca Moishishini ariguenti iponeajiacaca otsipapaequi quepatsi.

⁶ Iroompaqueate iquemajiaavaquerogueti opojimajencatanaquegueti ishiashiaitanacaqueate icapiocaventajianacari maasano tsavetantajiguirica Jesoshi, tee intsajapojaquero quero ococani iquemajiaopojaquerigueti iquenquetsatsitantajiacari iguenquetsatsarejia.

⁷ Mana yoajianaque intati yamenajianaque sor-erere, icantavacaajianacaqueate:

—¿Teempaqueate tee iriojia Garireaquitica maasano irirajia?

⁸ ¿Quero ocotaca aquemajiaqueri iquenquet-satantajiacaro quenquetsatsarentsipae? Aque-majiaqueritarite imaica iquenquetsatantajiacaro aguenquetsatsarejia

⁹ aatimpajia ponejaianquitsica osamanipaequitica Paritiaqui, Meriaqui, Eramequi, Mesopotamiaqui, Joreaquei, Caparoshiaqui, Pontoqui, Ashiaqui,

¹⁰ Pirijiaqui, Pampiriaqui, Ejepitoqui, aisa ove-garaguetapojacaguetai Irivia oquempejiquegueti Shirene. Jeri aisa ponejaianquitsica Iromaqi: irirajia joriojamajaca aisa oguijatacojiguirica joriojia.

¹¹ Aisa choocajia ponejaianquitsica Queretaqui aisa Araviaqui. Maasano aatimpajia aquemaji-

avaqueri iquenquetsatantajianacaro aguenquet-satsarejia itsavetantajiaquerogueti yantica Aapani Irioshi yagavejamajatigueti.

¹² Mana yoajianaque intati tee intsajigueroji icantavacaantajianacaca:

—¿Taate opajita ocatica?

¹³ Cotanquitsiqueate iconoagarantajiaca mana ishirontimentanajiacari intati icantajianaque:

—Mana imiramajatacaro cachojarí.

¹⁴ Icatianacaqueate Peerero itsipajianacari itigarancanejia Jesoshi carajianquitsica 11 iquenquetsatanaquequeate iririjenca icanti: “Napijoriojiate aisa maasano choocajianquitsica acaniqui Jerosarequi, iintsija pinquemisanta-majajavaquena noncamantajiguempiqueate nontsavetanqueroqueate ocatica pamenaji-aqueca.

¹⁵ Imaica pijijiaqueji ishinchuijaca iricajia, cotanquitsi teequeate ari irishinquijiguempaji, iroqueratarite yogajenocapojaca catsirincaiteri.

¹⁶ Manaqueate onetsanatanaca itsavetanqueca coramani tsavetantirinica Aapani Irioshi Joereni icantaquegueti:

¹⁷ ‘Icantaque Aapani Irioshi: Oncoramanitapoja-jegueti pajinigueti aapojempa savincaguiteri vegaratapojaatsineca,

nontigarancajiaqueneriqueate Noshire
inchoocashirentajiaqueri maasano
caquintepae.

Iriraquea irijanitepae, intsavetantajiaquero no-canquerica.

Iriraquea iriaqueraca quenquevarijiananquitsi nonigaajiaqueri cantashitatiaguetanquisca, cotanquitsi mana onquejetimojiaquempari iguimaanequi.

Irirajia quenquevarijianatsica mana nonigaajiaqueri iguimaanequi.

¹⁸ Ariqueate noncojiaquerini maasano quemisantajiaquenaneca, shiramparijia aisa manquigarentsijia,

nontigarancajiaqueneri Noshire inchoocashirentajiaqueri

intsavetantajiaqueroquea nocanquerica.

¹⁹ Ontaniquiqueate jenoqui inquitequi nonigaantaguequero teeca irinejajite,

aisa nonigaanquero nagavejane acaniqui quepat-siqui

iramenajitaquero irajantsi, aisa omorecanaque paamari jero aisa ompoasecantanaqueate ogatsiaca.

²⁰ Impitsecanaquequea catsirincaiteri, aisa irira taai inquityoncamentatanaque inquejetanaquemparo irajantsi.

Ariquea oncotanaquempa tequeratagueti aapojempa savincaguiteri anaantanquitsineca oganejencaguitetanquitsineca ironigaantantaquemparoca Majirontamajatatsica iragavejane.

²¹ Cotanquitsiqueate maasano aventajiaquemparoneca ivajiro Majirontamajatatsica, iraajiavajeri.'

²² "Shiramparijia ishiraerijia, pinquemisantamajajiguena noncamantajiaquempica. Iriguenti nontsavetantaque Jesoshi, irira

Nasarequitica. Yagavejacaquaqueri Aapani Irioshi yantaguetaquerogueti cameetsaguetatsica teeca irinejajiguete, cameetsanijite pintsajiaquenijite irio Aapani Irioshi tigarancaqueri.

²³ Ogantaga itsataque Aapani Irioshi quero incojitaquerini Jesoshi. Coramani iquenquejaquero intigarancaqueri irimetojaque acaniqui quepat-siqui. Avirojiaquea paacaantajiaqueri pimetojacaantajiaqueri picantajiaquequeate irompajaco-jiaqueri quempevaejiatsica.

²⁴ Cotanquitsi ivochantajiri Aapani Irioshi aatonijite icoguitani yatsipetaro metojagantsi, teenicate agavejaguiterini.

²⁵ Iriraqueate majirontatsica Taavini itioncaquegueti coramani itsavetanqueri Jesoshi icanti:

'Nonejapinitaqueri Nomajirote itsipataquena.
Ogantaga inaque notincamijempequiqui, caarica taaca nōtsaroacaanta.'

²⁶ Irootaquequeate noshinevaetancaca noshire-qui,

noquenquetsataquegueti shine nocanca.

Notsino aisa onchoocatanaque, aviguentitari noguijacoque,

²⁷ aatonicate povashiantiro noshire Areshiqui,*
aato pishinetiro aisa avejanquempa itsino Pigo-majamajare.

²⁸ Pitsatacaaquaquena quero noncoquempani nanijaguiteniniji aviatimpaqui.

* ^{2:27} **Areshiqui.** Oraquea Areshi iroguenti ichoocaquegueti ishirejia metojajatiatsica tequeratagueti impishoncrajiteriji camorecariqui. Irira guiriego icanquero **hades**, iguenquetsatsarequi evereo icanquero **sheol**.

Pincoguitempani pintsipataquena
poguishinejamajataquena.’²⁸

29 “Imaica, nogonorojia, atsamajajiaque
irira Taavini avaesatiniteni imetojaquequeate,
ariquea iquitajitajiri, aritarite onaque
iquitatantajaca acaniqui aguinentiqui.

30 Iriatimpa iriguenti tsavetantironica ican-
queca Aapani Irioshi coramani. Itsamajatironi
icantaquerica Aapani Irioshi, icantiri: ‘Coajica
inchoocataque pinchoviquiqueca irimajirontaji-
ajempaca ishiraerijia inquejetajempi aviatimpa.
Aatoqueate namatavijimpitsi, naroguentitari
Irioshi.’

31 Tequeratagueti impochatanaje Quirishito
itsataquero Taavini coramani, irootaquequeate
itsavetacotantacarica irimetojaquegueti aato
yovashiantajitiri ishire Areshiqui, ariqueate
oquejetaca itsino iroatimpa aatoqueate
opatsajitsi.

32 Iriotaquetarite irira Jesoshi yovochantajica
Aapani Irioshi, namenamajajiaqueritarite
maasano naatimpajia.

33 Ariqueate yoguisavicajiri itincami-
jempequiqui, yanaantamajataquequeate.
Ariqueate yojocaqueneri Ishire icantaquerica
coramani irojocaqueneri cameetsanijite
intigaranquimentaquerinijite acaniqui
quepatsiqui inchoocashirentajiaqueri maasano
tsaroventajigarica. Imaicaqueate imaica
coraquetaquequeate, irootaquequeate maasano
ocatica pamenajianaqueca aisa piquema-
jianaqueca, iriotaquequeate quejetacaaguecaro

²⁸ **2:28** Sar. 16.8-11.

imaica.

³⁴ Iriraqueate Taavini teenicate irioqueate ogatsine jenoqui inquitequi, cotanquitsiquea icanti: Iriraquea Majirontatsica Aapani Irioshi icanqueri Nomajirote:

'Pisaviquetaja pisenampijaquenaja notincamijempequiqui,

³⁵ pintsipataquenaquea arejevaetanaquempa nagavejajiaquerigueti maasano catsimajiaquempica, onquejevequemparo povanchequegontatsitempari.'

³⁶ "Imaica nonintaque antsamajajiaquero maasano aatimpajia ishiraerijia: irira Jesoshi pompajacotacaantajavetacaca ivochantajiri Aapani Irioshi, ipeacaavajari Amajirote, irisati queate Quirishito Meshiantatsica."

³⁷ Iroompaqueate iquemajiavaquerigueti ishimampojancajianaqueate, icantajiguiri Peerero aisa itsipapae itigarancanejia Jesoshi:

—Imaica, nogonorojia, ¿querocampa noncojiaquempani?

³⁸ Icantajiguiri Peerero:

—Povashiantajianajero pipeacaaguishetacaca pincantashitatanajempa. Poviñacajatacaantimentajiguempari Jeso quirishito ivajiroqui cameetsaniji irishetajempironijite Aapani Irioshi piguempevaere, irimaitsantsita-jempironijite. Ariqueate intigarancajiaquempi Ishire inchoocashirentajiaquempi.

³⁹ Ariqueate inquejetacaajiaquempi maasano aviatimpajia, jerijia maasano pinchoviquijianaqueca, aisa maasano osamanipaequitica.

Arimaja inchoocashirentajiaqueri maasano inintacaajiaqueca Amajirote Aapani Irioshi.

40 Irira Peerero arimpaqueate iquenquetsatanaque icantajiaqueriqueate otsipapae icanti:

—Paventajiguemparija aajiajempineca, aatonijite icatsimatimentimpilo Aapani Irioshi pigovaeguishere itsipatacaantimpirlitsiquea covaeguishemajajiatsica.

41 Iroompaqueate iquemajiaavaquerigueti Peerero iquenquetsaquegueti ishineventajianacaro icanquerica ariqueate iviñacajatacaantajiac. Arimpaqueate yoshequiamajatanaquequeate tsaroventajigarica Jesoshi. Aricampa ivegarajaca 3,000 iriaqueraca quemisantajianquitsiocatica savincaguiteriqui.

42 Ogantaga isavicaventajiaquero iquemisan-tajiaquero itsatacaaajiaquerica itigarancanejia Jesoshi, tee irovashiantajigueroji. Mana itsipatavacaajiacaca iquemavacaajiacaca aisa yamanajiaqueri Aapani Irioshi. Jero aisa icotarejapinijiaquero pan ishecajiacaro iquenquejantajiajarica Quirishito imetojaven-tajacajigueti.

43 Irirajia itigarancanejia Jesoshi yantapiniji-aqueneri caquintepae caarica inejajiti, aisa yan-tajiaquero oacaantantatsica intati itsatantacarica arimaja itsipatacari Aapani Irioshi. Mana yoajianaquequeate intati maasano.

44 Iriraquea quemisantajiguirica Jesoshi itsipatavacaajiacaca iquemavacaajiacaca, ipavacaajiacaca yashintajiacaca.

45 Yojocantaguequero taaca opajitapae yash-intajiaca yaantajiacaro imentaquipae ipacaan-tagarantajiaqueri maasano coguitejacojianquit-sica.

46 Maasano savincaguiteri icapiocapinijiaca teemporoqui oniganquirequi. Ontaniquiquea tsovironaqipaequi itsipatavacaajiacaqueate ishecajiaca. Icotarejapinijiaquero pan ishecajiacaro iquenquejantajiacarica Quirishito imetojaventajiacajigueti. Ishecajiacagueti ishinejiaca tee iraventacojiguempaji.

47 Iriguentitari ishineventajiac Aapani Irioshi. Maasano caquintejia guntenijiatsica oraniqui yamenajiaquerigueti iquejejiaca imaica, ishineventajianacariequeate. Maasano savincaguiteri iriraqueate Amajirote arimpaqueate ijatiri yoshe-quiamajatanaqueri quemisantajiaquerica.

3

Yogueshijitajirigueti irira magoviroshiri

1 Otsipa savincaguiteri ariqueate irira Peerero aisa Joanca yoajianaque itoncoajianaque teemporoqui itsaroventantajitarica Aapani Irioshi. Ogantagatari ijaguitetanajigueti catsirincaiteri yoapinijiaque maasano joriojia yamanapinijiaqueri Aapani Irioshi.

2 Ariquea oraniqui sotsiqui teemporoqui isavicaque irira magoviroshiri, igantagaqueate ivoacoquero imagoviroshica. Aritarite yamapinijiaqueri sotomorontsiqui icantajitica Cameetsari yoguisavicanajiri cameetsanijite iramanajiavaqueri imentaquitsite quijapinijiatsica.

3 Iriatimpa inejajiaquerigueti Peerero itsipatacari Joanca inquijajiaapoje teemporoqui, yamanajiavecari imentaquitsite.

4 Iriatimpajia yamenajianaqueri, ariqueaicanque Peerero:

—Iintsija pamenajiguena.

5 Iriatimpa yamenajiaqueri yoguijacovetaca ijiqueji ariji irojocaqueneri imentaquitsite,

6 cotanquitsi Peerero icanti:

—Naatimpa ejempacona taampate nojocaquempi, tee inchoocatenica nomentaquitsite, cotanquitsi yagavejacaquena Jesoquirishito Nasarequitica nogueshitajempi intati, irootaquequeateimaica iintsija pincatianaje panijitanaje.

7 Ariqueate yacatsataqueri itincamijempequiqui yogatiaqueri. Ariquea icantapanajanti itampishitanaji iguitiqui aisa ishonquiriguitoqui.

8 Isapocanaque, icatiamajatanajaqueate yanijitanaji. Ariquea yoguijajianaqueri Peerero aisa Joanca iquiaquijaitanaque oticaacoroqui oniganquirequi teemporo, ariqueate yanjinijivaetanaque itincotincovaetanaquequea icantanaquequeate:

—Caaviji yoganejencamajata Aapani Irioshi.

9 Maasano yamenajiaquerigueti yanijitanaquegueti ishineventanacarigueti Aapani Irioshi,

10 ariqueate itsaroajianaque, mana yoajianaque intati, maasanotarite itsajiguiri isaviquigueti teemporoqui yamanantapiniquegueti imentaquipae ontaniqui osotomoroqui icantajitica Cameetsari.

Itsavetantaque Peerero teemporoqui

¹¹ Irira magoviroshiri yogueshijitajica ogantagaqueate quisho yoajiaqueri yajiricajiaqueri Peerero aisa Joanca. Maasanoqueate ishiashiaitashitanacariequeate iriatimpajia ontaniqui oveshindsightsaacagueti iniroopoapae ocajaratsencoataquegueti icantajitica Irashi Saromoni.

¹² Yamenajiavaqueri Peerero icanti: "Shiramparijia ishiraerijia, ¿quero ocotaca poantajianacaca intati? Iroguentica pijijiaqueji nocameetsamajati nogueshitantajarica irica. Aricampa pijijiaqueji nagavejashitaca intati nanijitacaantajarica.

¹³ Iriraquea Irioshite Averaameni, Ishaaconi, Jacoboni, Irioshite avaesatinite, iriguentequea antaquero oca, yonigaantaqueroquea iroganejencare Jesoshi Irijanite. Iriraqueate Jesoshi iriotaquequeate paacaantajiajivetacaca aviatimpajia, picantajiaqueri majirontatsica Pirato irimetojacaantaqueri. Iriraqueate Pirato inintavecaqueate iroguiquipaqui jajerime, cotanquitsiqueate aviatimpajia tee pinintajigueji.

¹⁴ Pimanintajiaqueriquea irira Oganejencamatatsica Comajamajatatsica, iriguenti pinintajiaque iroguiquipaqui jajemperi metojantatsica.

¹⁵ Aritarite piquejejiaca imaica pimetojacaantajiajivetacari irira Anijacaantantatsica, cotanquitsi ivochantajiri Aapani Irioshi, namenamajajajiritari ipochatanajigueti.

¹⁶ Iriotaque naventajianacaca ivajiroqui, irootaquequea itampishitantanajaca irica pamenajiaqueca pitsajiaqueca. Iroguenti

ogueshimajatantajarica iragavejane Jesoshi naventajiacarigueti ivajiroqui, pinejajiaquerou- quea aviatimpajia maasano.

¹⁷ “Imaica nogonorojia, naatimpa notsataque pimetojajiaquerigueti Jesoshi teenicate pintsajigueriji iriguenti itigarancaqueca Aapani Irioshi. Ariquea iquejejiaca pimajirojiate tee intsajigueriji.

¹⁸ Cotanquitsi oquejetacagueti imaica mana inetsanataquero Aapani Irioshi icantsitacarica coramani tsavetantirinica itsavetantaguetaquero irantsipevaequempa Quirishito.

¹⁹ Irootaquequeate nocantantajiaquempica povashiantajianajero picovaeguishejiacagueti pincantashitatijajanajempa, pinquemisan-tamajajigueri Aapani Irioshi cameetsanijite irishetajempiro piguempevaere. Ariqueate aapojaquempa intampishitacaantajiaquempica iroguishinejantajiaquempica.

²⁰ Ariqueate aisa intigarancabajempiri Jesoshi, irira Quirishitotatsica. Iriotarite coramani ininta-caitsitaquempica irimeshiajiaquempi.

²¹ Cotanquitsi irira Quirishito ogantaga inchooaque ontaniqui jenoqui inquitequi are-jevaetanajemparoqua irinetsanaguetajerogueti Aapani Irioshi maasano. Irootaquetarite icanta-jiaqueca igomajamajareja tsavetantajiguirinica coramani icantashirentajiaquerigueti Aapani Irioshi.

²² Icanquetarite Moishishini: ‘Majirontama-jatatsica Pirioshite irogatiaquempiri choocati-mojiajerineca pigonorojia, impeacaaquempari tsavetantatsica camantajiaquempica icanqueca,

inquejetaquena naatimpa. Taaca opajita incantajiaquempi pinquemisanqueri.

²³ Maasanotarite aatogueti iquemisantajigui interoncajitaqueri, aato itsipatajari igonorojia.'

²⁴ Maasanoqueate tsavetantirica Aapani Irioshi itsavetantaguetaquero maasano pamenaguetaqueca imaica. Iriqueti mapocaquero tsavetantirinica Aapani Irioshi irira Samoirini. Ariqueate imajianaca impoiguetananquitsica.

²⁵ Oraqueate iquenquetsatacaaquerigueti Aapani Irioshi Averaameni icanquerigueti: 'Coajicani inchoocataque pinchoviquaqueca, iriguentiquea noncavintsajacotantajiaquemparica maasanopae caquinteguetananquitsica quepatsiqui', aviatimpajia iquenquejajiaque incavintsajajiaquempi, aviatimpajia aviguentijitarite ichoviquijia tsavetantajiguirinica.

²⁶ Iroompaqueate ivochantajirigueti Aapani Irioshi irijanite aviqueti itigarancajiaquene incavintsajajiaquempi cameetsanijite povashiantajianajeronijite piguempevaerejia."

4

Icatsimajitaqueri Peerero aisa Joanca

¹ Choocatiraja iquenquetsajiaque Peerero aisa Joanca icoraquejiapojaque saserorotejia itsipajiacari imajirojiate coaretajia quempoguijajigu-iroca tetemporo. Itsipajiacari aisa saroseojia. (Iritatimpajia iriguenti cantajiatsica aato itancorejajigi metojadiatsica).

² Icatsimajiaipojaqueri itsajiaqueritarite itsata-caajiaqueri maasano intancorejajianaje oncoramanitapojaquetai metojajiavetanquitsica inque-jejianajempari Jesoshi ipochatanajiguetai.

³ Ariqueate yaajiapojaqueri yaajianaqueri, cotanquitsi teequea incantajigueriji mana yoguijaajiaqueri santanaqui iroorijite tsitenijencaguitetanaque. Ariqueate osavinca-guitetanajiguetai ariqueate incoacojiaqueri.

⁴ Cotanquitsi iconoagarantajiaca oshequi quemajivaquerica Peerero iquemisantajiaque. Irirajia shirampari quemisantajanquitsica aricampa ivegarajiac 5,000.

⁵ Iroompaqueate osavincaguitetanajiguetai ica-piocabajiacaca aisa acaniqui Jerosarequi imajirojiate joriojia, itsipajiacari jivajiatsica jeri aisa tsata-caantiroca itioncacotanaqueca Moishishini.

⁶ Ariqueate ichoocaque saserorote anaanta-majatanquitsica icantajitica Anashi, itsipajiacari Caipashi, Joanca aisa Arijantero. Aisa ari ichoocabajiaque maasano ijitannejia.

⁷ Ariquea itigarancajiaqueri irajaiaquiteri Peerero aisa Joanca incoacojiaqueri. Ariquea yamajitaqueri isatecajiaqueri niganqui icantajiaqueri:

—¿Taaqueate agavejacaajiaquempi? ¿Taaqueate cantajiaquempi poganjitantajarica magoviroshiri?

⁸ Irira Peerero yagavejacaanaqueri Ishire Aapani Irioshi iquenquetsatacaajianaqueriquea capiocajianquitsica icantiri:

—Nomajirojiaca aisa jivajiatsica,

⁹ iroosacanica picoacojiaquena quero nococa nocavintsa jantacarica magoviroshiri, quero no-coquerini noganijitajirigueti.

¹⁰ Imaica noncamantajiaquempi catinca noajiaquempiro cameetsanijite pintsajiaque aviatimpajia aisa intsajiaquenijite maasano ishi-raerijia iriguenti agavejaca aquena Jeso quirishito Nasarequitica nogueshitantajarica ivajiroqui. Irira Jesoshi iriotarite pom pajacojiavetacaca, cotanquitsi yovo chantajiri Aapani Irioshi.

¹¹ Irira Jesoshi iquejetacaro mapi pimaninta-jiavetacaca aviatimpajia pantajiguirogueti mapi-panco pivichajacotancarogueti mapi, cotanquitsi opeaja anaantamajatanquitsica quishotacaa que-roca.

¹² Teequea inchoocateji itsipa aajia vajineca aatoniji apega camorecariqui, teetarite onchoocatimateji otsipa vajirontsi ipajijita-querica caquinte acaniqui isaviji quepatsiqui aventajiaquempameca ira antajia vajajimeca, apaniro icanca Jesoshi.

¹³ Maasano imajirojiate iquemajiava querigueti iquenquetsatacaajia querigueti Peerero aisa Joanca yamenajia querigueti tee intsaroajigueji, mana yoajiana que intati, itsajia queritarite tee irana antajigueji aisa tee intsamajajigueroji paperi. Ariqueate itsajiana queri iriguentija itsipajiacar Jesoshi.

¹⁴ Aritarite itsipajiacari irira magoviroshivetat-sica catiaca iriatimpa ¡querocampate incantajiguéri iriatimpajia!

¹⁵ Ariqueate yoguisotoaca anta queri sotsiqui cameetsanijite inquenquetsata vacaaquempa

iriatimpajia. Ariquea icantajiguiri:

¹⁶ —¿Imaica quero ancojiaquerini? Maasano-tarite Jerosarequitica iquemacojiaqueri yantaji-aque caarica inejajiti. Aato agaveji acantajiguiri: ‘Tee irogueshitanteji.’

¹⁷ Iquemajiguetirotsiqueate. Iintsija imaica an-cantimentajigueri aatonijite itsavetantajiajiri Je-soshi.

¹⁸ Ariqueate icajemacaantajiaqueri icantajia-queri:

—Imaica aato pitsavetantimatajiajiritsi Jesoshi, aato paventaro ivajiro, aato pitsatacaantiniri.

¹⁹ Cotanquitsiquea Peerero aisa Joanca yaca-jianaqueriqueate:

—Pamenerojate quero ininqueca Aapani Irioshi: ¿cameetsavaequempate nonquemisanta-jiaquempigueti aviatimpajia? ¿Iroompate irio Aapani Irioshi nonquemisantaque?

²⁰ Naatimpajia aato nagaveji novashiantajigu-iro notsavetantajiaquero oca nonejajiaqueca aisa noquemajiaqueca.

²¹ Icantsijijaariqueate aisa:

—Aato pitsavetantajiajiritsi Jesoshi.

Ariqueate yovashiantajiajiri yamenajiaqueri-tarite querocampate incojiaquerini incatsima-jiaquerigueti, maasanotarite caquintejia ishin-eventajiacari Aapani Irioshi itsajiaquerigueti yogueshitajiri magoviroshivetatsica,

²² iroorijite yajagantsitacovetanaca 40 ajagantsi magoviroshivetatsica.

23 Iroompaqueate yovashiantajajirigueti yoajianaji ichoocajiaquegueti irapiguemisan-tarrijateni icamantajapojaqueri maasano icanta-jiaquerica saserorotejia anaantajianquitsica aisa jivajiacsica.

24 Iroompaqueate iquemajiaavaquegueti, maasano yamanajiaqueri Aapani Irioshi icantajiguiri:

—Aapani Irioshi Majirontamajatatsica, aviro-tarite peacaaguetacaroca inquite, quepatsi, quen-tija aisa maasano choocatantajigaroca.

25 Pitigarancaqueri Pishire quenquejacaquer-ica paajanire Taavini novaesatiniteni, picanque-quea ivagantequi:

¿Quero ocotacani icatsimatantajiacaca caquinteguetatsica?

¿Quero icojiacani isariajiavecaro taaca opajitapae teeca oncameetsateji?

26 Irirajia majirontajiacsica quepatsiquitica aisa iramajirorejia caquinteguetatsica

icapiocaventajiacari icatsimajiaqueri Majironta-majatatsica aisa Quirishito icoguiaqueca.

27 Tampatica oanaquero picanqueca icapiocantajiacarica Erorishi aisa Pontsio Pirato itsipajiacari teeca irijorijoigueji aisa ishiraerijia iquemavacaajiaca irimetojajiaqueri Pirijanite Jesoshi Oganejencatatsica pinintacaqueca impeaquempa Meshiantatsica.

28 Coramani pitsatsitaca picantsitacaqueate: ‘Ar-itaquequeate oncoquempani.’ Ariqueate imaica inetsanataquero irintapae.

²⁹ Imaica, Nomajirote, pinquenquejaquero maasano icantajiaquenaca icatsimajiaque-nagueti. Pagavejacaajiguena naatimpajia pomperanejia aatonijite notsaroguitsi nontsavetacojiaquerogueti picanqueca.

³⁰ Pagavejacaajiguena naventajiacarogueti ivajiro Pirijanite Jesoshi teeca inquempevae-timatempaji, cameetsanijite nogueshijiajeri ashinoncajajati sica, aisa nantajiaquenijite cantashitatiaguetanquitsica caarica inejajiti intsatimentajiquerinijite caaviji yagavejamajati iriatimpa.

³¹ Iroompaqueate yagajianaquitigui yamana-querigueti Aapani Irioshi, ariqueate oco tanaca omoguecanaque tsovironaqui, yagavejacaamaja-jianaqueri aisa Ishire Aapani Irioshi. Iriatimpajia ariqueate itsavetantajianajiro aisa Iguenquetsat-sare Aapani Irioshi teequeate intsaroajiajeji.

Icavintsajavacaajiacagueti quemisantajiatsica

³² Maasano quemisantajiatsica itsipatavacaajia-ca iquemavacaajiac. Taaca yashintajiac tee ir-imashitsatapitsatavacaajiguemparoji, tee incanteji: “Apaniro nashinquemparo naatimpa”, mana ipavacaajiac intati.

³³ Irirajia itigarancanejia Jesoshi arimpaqueate itsavetantamajajianaqueri ipochatanajigueti, yagavejacaajiaqueritarite Aapani Irioshi, aisa yogu-ishinejamajajianaqueri.

³⁴ Tee inchoocajiajeji coguitejacojianquitsica, maasanotarite choocajianquitsica iguepatsijiate

aisa itsovironaquijiate yojocantaguequero yaantauiacaro imentaquipae. Ariqueate yaajianaqueneri

³⁵ itigarancanejia Jesoshi cameetsanijite irojocajiaqueneri maasano coguitejacojianquitsica.

³⁶ Ariquea iquejetaca irira Jose poneatsica Tsperequi, iriguenti ichoviqui Irevi. Iriraqueate itigarancanejia Jesoshi ariqueate ipajijajiri aisa Verenave ocantiqueate Oguishinejantatsica.

³⁷ Iriatimpa yojocantaquero iguepatsite yaancaro imentaquipae. Ariqueate yaajianaqueneri itigarancanejia Jesoshi.

5

Yamataajiacagueti Ananiashi aisa Sapira

¹ Cotanquitsi chooca itsipa icantajitica Ananiashi itsipatacaro imanquigare Sapira yojocantavetacaro iguepatsite

² yaantajiavetacaro imentaquipae, cotanquitsi iquemavacaajiaca ariquea yaagarantavetava ja iriatimpa iriraquea choocapojajatsica yaavetanacanariqueate itigarancanejia Jesoshi quejevetacaqueate jocaguetaquenerica maasano.

³ Cotanquitsi Peerero icantavaqueri:

—Ananiashi, ¿quiero ocotaca piquemisan-tantacarica Satanashi pinintantavetacaca pamatavijaquerime Ishire Aapani Irioshi paagarantantavajaca imentaquipae ivergarajitaquempiroguedi piguepatsiteni?

⁴ ¿Arimpate tee aviguenti ashintamajatem-parone iroqueragueti? Ariqueate oquejetaca imaica pojocantaqueroguedi, ¿arimpate tee aviguenti ashintemparine pimentaquisitepae?

Aatotarite piquejetiro imaica, teenica apaniro pamatavijigueme caquinte, aisa iriguentiqueate pinintavetaca pamataviterime Aapani Irioshi.

⁵ Iroompaquea iquemavaquegueti Ananiashi, ariquea iquenaque itejanaque imetojanaque. Maasano quemacojiavaquerica itsaroajianaque.

⁶ Arikea iquiaquiaipoji iriaqueraca quenquevarijiananquitsi yaajianaqueri yampiguiricacojianaqueri yaajianaqueri inquitajigueri.

⁷ Iroompaqueate osamanipojaqueguetiquea ocoraquevepojaca imanquigare oquijapojaque, teequeate ontsateji imetojaquegueti manquigavetaronica.

⁸ Irira Peerero icantavaquero:

—Iintsija pincantena, ¿arimaja yojocaquenari manquigatimpica maasano imentaquipae paantajiacaca piguepatsite?

Iroatimpa ocanti:

—Jeejeguitatsi, arimajaguitatsi yojocaquempi maasano.

⁹ Icantiroquea Peerero:

—¿Quero ocotacani piquemavacaantacaca pamatavijajiguerime Ishire Aapani Irioshi? ¿Aripiqueji aato icatsimatimentimpido? Coraque-tapojaque quitajiajatirica manquigavetimpinica, imaica aviroqueate inquitajajate.

¹⁰ Iroompaqueate icanquitiguiro ariquea oquenaque otejimotanaqueri ometojanaque. Arikea iquiaquiaipojaque quitajiajatirica manquigavetaronica inejajapijero iroatimpa metojaque. Irooqua yaajianaquero iquitajajatiro ichoocaquegueti manquigavetaronica.

¹¹ Maasano quemisantajiatsica choocajianquisica acaniqui aisa maasano quemacojiaqueroca itsaroajianaque.

Itigarancanejia Jesoshi yogueshijajiri oshequi joquijijavetanquitsica

¹² Irira Aapani Irioshi yagavejacaajiaqueri itigarancanejia Jesoshi yantimojiaqueri caquinte caarica inejajiti intsatimentajiquerinijite caaviji yagavejamajati iriatimpa. Maasano quemisantajiguirica Jesoshi icapiocajiacaca teemporoqui oveshindsightsaacagueti iniroopoapae ocajaratsencoataquegueti icantajitica Irashi Saromoni.

¹³ Irira itsipajia itsaroajianaque inconoajiaquemparigueti cotanquitsi ishineventajiacari.

¹⁴ Arimpaqueate yoshequiamajatatiguinimaja quemisantajiguirica Amajirote, shiramparijia aisa manquigarentsijia.

¹⁵ Yamenajiavaquerigueti yantajiaguetaqueca, yaantajianacarica ashinoncajajatiatsica quenavoirontsiqui yoguinorijaqueri inorijantajigueta-caca, yoguijacajaiavaqueri Peerero cameetsani-jite iroocampa ontsimanquimentajiaquerinijite ivaantorite iriveajianajempanijite.

¹⁶ Ariqueate iquejejiaca poneagueutanquitsica oquempejiquegueti Jerosare yamajiaqueneri yashinoncajajatiatsica aisa yatsipetacaajiacaca ampatsini, maasano ivejaianaja.

Saserorotejia anaantajianquitsica icatsimajianaqueri itigarancanejia Jesoshi

¹⁷ Cotanquitsi irira saserorote anaantamajatanquitsica, jerijia saroseoquia tsipamajajigarica

arimpaqueate icatsimajianaqueri itsajiaqueritari
ishineventajicari.

¹⁸ Yaacaantajiaqueri itigarancanejia Jesoshi,
yashitacotacaantajiaqueri santanaqui.

¹⁹ Cotanquitsi ariqueate onianquiitepojaque-
gueti icoraquetashijiaqueri irashivantite Ama-
jirote yashirejapojaqueneri ashitacorontsi, yogu-
isotojiaqueri, icantavajiri:

²⁰ —Pija, pincatiapojafe oniganquirequi oticaa-
coroqui teemporo, pincamantajiguera maasano
quero incojiaquempani incoguitempaniniji irani-
jaje.

²¹ Iriatimpajia iquemajiavaque, ariqueate
osavincaguitetamanaquegueti yoajiamanaque
teemporoqui itsitijianaquero itsatacaajiaapojaquiri.

Cotanquitsi irira saserorote anaantamajatan-
quitsica aisa itsipajiacaca tequerata intsajiguer-
iji. Icajemajiaqueriqueate imajirojiate ishiraer-
ijia jerijia jivajiacsica. Iriatimpajia itigarancajiji-
avetacari oananquitsineca iraajiaquiterime on-
taniqui yashitacojiavecarigueti, iramajiaqueneri
iriatimpaqui.

²² Cotanquitsi yoajiavetanacaqueate coareta-
pae, tee anejeriji. Ipijajaa icamantajiaqueri,

²³ icantajiaapojaqueri:

—Noajiavetanaca namenajiavepojacaro
ashimajataca santana. Iriraquea amenajia-
querica timashijiaque sotomorontsiqui aatoniji
isotoajigui, cotanquitsi nashirejajiavetacaro
cajaraguitevaetaque intsompogui.

²⁴ Iroompaqueate iquemajiavaquitigui ima-
jirote coaretajia quempoguijajiguiroca teemporo,

jerijia saserorotejia anaantajianquitsica, mana yoajianaque intati icantavacaajianaca:

—¿Querocate icojilacani?

25 Ariquea icoraquepojaque aparo icampojiri:

—Irira pashitacotacaantajiavetacaca chapinqui arimpate chooca itsatacaantajiaque oniganquirequi oticaacoroqui tetempo.

26 Ariqueate iquemavaquegueti imajirote coaretajia itsipajianacari igoaretatepae yoajianaque cameetsaqueate yaajiajatiri, itsaroajiaquetarite itsinacajitiritsi.

27 Yamajiapojaqueri yogatiajiapojaqueri icapirocajicagueta. Ariqueate iquenquetsataque sasero-rote anaantamajatanquitsica icanti:

28 —NocamantamajajiavetaqueMPI povashi-antajianajero, aatoja pitsavetantajiajirotsi yantaguetaqueca Jesoshi. Cotanquitsiquea pitsitacaguitejaquero Jerosare pitsavetantajiaquero pitsatacaantane, mana pinintajiaque incanta-cojiaquena: ‘Iriguenti metojacaantajiaquerica Jesoshi, mana iquempevaejiaca.’

29 Iquenquetsajianaque Peerero jerijia aisa itsipajiacaca itigarancanejia Jesoshi icantajiguiri:

—Iriquetimpa nonquemisantamajajiaque Aapani Irioshi. Incanquegueti caquinte otsipasato, aatoqueate noquemisantajiguiritsi.

30 Arimajatarite pimetojacaantajiavecari Jesoshi pompajacotacaantajiavetacari coroshiqui, cotanquitsi yovochantajiri Irioshimajaca itsaroventajiganica avaesatiniteni coramani.

31 Yoguisavicajiri itincamijempequiqui, imajirontacaacari aisa ipeacaacari Meshiantatsica,

cameetsanijite incantashitatijaianaquempa
ishiraerijia irovashiantajianaquero yantajiguica
teeca oncameetsateji, cameetsaniji irisheta-
jenerinijite Aapani Irioshi iguempevaereja,
irimaisantajeronijite.

³² Namenamajajiaqueritarite notsavetanta-
jiacarica. Ariqueate iquejetaca Ishire Aapani
Irioshi itsavetacoqueri, iriotarite iriguenti
itigarancaqueca Aapani Irioshi inchoocashirenta-
jiaqueri maasano quemisantamajajiguirica.

³³ Iroompaqueate iquemajiavaquerigueti ope-
jaianaqueri itsimajenca, inintajavetaca irimeto-
jajiaquerime.

³⁴ Cotanquitsi ariqueate ichoocataque acaniqui
pariseo icantajitica Gamarieri, yamenajiaque-
riqueate igonorojia caaviji icameetsati. Iriatimpa
iriguenti tsatacaantantiroca itioncacotanaqueca
Moishishini. Icatiimojianacarieate majironta-
jiatsica, icantiri itsipa:

—Paajianaquerita sotsiqui capichajaniqui.

³⁵ Ariqueate icantiri capiocajianquitsica:

—Shiramparijia ishiraerijia, inchiquiojia
pimetojajiguiritsija. Iroqueti pinquenquejamaja-
jiaque.

³⁶ Pinquenquejajajero coramanitica
ichoocavetacagueti Teorashini inintavetacagueti
iranaantaquemequeate yoguijajavetanacari
oshequini caquinte, aricampa icarajiaque
400. Cotanquitsi teequeate iragavejeji, mana
imetojajitaqueri. Irira oguijajavetanacarica
ariquea yoayoaitanaji, teequeate intsipatavacaa-
jajempaji.

37 Ariqueate oquejetaca aisa coramani itioncacotacaantajiaquerigueti majirontatsica irajaanire intsataque querocaca iveauaracani maasano, chooqueate itsipa, irira Garireaqutica icantajitica Jorashini. Iriatimpa inintavetaca iranaantaqueme inquejetaquemparime Teorashini. Ariqueate iquejetaca iriatimpa yoguijajiavetanacari oshequini caquinte, cotanquitsi iroompa imetojajitaquerigueti ariqueate iporocajianaque oguijajiavetacarica.

38 Irootaquequeate noncantantajiaquempica imaica ariotaque icoca irirajia, povashiantajiajeri aato picantajiguiritsi. Maasano itsatacaantaqueca inchiquiojica yaashijiacaro intati iriatimpajia, inchiquotsi ompeashitanajempa.

39 Cotanquitsi iriguentigueti tigarancaqueri Aapani Irioshi intsatacaantantajiaque querocate pincojiaquerini. Aatoshiatsi picatsimamanatiritsija Aapani Irioshi.

40 Iroompa iquemajiavaquerigueti icantajiguri:

—Iroosacanicate cameetsavaeque.

Ariqueate icajemacaantajiajiri itigarancanejia Jesoshi, ipasatacaantajiaqueri. Ariqueate yoguipaquiajajiri icantajiaavaqueri:

—Aato pitsavetantimataji ivajiroqui Jesoshi.

41 Ariqueate isotosotoitanaji icapiocaventajiacarigueti majirontajiajitsica, yoajianaji ishinejianaja itsajiaqueterite ishinevencari Aapani Irioshi, iriguentitarite yatsipeventajiacar Jesoshi.

42 Maasano savincaguiteri itsatacaantapiniji-que ontaniqui oniganquirequi oticaacoroqui

teemporo aisa tsovironaquipaequi, teequea irovashiantajigueroji, itsavetantajiaqueri Jesoshi, icanti iriguenti Quirishito.

6

Icoguiaque 7 amitacotantanquitsineca

¹ Ariqueate yoshequiamajatanaquegueti quemisantajiatsica, ariqueate itsitijianaquero irirajia quenquetsatanticaroca guiriego inijashijianacarieate irirajia quenquetsatanticaroca evereo, icantajiaquequeate:

—Maasano savincaguiteri icavintsajajiaquerogueti metojacoguetanquitsica, tee irantajigueji cameetsa, teenicate irojocamajajiguenero oshecajia agonorojia.

² Irirajia itigarancanejia Jesoshi carajianquitsica 12 icapiocajiaqueriqueate maasano quemisantajiatsica icantajiguiri:

—Teenicate oncameetsateji novashiantajianaquero notsavetantajiguirogueti Iguenquetsatsare Aapani Irioshi irooqueate nantajiavaque nojocapinijiaquenero oshecapae.

³ Irootaquequeate, napiguemisantarijiate, noncantantajiaquempica imaica pincoguajigue 7 tsamajajiatsica irira comajamajajianquitsica ichoocashirentamajajiaqueca Ishire Aapani Irioshi cameetsanijite irionijite savicaventajiaquerone irojocantajiaque.

⁴ Naatimpajia manaqueate ogantaga nosavicaventajiaquero namanajiguéri Aapani Irioshi aisa nontsavetantajiaquero Iguenquetsatsare nontsatacaantajiaquero.

⁵ Iroompaqueate maasanoqueate ishineventaji-acaro icantajiaquerica. Icoguiajiaqueriquea Ishitivano, itsajiaqueritarite iquemisantamajataque aisa ichoocashirentamajataqueri Ishire Aapani Irioshi. Ariqueate icoguiajiaqueri aisa Jeripe, Porocoro, Nicanori, Timo, Parimenashi, jeri aisa Nicoraashi. Irira Nicoraashi ariguenti iponeaca Antioquiaqui. Tee irio jorio cotanquitsi yoguijat-acotaqueri joriojia itsaroventacarigueti Aapani Irioshi. Imaica iquemisanqueri Jesoshi aisa.

⁶ Ariqueate icantajiguiri itigarancane Jesoshi:
—Jeri iricatica.

Ariqueate iriatimpajia ipamijiaqueri yamanajiaqueri Aapani Irioshi impeacaimenquemparinijite amitacotantajianquitsineca.

⁷ Arimpaqueate otsitacacovaetanacaroni Iguenquetsatsare Aapani Irioshi Jerosarequi, iquemantajiavacaroca oshequini. Arimpaqueate ijatiri yoshequiamajatanaque quemisantajiansica. Imajianacaqueate oshequini saserorotejia iriatimpajia iquemisantajianaque.

Icatsimajitaqueri Ishitivano

⁸ Irira Ishitivano iriguenti caaviji icavintsa-jamajataqueri Aapani Irioshi, yagavejacaama-jataqueri, yonigaaguetaqueri irapijoriojiateni teeca irinejajigueteji, intsatimentajiaquerinijite iriguenti agavejacaquaqueri Aapani Irioshi.

⁹ Cotanquitsi choocaqueate ontaniqui shinagoga icapilocapinijiacagueti jorio ipimantajive-taca coramani cotanquitsiqueate yovashiantajiri aavetacarica. Ariqueate iconoagarantajica iriatimpajia itsipajiacari ponejaianquitsica

Shirenequi, Arejantiriaqui, Shirishiaqui, jero aisa Ashiaqui, yoashijianaqueri Ishitivano incatsimajigueri. Iriatimpajia icapiocaventajiacari icatsimajiaqueri. Irooqua icanti, irooqua icanti,

¹⁰ cotanquitsi teequeate iragavejajigueriji iroguemisantajigueri, caavijitarite itsaque, iriguentitari tsatacaaqueri Ishire Aapani Irioshi.

¹¹ Irootaquequeate yojocantacarica imentaquipae itsipa caquinte cameetsanijite iramataajiaquempa. Iriatimpajia icantajiaque:

—Noquemajiaqueri inijashinatari Moishishini, ariqueate iquejetaqueri Aapani Irioshi iriatimpa.

¹² Iroompaqueate iquemajiavaquegueti maasano opejanaqueri itsimajenca, ari iquejejianaca irirajia jivajiatsica aisa tsatacaantajiguiroca itioncacotanaqueca Moishishini. Yaajianaqueri yamajianaqueri ichoocajiaquegueti imajirojiate.

¹³ Ariqueate icajemajiaque itsipa amataajianquitsica icantajiaqueri:

—Iricatica iroguenti ichoocavenque inijashinatacaro ocatica tetemporo yashintacaca Aapani Irioshi aisa inijashinatacaro itioncacotanaqueca Moishishini.

¹⁴ Noquemajiaqueritarite icannedgueti: ‘Iriraqueate Jesoshi Nasarequitica irisoveaquero tetemporo, aisa irogaaguetaquero maasano itsatacaantinica Moishishini.’

¹⁵ Irira capiocaventajiacarica yamenajiaqueriqueate inejajiaqueriqueate ivoroqui Ishitivano quejetaca ivoro irashivantite Aapani Irioshi.

7

¹ Ariquea irira saserorote anaantamajatanquisica icantiri Ishitivano:

—¿Arimaja piquejetaquero imaica?

² Iriatimpa icantiri: “Imaica nogonorojia aisa jivajatiacsica, iintsija pinquemisantajiaavaquena noncamantajiaquempigueti. Coramani itsaroventajiacari avaesatinijiateni Aapani Irioshi Oganejencamajatatsica, ariqueate noquejetaca naatimpa aisa notsarovenacari. Choocatirajagueti Averaameni Mesopotamiaqui tequeratagueti iroanaqueji ontaniqui Jaranequi, yonigaacari Aapani Irioshi,

³ icantiri: ‘Pija povashiantanaquero piguinteni, povashiantajianaqueri pijitanejia, poanaquequeate otsipaqui quepatsi nonigaaquempica.’

⁴ Ariquea icatianaca Averaameni yovashiantanaquero iguepatsite Carerequitica, yogaanaja Jaranequi, iguntenipoja ontaniqui. Oraquea imetojanaquegueti iriri, ariqueate itigarancaqueri Aapani Irioshi icoraquequeate acaniqui pigumentijiacagueti imaica.

⁵ Cotanquitsi tee irojocamajateneriji quepatsi, teenicate irashintemparoji capichaji, cotanquitsi icashiacaacari icantaqueriqueate: ‘Pimetojanaquegueti irioqueate ashintajemparone pinchoviquijianaqueca.’ Oraqueate icashiaacarigueti tequeratanica iroacaantenica,

⁶ cotanquitsi icanqueri: ‘Irirajia pinchoviquijianaqueca mana iriguinentantajiaquemparo iguepatsite itsipajia. Iromperaperaajitaquempari intati, aato ivegaratiri. Irantsipetacajaiaquempari aavaetanaquempa 400 ajagantsini.

⁷ Cotanquitsi naatimpa noncatsimatimen-tajigueri maasano omperajiacarica intati. Ariqueate irovashiantajiajerigueti incoraquejiaje acaniqui intsaroventajiaquena.'

⁸ Icanqueri aisa: 'Noninque imaica intotsaiquijiquero pichonquimashi aisa ariqueate iroguijatacojajeroqueate maasano pinchoviquijianaqueca cameetsanijite inquenquejajiaqueronijite nocanquempica aisa cameetsanijite ironigaaquenanijite arima-jaqueate inintamajataque inquemisantaquena. Arikeate naatimpa nashintajiaquempari noncavintsajajiaqueri pinchoviquijianaqueca.' Irootaquequeate yoacaanquerigueti Ishaaco iroompaqueate aapojacaguetai 8 savincaguiteri itotsaiquitaqueri ichonquimashi. Arikeate iriatimpa Ishaaco yoacaanquerigueti Jacovo imaqueri iriatimpa. Arikeate iquejetaca Jacovo itotsaiquitaqueri ichonquimashijia irijanijiate. Iriraqueate irijanijiate ivergarataca 12 iriojiatarite choviquijiacajica maasano aatimpajia.

⁹ "Apaniro irijanite Jacovo ipajita Jose. Iri-raqueate iriguentijeguijiate icantajigui: 'Yana-jaijaitsi coajica', irootaquequeate icatsimatimen-querica yojocantantacanarica iromperataquem-pari Ejepitoquitica. Cotanquitsiqueate itsipat-acari Aapani Irioshi,

¹⁰ yompetanacari yatsipetacaguetai, irootaquequeate ishineventantacarica imajirote Ejepitoquitica icantajitica Paraone. Yamenaqueri iriguenti tsamajatatsica irootaquequeate ipeacaantajarica iriatimpa iquejemajirontantajarica imajirontantajajarica maasano Ejepitoquitica

aisa iconoajiac Paraone.

¹¹ Ariqueate yatsipetanaca itase maasano Ejepitoquitica aisa Canaanequitica, maasano avaestinijiateni, querocampate irajaijaero isheca.

¹² Ariqueate Jacovo itigarancajiaqueri irijanitepae Ejepitoqui iramanantajiaquitequeate isheca, iquemacojiaqueritarite iriguenti choocatacojianquitsi tirigo itseraiquijiaquero tsovironaquipaequi itsotejiacaro iriatimpa irishecajiajempaca coajica onteroncague-tanaquempagueti maasano.

¹³ Coajica yoajianajiquea aisa iramana-jiaquiteri isheca, ariquea icantajiaqueri Jose: ‘Naroguentitarite piguentijeguite’, itsatantacarica Paraone queri oacaantirica Jose.

¹⁴ Ariquea Jose icajemacaantaqueri Jacovo iriri, jerijia aisa maasano ijitanejia. Maasano icaraji-aque 75.

¹⁵ Yoantanacaca Jacovo iguintenitapo jaca Ejepitoqui. Ariquea ontaniqui imetojanaji. Ari ique-jejianaca maasano irijanijiate, irirajia choviqu-jianacajica, imetojajiaque ontaniqui.

¹⁶ Ariquea yaajitanajiri ontaniqui Shiquemequi, yojoquijijitapo jajiri omoroqui yojoquijitanta-jitarica metojatsica, irootarite ivesgara queca coramani Averaameni yamanajiaquerigueti irijaniji-ate Amore Shiquemequi, yojocaqueneri imen-

taquitsite.*

17 “Ariqueate pajinigueti aapojempa irinetsanatantaquemparoca Aapani Irioshi icanquerica Averaameni coramani icantiquerigueti irovashiantajiajeri omperaperaajiavecarica inchoviquijaqueca, ariqueate yoshequiajianaquequeate avaesatinijiateni ontaniqui Ejepitoqui.

18 Ocoramanitapojaxigueti yoshequiajianaquegueti, ariqueate imajirontaja Ejepitoqui itsipa teeca inquemacoteriji Jose.

19 Iriotaquequeate amatavijajiavecarica avaesatinijiateni, yatsipetacaajiacari, ipishoncacaajiaqueri irijanijiate iriaqueraca voaguetanquitsi cameetsanijite irimetojajiaque aatonijite yoshequiguitsi.

20 Irootaquequea ivoantacaca Moishishi. Irira Aapani Irioshi ishinevencari. Ocarataque 3 taai iquempoguijajitaqueri itsovironaquitequi iriri.

21 Cotanquitsiquea aapojacagueti yojoquijitan-tajitarcarica sotsiqui irimetojeme, aaqueriqueate irorijanite Paraone, oguimoncaqueri aajanicari oquejetacaacari irijanimajate.

22 Itsatacaaajitaqueriqueate Moishishi maasano itsagueticica Ejepitoquitica. Cameetsaqueate iquenquetsataque, itsamajaguetaqueroqueate taaca opajitapae yantaguetaqueca.

* **7:16** Jen. 50.7-13 ocanti yojoquijitajiri Jacovoni omoroqui morotashitatsica Macaperaquitica yashintavecaca Eperoneni (Jen. 49.29-32). Irootaque ivesgarataqueca Averaameni. Josoe 24.32 ocanti iriraquea Joseni iriotaque yojoquijitajica **Shiquemequi** quepatsiqui ivesgarataqueca Jacovoni (Jen. 33.18-19).

²³ “Ariqueate ovegaratacagueti irajagantsite Moishishini 40, iquenquejanaque iroanaque irinejeri igonorojia, ichoviquijiani Ishiraerini.

²⁴ Inejapojaquequeate apaniro yatsipetacaacaca Ejepitoquitica, ariqueate ipigamempojiri Moishishini, imetojaqueriqueate Ejepitoquitica.

²⁵ Ijiqueji ariji intsajiaavaqueriji igonorojia iriguenti tigarancaqueri Aapani Irioshi iramijiaqueriqueate irajaianajeri, cotanquitsi iriatimpajia tee intsajiaavaqueriji.

²⁶ Osavincaguitetanajiguetequeate inejiri mavite igonoro taviavacaaca. Inintaveca irogameetsajajerime icantiri: ‘Shirampari, pigorontavacaaca; ¿querocate pincantempaji pitaviavacaantaca?’

²⁷ Iriraqueate taviaquerica itsipa itatsinquiriqueate icantiri: ‘¿Taampate cantaquempi pimpeaquempa nomajirojiate cameetsanijite pincantomajajiaquena? ¿Taampate peacaquempi nojoesete?’

²⁸ ¿Aricampa pinintaque pimetojaquena naatimpa pinquejetacaguena Ejepitoquitica pimetojaqueca chapinqui?’

²⁹ Iroompaqueate iquemavaquegueti Moishishi ishianaca yoanaque otsipaqui quepatsi icantajitica Mariane. Arikeate ichoocapoji ontaniqui iconoajiacari itsipapae. Yaapojaque imanquigare, yoacaanquequeate mavite shirampari.

³⁰ “Arikeate anaapojacagueti 40 ajagantsi, ichoocaquegueti Moishishi oquitamampororoipojaquegueti quempejitacoquero otsempi Shinai yonigaacari irashivantite Aapani Irioshi.

Ichoo catantacaro inchatojaniqui maequitatsica,
omorecanaque more, more, more, more.

³¹ Yamenakerogueti Moishishi, mana
yoanaque intati. Iquempejivetapo jaca
iramenamajaquero, iquemaitatiguri
iquenquetsatanaque Amajirote, icanti:

³² ‘Naroguenti Irios hite pivaesatinijate.
Naroguenti Irios hite Averaame, Ishaaco aisa
Jacovo.’ Ari queate ic anquit i Moishishi soroc
itsaroamajatatigu nimaja yompion canaca queate
pion, pion, pion, tee iramenajeroji capichaji.

³³ Ari queate ic antiri Aapani Iri os hi: ‘Pasatere-
janaquempa ri pigaviguitire, picatiantacarotarite
noganejencaguitere.

³⁴ Naatimpa namenajiaqueri nashintajiacaca
choocajianquitsica Ejepito qui yatsipejia cague t i,
aisa noquemajiaqueri icajemajia queg ueti,
iroota queque ate naguijita shitan tapo jarica
naajiajeri namitacojiaqueri cameet sanijite
irovashiantajiajeri atsipetacaajiacarica.
Imaica quea nontigarancaquempi pimpianaje
Ejepito qui.’

³⁵ “Iriota que tarite irira Moishishi iman in-
tajia queca ic antajia vecarigu eti: ‘¿Taampate
canta que empi pimpe guempa nomajiroj iate
cameet sanijite pincantoma jia que na nijite?
¿Taampate peaca que empi nojoesete?’ Imaica
noncantajia que empi iriotarite iti garanca queca
Aapani Iri os hi impea quempa imajiroj iate
aa jianajerine ca. Iriguentitarite tiga ranca queri
irashivantite Aapani Iri os hi yoniga acarigu eti
inchatojaniqui qui maequitatsica.

³⁶ Ora queate ontani qui Ejepito qui

yantaguetaque Moishishini oshequi teeca irinejajiteji intsatimentajiaqueniji iriguenti Aapani Irioshi amitacojiaquerica, ariqueate yaajianajiri avaesatinijiate. Arikeate iquejetaca aisa ontaniqui Quentijani Quityoncajaroqui aisa ontaniqui oquitamampororoipojaquegueti yantaguetaque oshequi teeca irinejajigueteji. Ovegarataca 40 ajagantsi yantapiniguetaquero.

³⁷ Iriraqueate Moishishini iriotarite cantajiaqueri ichoviquijia Ishiraerini: ‘Intigarancajempi Aapani Irioshi pigonoro tsavetantaquerineca, inquejetaquena naatimpa.’

³⁸ Iriotaquetarite Moishishini tsipajiacarica avaesatinijiate ontaniqui icapiocajiacagueti oquitamampororoipojaquegueti. Aisa itsipatacaro irashivantite Aapani Irioshi quenquetsatacaaquerica otsempiqui Shinai. Iriotaquequeate quemavaqueroca quenquetsatsarentsi oganijantatsica, yogaajiacajiro aatimpajia atsatantajiacaroca imaica.

³⁹ Cotanquitsi irira avaesatinijiateni imanintajiaqueri teenica irinintajigueji inquemisantajigueri manaqueate intati ipintsapintsajianaja Ejepitoqui.

⁴⁰ Icantantajiacarica Aaronini: ‘Panteshiatsi irioshijiate itsipapae cameetsanijite irionijite jivajianajineca. Irivotetaca Moishishi aaajiavetajajica ontaniqui Ejepitoqui, cotanquitsi tee antsateji taa opajita oaqueri, ari ipeaca.’

⁴¹ Arikeate yantajiaque iriatimpajia irioshivijitashicaca iquejetacaacari caapironcaari iriaqueraca quimogantirenajaniquitanquitsica. Arikeate imetojajiaqueneri viratsipae

itajaiaqueneri ishinevaejiaca, ishineventashiji-
avetacari yantajiaqueca.

42 Ariqueate yovashiantajianaqueri Aapani Irioshi intsaroventajiguemparita catsirincaiteri, taai, impoquiropae. Itioncacotaquerotarite coramani tsavetantatsica itioncacaaquerigueti Aapani Irioshi icanti:

‘Aviatimpajia ishiraerijia,
pimetojajiaquegueti viratsipae pitajaiaquerigueti
pichoocajiaquegueti ontaniqui oquita-
mampororoipojaquegueti 40 ajagantsi
¿arimpate naroguentimpa pojocajiaquene pitaja-
iaquene?’

43 ¡Teequeate!

Iriguentitarite pishineventajiaca pirioshiviji-
tashitaca icantajitica Moroco,
irootaquequeate querocagueti poajianaque paa-
jianaquero tsovironaqui ichoocatancaca.

Aisa pishineventajiacari impoquiro irashi
pirioshivijitashitaca icantajitica Irepana.

Iriojia pantajiaqueca pintsaroventajiaquempaca.

Irootaquequeate naacaantantajiaquempica ira-
jaitanaquempi osamani anaacagueti Vavi-
ronia.’

44 “Ariqueate ontaniqui oquitamam-
pororoipojaquegueti irira avaesatinijiate
itsaroventantacarieate Aapani Irioshi
quitsaarentsivanco oraquea ochooocatantaca
itioncaqueca Aapani Irioshi ontaniqui Shinaiqui.
Arikeate iquejetacaajiacaro icanquerica Aapani
Irioshi Moishishini yonigaaquerigueti quero
incojiaqueroni.

45 Ariqueate imetojanajigueti Moishishini, irioqueate piajari Josoe itsipajianajari avaestinijiate icoraquetashitajiro ocatica quepatsi icashiaca jiacarica Aapani Irioshi coramani, yaajianajiroqueate iitsaarevanco. Ariqueate yarejerejeiveta pojacagueti inejajia pojaqueri teeca iriojia joriojia guntenijiavetatsica acaniqui, cotanquitsi ariqueate yoguishia jiaqueri Aapani Irioshi cameetsanijite irojocajia quenerinijite irionijite ashintajia jemparone. Ogantaga ochoocaque iitsaarevanco Aapani Irioshi arejeva etapojacaro ichooca quegueti Taavini.

46 Ariquea irira Aapani Irioshi ishinevencari Taavini, icavintsa jaqueri. Ariqueate iriatimpa inintavetaca irantaquenerime tsovironaqui inchoocatantaquempaca Aapani Irioshi itsaroven-tacaca Jacovoni.

47 Cotanquitsiqueate teequeate irinintacaguer-iji iranteneri, iriguente queate antajiniri irijanite icantajitica Saromoni.

48 Cotanquitsi irira Aapani Irioshi Anaantama-jatatsica tee inchoocatantemparo tsovironaqui ishitiquica caquinte, icanquetari tsavetantirinica Aapani Irioshi:

49 Icanti Aapani Irioshi:
 ‘Maasano jenoquipa etica manaqueate oquejeve-
 caro noshitaponcaro
 aisa quepatsi manaqueate oquejevecaro novan-
 quegontare.

¿Arimpate pagavejajiaque pishiticajia quena tsoviro-naqui nonchoocatantempaca?

¿Queroquea ochoocaque nomagorejantaquempaca naatimpa?

50 ¿Arimpate tee naroguenti peacaaguetaroca maasano choocaguetatsica?

51 “Aviatimpajia aviguentijia tee pinquemeji, mana pogapianaca intati. Mana piquejejiacari teeca intsatimajigueri Aapani Irioshi, manaquea pipigatsajiacari Ishire Aapani Irioshi piquejejiacari pivaesatinijiate.

52 Iriguentijatarite atsipetacaajiacarica maasano tsavetantirinica Aapani Irioshi aisa imetojajiaqueri maasano camantajiavetacarica: ‘Incoraquetaque coajica irira Comajamajatatsica.’ Ariqueate icoraquevetacagueti aviatimpajiaqui paacaantajiaqueri intati, pimetojacaantajiaqueri aisa.

53 Pitsajiavetacaro icanqueca Aapani Irioshi yogajiacajica irashivantijitete, cotanquitsi tee pinquemisantajigueroji.”

54 Iroompaqueate iquemajiavaquitiguiri icanquegueti opeamajajianaqueriqueate itsimajenca yatsicayajimajatashijianacariequeate.

55 Iriraqueate Ishire Aapani Irioshi ichoocashirentamajatanaqueri Ishitivano, yamenanaquequeate jenoqui inquitequi inejaquero ishimoquirereane Aapani Irioshi cantavaetaque shimoquirererere. Iriraqueate Jesoshi catiaca itincamijempequiqui. Icantanaquequea Ishitivano:

56 —Jac, imaica naatimpa nonejaquero inquite otanarejanaca. Jeri irinta Irijanite Caquinte, catiaca itincamijempequiqui Aapani Irioshi.

57 Ariquea icojianaca ishepójianaqueri iguempitapae aatoniji iquemajiguiri, icajemajianaque ishiashijianacari itaviajianaqueri.

58 Yaajianaqueri ovegaraguetacagueta
tsovironaqipae ipishoncashijiaqueri itsinatsi-
najiaqueri. Iriraqueate tsinacajiaquerica mana
isapocajianacaro iitsaare jenoquitanquitsica
yojocajianaqueneriqueate itsipa itsipajiacaca
icantajitica Saoro, iquempoguijajinriqueate.

59 Iroompaqueate itsinacajianaquerigueta Ishi-
tivano, iriatimpa yamanaqueri Amajirote, ican-
tiri:

—Nomajirote Jesoshi, paavajero noshire.

60 Ariquea iguerotanaca icajemapanajanti iriri-
jencani icanti:

—Nomajirote, aato piquenquejacaguiritsi ocat-
ica iquempevaecagueta.

Iroompaqueate iquejetanaquerogueta imaica
imetojanaque.

8

1-2 Irira Saoro yamenavaquerigueta
imetojanaquegueta yamenavaquero cameetsa.

Saoro yatsipetacaajiacari quemisantajatsica

Aitarite ichoocajiaque acaniqui
quemisantamajajiguirica Aapani Irioshi,
yaajianajiriqueate Ishitivano iquitajiajatiri.
Iraacomajajianaqueriqueate. Arikeate
irira teeca inquemisantajigueriji Jesoshi
itsitijianaqueroqueate icatsimajianaqueri
maasano quemisantajatsica choocajiajatsica
Jerosarequi, ishiantajianacaca maasano
iriatimpajia yoajianaque iporocajianaquequeate
Joreaqui aisa Samariaqui. Iriguentinivani
choocajiajatsi itigarancanejia Jesoshi.

³ Iriraqueate Saoro inintavecaqueate interoncajigueme irira quemisantajiatsica, yoashijianaqueri itsovironaquitepaequi, iquijashijianaqueri inoshicajianaqueriqueate shiramparijia, manquigarentsijia, maasano. Yaajianaqueri yoguijajiaqueriqueate santanaqui.

Itsavetantajiquerigueti Jeso quirishito Samariaqui

⁴ Irirajiaqueate porocajiananquitsica yoajianaque itsitacaguitejajiaquero itsavetantaqueroquea Quenquetsatsarentsi Oganejencatatsica.

⁵ Apaniro icantajitica Jeripe yoanaque Samariaqui itsavetanqueri Quirishito.

⁶ Oshequini quemajiajavaquerica Jeripe iquemisantamajajiajavaqueri, yamenajiaqueritarite yantaguetaquequeate teeca irinejajiteji.

⁷ Yoguisotoaguequeriqueate ampatsinipae choocatantajiacarica caquinte. Icajema-jianaquequeate isotoajianaque. Ariqueate aisa yogueshijajiri magoviroshiri, jerijia aisa teeca ironquempaji.

⁸ Irootaquequeate ishinevaetantajiacaca oshequini guntenijianquitsica Samariaqui.

⁹ Ariqueate chooca acaniqui aparo shirampari icantajitica Shimo. Yaventapinicaro iragavejane ampatsini yamitantajiavecarica, yamatavijantajiacarica Samariaquitica. Yaventacoca icanti: “Naroguenti anaantatsica.”

¹⁰ Maasanoqueate iquemisantamajajiavetacari, majirontajiatsica, aisa teeca iranaantajigueji, icantajiavetacaquea: “Irio

agavejavaetatsica yagavejacaaquea Aapani Irioshi."

¹¹ Iquemisantajiaqueri maasano, yonigaajiaqueritari taaca opajitapae teeca irinejajiteji yagavejacaquerigueti ampatsini, yamatavijantajiacarica. Iriatimpajia mana yoajianaque intati.

¹² Cotanquitsiquea yarejetapojacagueta Jeripe itsavetantaquerogueti Quenquetsatsarentsi Oganejencatatsica tsavetantaquerica Aapani Irioshi quero icotani imajirontagueti aisa tsavetantaquerica Jesoquirishito, ariquea iquemisantajiaqueri iviñacajatacaantajiacaquea, irirajia shiramparijia aisa manquigarentsijia.

¹³ Imatanacaqueate Shimo iriatimpa. Iroompaqueate iquemisantaquegueti iviñacajatacaantaca, ariqueate yoguijatanaqueri Jeripe. Mana yoanaque intati inejaqueritarite yantaque teeca iragavejeji caquinte.

¹⁴ Irira itigarancanejia Jesoshi choocajianquit-sica Jerosarequi iquemacojiaquerigueti Samari-aquitica ishineventamajajianacaro iriatimpajia Iguenquetsatsare Aapani Irioshi, ariqueate itigarancajiaqueriqueate Peerero aisa Joanca iramenajiaquiteri.

¹⁵ Iroompaqueate yarejerejeipojacagueta yamanajiaqueriqueate Aapani Irioshi, yamanacoventajiaqueri cameetsanijite inchoocashirentajiapojaqueri Ishire Aapani Irioshi,

¹⁶ tequeratanicate inchoocashirentajigueriji, manatarite yoviñacajatimentajiacari ivajiroqui Amajirote Jesoshi.

17 Ariqueate Peerero aisa Joanca ipamijiaqueriqueate, ariqueate ichoocashirentajianaqueri Ishire Aapani Irioshi.

18 Iroompaquea yamenavaquerigueti Shimo yantaqueca itigarancanejia Jesoshi ipamijiaquerigueti caquinte cameetsanijite inchoocashirentajiapojeri Ishire Aapani Irioshi, initavetacaquea irivegarajiaquenerime imentaquitsite,

19 icantiri:

—Intsishiatsi pagavejacaguena naatimpa aisa nonquejetaquempi aviatimpajia cameetsanijite quericaca nompamitaque inchoocashirentajiapojaqueri Ishire Aapani Irioshi. Intsija pagavejacaguena, novegaraquempitarite imentaquipae.

20 Icantiri Peerero:

—Intaaquempashinete pimentaquitsitepae. Pitaatsishiatsi aisa aviatimpa camorecariqui iroorijite pijiqueji povegaratantaquemparo imentaquipae ora yojocashitantaca Aapani Irioshi.

21 Aatoqueate pagaveji piconoajigana pinquejejaquena naatimpa, tequeratanicate pincantashitatiamajatempaji. YamenaqueMPI Aapani Irioshi teequea ontampaticateji pishire.

22 Povashiantanaquero ocatica piquenquejaguishetaqueca imaica, pincantashitatiamajatanajempa. Pamaneri Aapani Irioshi, arica impeacotajempiro piquenquejaguishequeca.

23 Notsataquempitari oshequi picatsimat-acotsitanaquenaro, ajiricashirentavaquempi covaeguisherentsi.

24 Icanqueriquea Shimo:

—Pamanacoventajiguenashiatsi pincantajigueri Aapani Irioshi aatoniji nogu camorecariqui notagatsiqueate quejetaca picantajiaquenaca imaica.

25 Ariqueate itigarancanejia Jesoshi icamantacojiaquerogueti maasano yamenajiaqueca aisa itsavetantajiaquerogueti Iguenquetsatsare Aapani Irioshi, ariqueate iquenaguetanaque iguinentiguetacagueti itsipapae Samariaquitica, itsavetantaqueroquea Quenquetsatsarentsi Oganejencatatsica. Ariqueate ipiapaitanaja Jerosarequi.

Iquemisanquegueti Etiopiaquitica

26 Ariquea irashivantite Amajirote iquenquetsatacaaqueri Jeripe icantiri:

—Pija oquitamampororoipojaquegueti pinquenantanaquemparo quenavoquirontsi quenavoquipojatsica Jerosarequi oavoquitananquitsica Gasaqui.

27 Ariqueate icatianaca Jeripe yoanaque quenavoquirontsiqui, ariquea itonquivojavajari shirampari eonocotatsica* poneatsica Etiopiaqui. Iriatimpa iriguenti amitacotiroca ora imajirojiate Etiopiaquitica ora icantajitica Cantase. Iriguentitari netsanatiniroca omentaquitsitepae, cavorejaguetatsica. Iponeajaqueate Jerosarequi yoauquiqueate itsaroventaquitari Aapani Irioshi.

28 Imaicaqueate iroanaje iguinenteniqui, itetajaro itigaritacomento yapatsajavantaquero paperi

* **8:27 Eonoco** irio isoitsorejitajiqueca iguemaaqui.

itioncacotanaqueca coramani tsavetantirinica Aapani Irioshi icantajitica Isaiashini.

²⁹ Irira Ishire Aapani Irioshi icantiri Jeripe:

—Poanaque pintonquivojamajatavaquempari quempeji.

³⁰ Ishiashitanacariqueate Jeripe iquemapojaqueri yapatsajavantaquero itioncanaqueca tsavetantatsica Isaiashini, icampojaqueri:

—¿Pitsatavaquerompa papatsajavantaqueca?

³¹ Iriatimpaqueate icantiri:

—¿Querocampate noncoquempani nontsantavaquemparocea? Teenicate inchoocateji tsatacaaquerenaroneca. Lintsija caacateja pantaitapoaque aviatimpa pisavicapojaque acaniqui naatimpaqui pintsataacaapojena.

Ariqueate yataitanaque Jeripe isavicapojaque.

³² Oraqueate yapatsajavantaqueca mana ocanti:

Yaajitanaqueri iquejetacaajitanacari yaajitrigueti oveja ipesaitirigueti.

Teequeate incajemanaqueji, iquejetanacari yogarajamaejitrigueti ovejajaniqui yaajitirogueti imae, mana iquemisantacotanaca.

³³ Ariqueate ivosantejajiaqueri, inijashinaji-acariqueate, quericampate cantacotanaquerineca.

Ariquea imetojajiaqueri, tee inchoocateji quepasiqui.

¿Imaica quericampa agavejanquitsine inquen-
quetsatacotaqueri inchoviquijianaqueca?

³⁴ Iriraqueate eonoco icantiri Jeripe:

—Pincamantenaja, ¿queri iquenquetsatacotaqueca tsavetantirinica? ¿Iriocampa quenquetsatacotaquera itsipa?

³⁵ Ariqueate itsititanaquero Jeripe acaniqui ocanqueca paperi yapatsajavantaqueca, itsatacaamajataqueri itsavetantaquero Quenquetsatsarentsi Oganejencatatsica tsavetacoquerica Jessoши.

³⁶ Arikeate yoajianaque inejajia pojaquero osamponaja. Icanquequea irira eonoco:

—Jerosa oca osamponaja. ¿Cameetsataquempa noviñacajatacaanquempa?

³⁷ Icantiri Jeripe:

—Avirompate. Piquemisantamajataquerigueti Quirishito, cameetsa piviñacajatacaanquempa.

Iriatimpa icantiri:

—Arimajatarite noquemisantamajataqueri, notsataqueterite irira Jeso quirishito iriguenti Irijanite Aapani Irioshi.

³⁸ Arikeate icantiri tigaritacoquerica irogatiguero itigaritacotantaca, yaguijitanaque mavite, irira Jeripe aisa eonoco, yoajianaque osamponajaqui iviñacajataqueri.

³⁹ Iroompaeate yagajianajatigui otsapijaqui yaanaqueri Ishire Aapani Irioshi Jeripe, ariquea ipeanaca. Irira queate eonoco, teequeate irinejajeriji Jeripe, cotanquitsiqueate yoanajiqueate ishinevaetanaca.

⁴⁰ Arikeate irira Jeripe iconigavaeti Asotoqui itsavetantanaquero Quenquetsatsarentsi

Oganejencatatsica, yoavaetanaque itsitacogui-tejanaquero quinteninintsipae, yarejevaecaro Sesareaqui.

9

*Iquemisanquegueti Saoro
(Ya. 22.6-16; 26.12-18)*

¹ Iriraqueate Saoro arimpaqueate icatsimajianaqueri quemisantajiguirica Amajirote inintavetaca irimetojajiaquerime maasano. Yoantanacaca saserorotequi anaantamajatanquitsica,

² yamanapanajantiri irojocavaqueneri paperipae cameetsanijite inquijashitim-entajianaquerinijite shinagogapaequi icapiocantajiacar joriojia Tamashicoqui incoaguequieri maasano guijatacojiguiroca icantajitica Quenavoquirontsi, irajajianaqueri iroguijaajaqueri santanaqui Jerosarequi, shiramparijia aisa manquigarentsijia. Ariquea itioncaqueneri paperi, yojocavaqueneri.

³ Iroompaquea iquenavetanacagueti quenavoquirontsiqui quempejivepojacaqueate Tamashico ocantanaquitigueate morec oponeajencataca jenoqui inquitequi otsirencapo-jaqueriqueate anquiritacotapojacari.

⁴ Ariqueate itejanaque quepatsiqui iquematigu-iquestate icantapojaqueri:

—Saoro, Saoro, ¿taate picatsimatantaquenaca?

⁵ Iriatimpa icoacotanaqueri icantiri:

—¿Queroquea pipajitani, Nomajirote?

Icantiri:

—Naatimpa naroguenti Jesoshi pipati-manataqueca.

⁶ Imaica pincatianaque poanaque Tamashicoqui. Ariqueate oraniqui incantajiquempi querocaca pincoquempani.

⁷ Iriraqueate itsipatsipaicaca Saoro itsaroajianaque iroorijite iquemajavetaca iquenquetsajiquegueti cotanquitsi teequeate irinejeriji, cajaraguiteni.

⁸ Icatiavetanaja Saoro, ipityaquirejavetanaca, tee iragavejajempaji irinejaje. Manaqueate yacatsajianaqueri intati, yaajianaqueri Tamashicoqui.

⁹ Arikeate ichoocataque oraniqui 3 savinacuiteri tee irinejajeji, aisa tee irishecatajempaji, tee irimirajeji.

¹⁰ Ontaniquiquea Tamashicoqui arikea ichoocataque quemisantatsica icantajitica Ananiashi. Inegaacari Amajirote mana oquejetanacaro iguimaanequi icantiri:

—Ananiashi.

Icantiri iriatimpa:

—Choocana, Nomajirote.

¹¹ Icantiri Amajirote:

—Pija ontaniqui itsovironaquitequi Jorashi, ari ochooaque quenavoquirontsiqui icantajitica Catincapoquiri, pincoacotantapojaqueri Saoro poneanquitsica Tarisoqui. Imaica yaman aquena.

¹² Nonigaaqueritarite oquejetacaro iguimaanequi inejaqueri shirampari pajitatsica Ananiashi iquijapojaque ipamitapojaqueriqueate cameetsanijite iramenimentanajenijite.

¹³ Iroompaqueate iquemavaquitigui Ananiashi icantiri:

—Cotanquitsi, Nomajirote, noquemacotiri
iriguenti catsimari yatsipetacaantajiacarica
pigomajamajarejia choocajianquitsica
Jerosarequi.

¹⁴ Imaicaqueate imaica coraquetaque acaniqui
itigarancajiaqueri saserorotejia anaantajianquit-
sica cameetsanijite irajaianaquerinijite maasano
aventajiguimpica pivajiroqui. Irootaquetarite
icoraqueta shitaque.

¹⁵ Cotanquitsi icantiri Amajirote:

—Piija, iriotaquetarite nocoguiaqueca, noninta-
queterite naatimpa intsavetanquena queate inca-
mantajiaqueri teeca iriojia joriojia aisa imajiroji-
ate. Aisa incamantajiaqueri ishiraerijia.

¹⁶ Nontsatacaaguequeri naatimpa maasano
quero incoquempani irantsipeventaquena.

¹⁷ Ari yoanaque Ananiashi, iquijapojaque tsovi-
ronaquiqui. Ariqueate inejapojaqueri ipamitapo-
jaqueriqueate, icantiri:

—Napiguemisantariteni Saoro, irira Amajirote
Jesoshi onigaaquempica quenavo quirontsiqui it-
igarancaquena cameetsanijite pinejanaje, aisa in-
choocashirentaquempinijite Ishire Aapani Irioshi
iragavejacaanaquempi.

¹⁸ Iroompaqueate icanquitiguirri ariqueate
ocotanaca opariapentaquiguepojaque
iroquiaqui quempeguetaca iventaqui shima
ariqueate yamenanaji. Iroompaquea yoanaque
iviñacajataca.

¹⁹ Ariqueate ishecatanaca itampishitanaji.
Ariquea ichoocatanaji Saoro aparopae savinca-
guiteri, imaimojianajiri quemisantajiacarica
Tamashicoqui.

Itsavetanquegueti Saoro Tamashicoqui

20 Ariqueate Saoro itsavetantaguetanaqueri Quirishito shinagogapaequi icapiocantajiacaca joriojia icantanaquequeate: “Jesoshi iriguenti Irijanite Aapani Irioshi.”

21 Maasano quemajiavaquerica mana yoajianaque intati icantajigui:

—¿Teempaqueate tee irio irira catsimajiaquerica quemisantajiguirica Jesoshi choocajiacatsica Jerosarequi? ¿Teempaqueate tee irio coraquetashijiavetacarica quemisantajiacatsica choocajiacatsica acaniqui iroishojaquierime irajaianaquerime saserorotejiaqui anaantajianquitsica?

22 Cotanquitsi irira Saoro arimpaqueate itsavetantamajatanaqueri Jesoshi, icanti iriguenti Quirishitotatsica.* Ariqueate irirajia irapijorijiateni choocajiacatsica Tamashicoqui tee iragavejajempaji impigajiajempariji.

23 Ariqueate oshequianaquegueti savincaguiteri isariajiavecariequa joriojia irimetojajiaquerime,

24 cotanquitsi icamantajiqueris Saoro. Ogantaga tsiteniriqui aisa savincaguiteriqui itimashijiavercari sotomorontsiqui itantajitaquerogueti ocap-

* **9:22 Quirishitotatsica.** Iguenquetsatsarequi guiriegojia icantquegueti **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito irtiotaquequea itsavetacotsitacaca tsavetantajiacatsica coramanitica intigarancaque Aapani Irioshi impeaquempaniji Imajirojiate maasano.

ocagueti tsovironaquipae inintajavetaca iriso-toanajegueti irimetojajiaquerime.

25 Cotanquitsiqueate opitsecanaquegueti yaajianaqueri irapiguemisantarijate otantotacagueti gunteninintsi, itetanaca cantiriqui, ariquea inchiquojisano yogaguijtacojiaqueri yoganoncorencacojiaqueri antaqueronta.

26 Iroompaqueate yarejetapojacagueti Jerosarequi inintavetaqueate inconoajiapojemparime quemisantajiatsica, cotanquitsiqueate maasano itsaroacaajiavetavacari ijitashivetavacaritarite tee arimaja inquemisanteriji Quirishito.

27 Cotanquitsiqueate yaanaqueri Verenave itsipatanacari Saoro ichoocajiaquegueti itigaran-caneja Jesoshi, icamantajiaqueri quero ocotacani yonigaacarigueti Amajirote quenavoquirontsiqui iquenquetsatacaapojaqueri. Coajica ontaniqui Tamashicoqui teequea intsarogueji iquenquetsatanaquequea ivajiroqui Jesoshi, itsavetacotaqueri.

28 Iroompaqueate iquemaijaviaquitigui yaajianaqueriqueate itsipajianacari. Arikeate iquijaguetanaque tsovironaquipaequi Jerosarequi,

29 iquenquetsatanaquequea ivajiroqui Amajirote, itsavetacotaqueri, teequea intsarogueji. Aisa iquenquetsatacaajiaqueri joriojia irirajia quenquetsatantacaroca guiriego. Iriatimpajia inintajavetaca inquemisantacajiaquerime cotanquitsi tee iragavejajigueri. Arikea itsimajajianaqueri inintantajavetacaca irimetojajiaquerime.

³⁰ Cotanquitsi iroompaqueate iquemavaquitiguiqueate irapiguemisantarijiate ni yoacaajianaqueri Sesareaqui. Ariqueate itigarancajiaqueri Tarisoqui.

³¹ Arikea ichoocajiaque cameetsa maasano quemisantajiatsica quintenijiatsica Joreaqui, Garireaqui aisa Samariaqui, teequeate irasereajitajeri. Yoshequiamajatanaquequeate oraniqui quemisantajiatsica, arimpaqueate iquemisantamajajianaqueri Amajirote itsamajajianaquero maasano inintica iriatimpa, iriguentitari tampishitacaajiaqueri Ishire Aapani Irioshi.

Peerero yogueshitajiri Eneashi

³² Ariqueate yoanaque Peerero inejantague-taque quinteninintsipaequi, inejajiaqueri irapiguemisantarijiate, irosati yarejetantaca Iritaqui, inejajiaqueri aisa itsipapae irapiguemisantarijiate quintenijiatsica ontaniqui.

³³ Ariqueate oraniqui inejapojaqueri teeca iron-quempaji icantajitica Eneashi inorijani queate 8 ajagantsi.

³⁴ Icantiri Peerero:

—Eneashi, imaica iriveajempi Jeso quirishito. Pincatianaje, pampiguiricanajero pinorijantacaca.

Iroompaqueate icanquitiguiri icatianaca queate.

³⁵ Maasano quintenijiatsica Iritaqui aisa Saronequi iroompaqueate inejavaquerigueti yogueshitajiri quemisantajianaqueri Amajirote.

Yovochantajirogueti Irorocashi

36 Ontaniquiqueate Jopequi ariqueate ochoocae que otsipa quemisantatsica icantajitica Tavita. Oraqueate iguenquetsatsarequi guiriego mana icantajitiro Irorocashi. Iroatimpa caaviji ocavintsajanti ocavintsajajiguiri coguitejacojianquitsica.

37 Arikeate ashinoncajanaca ometojanaque. Iquivatsinojitavaquero aritari icojiga joriojia. Arikeate yaajitanaquero shitamencorentsiqui jenoqui.

38 Arikeate irira quemisantajiatsica guintenijiatsica ontaniqui Jopequi itsajiaqueritarite arikea ichoocaque Peerero quempeji Iritaqui, itigarancantajiacaca mavite iroajianaque incantajiaquiteri incoraquetaque taampina.

39 Iroompaqueate iquemavaquitigui Peerero icatianaca yoguijaguijaitanaqueri. Oraqueate yarejerejeipojacagueti tsovironaquiqui itsipajianacari ojoquijicagueti otsino Irorocashini. Arikeate ochoocajiaque oraniqui metojajianquitsica omanquigarejia iraacojiaquero. Iroompaqueate onejajiaavaquitiguiri Peerero ocapiocaventajiavacari onigaajiaqueri quitsaarentsipae ontijaguequeca Irorocashini choocatirajagueti otsipavetacarogueti.

40 Irira Peerero yoguisotojaiaqueri maasano iguerotanacaqueate yamanacheri Aapani Irioshi. Arikeate ipitsocashitanacaro metojatsica ican-tiro:

—Tavita, pintinajanaje.

Arikeate opityaquirejanaque onejatiguiri Peerero otinajanaca osavicanaque.

⁴¹ Yacatsataquero yogatiaquero icajemajiajiroqueate metojacojiatsica aisa itsipajia quemisanta-jiatsica, icantajiguiri:

—Jero oca, pochatanaji.

⁴² Irira guntenijiatsica acaniqui Jopequi maasanoqueate iquemacojiaquero. Ariqueate yoshequiamajatanaquequeate quemisantajigurica Amajirote.

⁴³ Ariqueate ichoocaque Peerero oshequi savincaguiteri Jopequi itsovironaquitequi Shimo savicaventirica iticajaguetiri imeshinapae.

10

Iquemisantaquegueti Coronorio

¹ Choocaqueate Sesareaqui coareta icantajitica Coronorio. Iriatimpa iriguenti imajirote coareta-jia. Ariquea ivegarajiaca 100 igoaretajiate. Iriatimpajia itsipajiacaca itsipajia oshequi coareta-jia poneanquitsica Itariaqui.

² Iriatimpa iriguenti pincatsatirica Aapani Irioshi itsipajigari ijitanejia itsaroventajigari. Icavintsajajiguiri joriojia coguitejimojiacarica. Yamanapinitiri Aapani Irioshi irosati savincaguiteri.

³ Oraqueate icononcanajagueti catsirincaiteri mana oquejetimovecari iguimaanequi icoraque-tapojaque irashivantite Aapani Irioshi iconijama-jatapojaque, icampojaqueri:

—Coronorio.

⁴ Yamenavaqueriqueate sorerere, it-saroanaquequeate icantiri:

—¿Taa opajita, Nomajirote?
Icantiri:

—Iquemaquempi Aapani Irioshi pamanapini-taquerigueti, aisa yamenaquempi caaviji picav-intsajanti. Irootaquequeate icavintsajantaquempica.

⁵⁻⁶ Imaicaquea imaica pintigararanque iroanaque Jopequi cajemaquiterineca Shimo Peerero, incamantempi quero pincoquempa. Iriguenti imaimoque itsipa Shimo guintenitatsica quentijaqui savicaventirica iticajatiri imeshinapae.

⁷ Iroompaqueate yoanajatigui irashivantite Aapani Irioshi irira Coronero icajemaquequeate mavite irajaanire aisa aparo coareta amitacotirica. Irira coareta caaviji ipincatsatiri Aapani Irioshi.

⁸ Oraqueate icoraquejiaquegueti icamantajia-queriqueate maasano icanquerica irashivantite Aapani Irioshi, ariqueate itigarancajiaqueri Jopequi. Ariqueate yoajianaque.

⁹ Iroompaqueate osavincaguitetanajigueti itampaticatanaquegueti catsirincaiteri pajinigueti irarejejiguempa, iriraqueate Peerero yataitanaque jenoqui sotsiqui omencotapojacagueta tsovironaqui ovancaitoqui iramaneri Aapani Irioshi.

¹⁰ Itaseaque intavetaca irishecaquempame, iroaqua itijaitanaque tequeratatiraja irishecatempaji. Ariqueate mana oquejetimovecari iguimaanequi.

¹¹ Ariqueate otanarejaguitetanaca inquite oco-raquetacopojaque quepatsiqui quejetaca iniro-mago quitsaarentsi mana ishiticajiguequero ove-garamagoguetacagueta.

12 Itehiteitaca taaca ipajitapae tomirishipae-quitica canaaguetatsica, jeri soaancaguetatsica, araguetatsica, maasano teeca irishecatempariji jorio.

13 Ariqueate iquemiri iquenquetsajencijatanaque icanti:

—Peerero, pincatianaque paaguetavaqueri pimetojaguetavaqueri pishecatavaquempari.

14 Icanti Peerero:

—Nomajirote, aatotarite noshecataritsi, teenicate noshecatempariji icantimentantajitica; tee noshecatempariji covaetantaguetatsica.

15 Iquenquetsajencatsijitanaja aisa icantiri:

—Iriraqueate icantacoqueca Aapani Irioshi: ‘Cameetsa inaque’, aatoquea pipinquiritsi, aato picanti: ‘Covaeguishetaca.’

16 Otsipatapojaca aisa iquejejiqueruimaica iquenquetsajencatsijitanaja, ariqueate piacotanaja opeanaja jenoqui inquitequi.

17 Ariqueate icanti Peerero:

—¿Taate opajita ocatica?

Iroompaqueate iquenquejaquerogueti yarejerejeitapojaca itigarancajiaqueca Coronorio. Icamantajitiri incajararanqui quero onaqueni itsovironaquite Shimo savicaventirica iticajatiri imeshinapae.

18 Yarejerejeitapojacaguetti icoacojiapojaqueri ashincaroca tsovironaqui icantajiapojaqueri:

—¿Ari imaimoquempi Shimo Peerero?

19 Iriraqueate Peerero ogantagatiraja iquenquejiro yamenaqueca, icantiri Ishire Aapani Irioshi:

—Coraquejiaque 3 shirampari icojaiaquempi.

20 Pincatianaque poanaque isavi. Aato pitsarogui poguijaguijaitanaqueri, naroguentitarite cantajiaqueri icoraquetantajiacaca.

21 Yagujitanaque Peerero ichoocaquegueti shirramparijia [itigarancaqueca Coronorio], icantajiapojaqueri:

—Naroguenti picojaiaque. ¿Taaqueate picoracueta shijiaque?

22 Iriatimpajia icantajiguiri:

—Iriguenti tigarancajiaquena nomajirojiate icantajitica Coronorio. Iriatimpa iriguenti caaviji icameetsati aisa ipincatsatiri Aapani Irioshi. Maasano joriojia ishineventajiacari. Chapinqui iquenquetsatacapojaqueri ashivanti comajashirentanquitsica icantiri: ‘Pincajemaanteri Peerero pitsovironaquitequi. Taaca incamantaguequempi pinquemisantavaquerija.’ Irootaquequeate nocoraquetashitaque noncantajiaquitempi.

23 Irira Peerero yoguijajiaavaqueri yonigajiaavaqueri irimaantajiaquempaca. Ariqueate osavincaguitetanajigueti ipijajianaqueate yoguijaguijaitanaqueri, aisa itsipajianacari irapiguemisantarijiateni choocajiascica oraniqui Jopequi.

24 Osavincaguitetanajigueteate aisa yarejejiapojaca Sesareaqui. Ariqueate ichoocaque Coronorio, icapiocajiaqueri ijitanejia jerijia aisa itsipavijitaca, yoguijajiaavaqueri Peerero.

25 Iroompaqueate iquijapofigueti Peerero, itonquivojavacari Coronorio, yogueroaventavacari iguitiqui, iquejetacaacari irioca Irioshi.

26 Cotanquitsi Peerero yogatiavajiri icantiri:

—Pincatianaje, caquintetajanatari. Aritarite no-quejetajimpi aviatimpa.

²⁷ Ariquea iquenquetsatavacaaca iquijajiapajaque tsovironaquiqui, inejapojaqueri oshequi capiocajianquitsica,

²⁸ icantajiaipojaqueri:

—Aviatimpajia pitsajiganatarite naatimpajia joriojia nocantashitatijaiaca, caaviji icantimentajitiro nonconoajaqueparigueti teeca iriojia joriojia aisa nonquijitajiaquerigueti itsovironaquitequi. Icantajiaque nogonoro: ‘Tee irininteroji Aapani Irioshi.’ Cotanquitsi itsatacaaqueña Aapani Irioshi cameetsanijite aatonijite nopinquiritsi aisa aatoniji nocantajitsi: ‘Tee incameetsateji, covaeguishetaca.’

²⁹ Irootaquequeate imaica picajemacaantajiaquenagueti taampinaqueate nocoraquetaque, tecatsiquea nameventempaca. Imaicaqueate pincantajiguena, ¿taaqueate picajemimentajiaquena?

³⁰ Icantiquea Coronorio:

—Oraqueate chapinqui iquejetanajagueti imaica catsirincaiteri icononcanajagueti nochoocaquegueti acaniqui notsovironaquitequi namanaquerigueti Aapani Irioshi, ariqueate yonigaaqueña shirampari quitamarocantavaetaquequeate iitsaare.

³¹ Icampojana: ‘Coronorio, iquemaquempi Aapani Irioshi pamanapinitaquerigueti, aisa yamenaqueMPI caaviji picavintsajanti.

³² Imaicaqueate imaica pintigarande iroanaque Jopequi cajemaquierineca Shimo Peerero. Iriguenti imaimotaque itsipa

Shimo guntenitatsica otsapijaqui quentija savicaventirica ticajaguetirica imeshinapae.'

³³ Notigarancantajiacaca camantaji-aquitimpica. ¡Ariotesaa picoraquetaque! Imaicaquea imaica acapiocajiacaca ariqueate achoocatimojiaqueri Aapani Irionshi. Nonintaque pintsatacaajiaquena maasano taaca opajitapae icanquempica Aapani Irionshi.

³⁴ Iquenquetsatanaquequea Peerero icanti:

—Imaica notsamajataque yamenajiacaji Aapani Irionshi aquejetavacaajiacaca, teequeate ancantashitatijaiguempaji.

³⁵ Ishineventamajajiacaritarite maasano caquinteguetatsica quepatsipaequitica quericaca pincatsamajaquerica aisa icomajamajajianaca.

³⁶ Itigarancaqueroqueate Iguenquetsatsare itsatacaajiaquena naatimpajia ishiraerijia quero icotani Jesoquirishito imeshiantigueti cameetsanijite Aapani Irionshi irishineventajiacajinijite. Irira Jesoquirishito iriguentitarite Amajiomajate maasano caquinte.

³⁷⁻³⁸ Aviatimpa piquemacojiaqueritarite Joanca itsavetanquerigueti aisa iviñacajatantaquegueti. Ariqueate piquemacojiaqueri Jesoshi Nasarequitica itigarancaqueneri Aapani Irionshi Ishire jero aisa yagavejacaamajataqueri. Ariqueate iquenaquenaguetanaque manaqueate icavintsajantaguetaque yogueshijiaqueriqueate maasano yatsipetacaajiacaca ampatsini. Iparianacaroquea Garireaqui, ariqueate itsitacaguitejaquero maasano iguepatsijiate joriojia. Iriguenti tsipacari Aapani Irionshi iquejetancaca.

39 Naatimpajia namenamajajiaqueri maasano yantaguetaqueca Jesoshi ontaniqui Jerosarequi aisa otsipapaequi iguinentipaequi joriojia. Ariqueate imetojajiaqueri yompajacojiaqueri coroshiqui.

40 Cotanquitsi aapojacagueti 3 savincaguiteri ivochantajiri Aapani Irioshi itigarancajiri yonigaajianajana.

41 Cotanquitsi teequeate maasano ironigajianajempariji, naroguentijia yonigaajianajana, naroguentijitarite inintacaaqueca Aapani Irioshi coramani nonquemisantajiaqueri aisa noncamantajiaqueri maasano. Ipochatanajigueti ariquea itsipajijaana noshecatacaavajari aisa nomiracaavajari.

42 Ariqueate itigarancajiaquena nontsavetantajiaquero Iguenquetsatsare Aapani Irioshi noncamantajiaqueri maasano caquinte, aisa noncamantajiaqueri iriotaque inintacaaque Aapani Irioshi incanque coajica quero incojiaquempa maasano, metojajianquitsica aisa tequerataca irimetojajigueji.

43 Maasanotarite tsavetantirinica itsavetanta- jiaqueri icantajigui quericaca quemisantaquerineca Quirishito impeacotajeneri iguempevaere- jia iraventaquemparigueti ivajiroqui.

44 Ogantagatirajagueti iquenquetsati Peerero icoraquepojaque Ishire Aapani Irioshi ichoocashirentajiaopojaqueri maasano quemisantajiavaquerica iquenquetsaquegueti.

45 Irira joriojia quemisantajatsica itsipajiacaca Peerero iponeacagueti Jopequi mana yoajianaque intati, yamenavaqueritarite

itigarancajiaqueri Aapani Irioshi Ishire
ichoocashirentajiapojaqueri teeca iriojia joriojia.

⁴⁶ Iquemajiavaqueri iquenquetsatantajianacarоquea otsipapae quenquetsatsarentsi teeca intsaјiavetempajи aisa ishineventamajajianacari Aapani Irioshi, icantajiguи:

—Yoganejencamajata Irioshimajaca.

⁴⁷ Iquenquetsatanaquequea Peerero icanti:

—Imaicaquea imaica ¿arimpate incantimentajiquerijiriñacajajaquempagueti? Aritarite iquejejiacaji aatimpajia joriojia ichoocashirentajiaca-jigueti Ishire Aapani Irioshi.

⁴⁸ Ariquea yoviñacajatacantimentajiacari ivajiroqui Jesoquirishito.

Ariqueate iriatimpajia icantajiaqueri Peerero inintajiaque inchoocataje aparopae savincaguiteri.

11

*Iquemacojitaravaquerigueti Jerosarequi
iquemisantajiaque teeca iriojia joriojia*

¹ Ariqueate irira itigarancanejia Jesoshi jerijia irapiguemisantarite quintenijiatsica Joreaqui iquemacojiaqueri teeca iriojia joriojia itsavetantimojianaquerigueti Iguenquetsatsare Aapani Irioshi ariqueate iquemisantajiaque.

² Iroompaqueate yoanajigueti Peerero Jerosarequi, icatsimajencajiaqueri irapijorijiate quemisantajijatsica, icantajiguiri:

³ —¿Quero ocotaca poashitantajianacarica teeca iriojia joriojia iriraquea teeca intotsaiquijiquero ichonquimashi pishecatacojiaquitari?

4 Ariqueate yoguisotoanaqueneri Peerero ica-mantaqueri maasano, icantiri:

5 —Iintsija nontsavetantero. Naatimpa nochoocaquegueti Jopequi namanaqueri Aapani Irioshi. Ariquea oquejetimovequena manaca noguimaaca namenavaquero quejetaca iniromago quitsaarentsi oponeapojaca jenoqui inquitequi, yoishojiquero ocaramagopaequi. Ariquea aguijitapojaque naatimpaqui.

6 Namenamajatavaquero namenaguequeri taaca ipajita tetantacaro. Namenaguequeri itehiteitaca canaaguetatsica viratsipae aisa tomirishipaequitica. Itejiacaro aisa soaancaguetatsica aisa araguetatsica.

7 Ariqueate iquenquetsajitanaque, icanquena: ‘Peerero, pincatianaque paaguetavaqueri pime-tojaguetavaqueri pishecatavaquempari.’

8 Cotanquitsi naatimpa nocantavetacari: ‘Nomajirote, aato noshecataritsi, teenicate noshecatempariji icantimentantajitica; tee noshecatempariji covaetantaguetatsica.’

9 Iquenquetsatsijitanaja aisa quenquetsatanquitsica inquitequi icanti: ‘Iriraqueate icantacoqueca Aapani Irioshi: “Cameetsa inaque”, aatoquea pipinquiritsi, aato picanti: “Covaeguishetaca.”’

10 Otsipatapoja iquejetaquena imaica iquenquetsatacaaquaquena, ariqueate opianaja opeana-jaqueate jenoqui inquitequi.

11 Teequeate osamaniteji arejerejeipojaca tsovironaquiqui nomaantaca 3 shirampari ponean-quitsica Sesareaqui itigarancajitaqueca camantaneca.

¹² Ariqueate itigarancaquena Ishire Aapani Irioshi icanti: ‘Pija poguijajianaqueri, aato pitsaroguitsi.’ Arikeate noanaque yoguijaguijaiquenaqueate irira 6 napiguemisantariteni, arikeate narejerejeipojacagueta noquiaquiaipojaque itsovironaquitequi irira cajemacaantaquenaca.

¹³ Iriatimpa icamantajiaavaquenaqueate yonigaacarigueti irashivantite Aapani Irioshi icatiimotapojacari itsovironaquitequi icantiri: ‘Pintigaranqueja oajananquitsineca Jopequi cajemaquierineca Shimo Peerero.

¹⁴ Irioqueate camantajiaquitempine quero pincojiaquempani aviatimpa jerijia maasano pigonorojia cameetsanijite irimeshiajiajempinito Aapani Irioshi.’

¹⁵ Iroompaqueate noquenquetsatacaanaquitatiguiri icoraquepojaque Ishire Aapani Irioshi ichoocashirentajiapojiri iquejetacaajiacajigueta aatimpajia ichoocashirentajiacajigueta iroqueragueta.

¹⁶ Noquenquejapojaquitoqueate icanqueca Amajirote: ‘Irirampani Joanca iviñacajatantaque oja, cotanquitsi inchoocashirentajiapoaquempi Ishire Aapani Irioshi quejetaca iroviñacajatantajitaquemperi Ishire.’

¹⁷ Icavintsajajiaqueritarite Aapani Irioshi iquejetacaajiacaji aatimpajia aquemisantajiguirigueta Amajirote Jesoquirishito. ¿Arimpate noncanqueri Aapani Irioshi aatoniji icavintsajajiguiri?

¹⁸ Iroompaqueate iquemajiaavaquitigui irapiguemisantarijateni iquemisantajianaque, arikeate ishineventajianacari Aapani Irioshi

icantajiguiri:

—Caavijisano icavintsajanti Aapani Irioshi, irootaquequeate icavintsajantajiacarica aisa teeca iriojia joriojia cameetsanijite incantashitatijaianaquempa, aatonijite imetojajitsi, ogantaga incoguitempani.

Quemisantajiatsica Antioquiaqui

19 Oraqueate imetojajitaquerigueti Ishitivano ariqueate omapocanaca yatsipetacaajitacari quemisantajiatsica, ariqueate iporocajianaque ivarajajianaca yoajianaque Penishiaqui, Tsiperequi aisa Antioquiaqui. Iriguentiqueate iquenquetsatimojianaji joriojia icamantajiaqueri quero icota Aapani Irioshi imeshiantigueti.

20 Iconoagarantajiacaqueate porocajianan-quitsica iponeajiaca coramani Tsiperequi aisa Shirenequi. Iroompaqueate yarejejiapojacagueti iriatimpajia Antioquiaqui iquenquetsatacaajiaqueriqueate aisa guiriegojia, itsavetanquero Quenquetsatsarentsi Oganejencatatsica tsavetaquera Amajirote Jesoshi.

21 Iriguentitarite agavejacaqueri Amajirote iquemisantajiaticarica oshequini, yovashi-antajianajiro ishineventajiavetaca, irioqueate iquemisantajianaji Amajirote.

22 Ariqueate iquemacojiaqueri quemisantajiatsica guntenijiatsica Jerosarequi itigarancajiaqueri Verenave ontaniqui Antioquiaqui.

23 Iroompaqueate yarejetapojacagueti inejajiaqueri icavintsajajiaqueri Aapani Irioshi, ishinevaetanaca icantajiguiri:

—Imaica pincoguitempani pinquemisanta-majajiaqueri Amajirote, pinetsanajiaqueroja maasano inintaguequeca. Aatoqueate povashiantajiguirotsi.

²⁴ Irira Verenave caaviji icameetsati ichoocashirentamajataqueri Ishire Aapani Irioshi, aisa caaviji iquemisantamajatiri, irootaquequeate iquemisantantajiacarica oshequini caquinte.

²⁵ Ariqueate yoanaque Verenave Tarisoqui icoaqueri Saoro, inejapoajajiri icantiri:

—Jame Antioquiaqui.

Ariqueate yoayoaitanaque.

²⁶ Ariqueate ichoocajapirojaque aparo ajagantsi, icapiocapinijiaca itsatacaaajaqueri oshequini quemisantajatiatsica. Aritarite oraniqui Antioquiaqui imapocajitaqueri icantajiqueri quemisantajatiatsica “quirishitiano”, ocanti guijatacotirica Quirishito.

²⁷ Oraqueate choocatirajagueti Verenave aisa Saoro Antioquiaqui icoraquejiaque tsavetantajatiatsica iponeponeica Jerosarequi.

²⁸ Chooca aparo icantajitica Agavo. Iriatimpa icatiimojianacariequeate, ariqueate iquenquejacaqueri Ishire Aapani Irioshi icanti irantsipejitaquemparo tasetsi ontsitacaguitejanaquemparo maasano quepatsi. Ariqueate imajirontagueti Caraorio, onetsanatanaca icanqueca Agavo.

²⁹ Iroompa iquenquejajiaquequea quemisantajatiatsica incapiocajiaqueneri imentaquipae cameetsaniji impacaantajiaqueri irapiguemisantariteni guntenijiatsica Joreaqui.

Apaniropae yojocagarantajiaque yashintaji-acaca. Iriraqueate ashintamajajianquitsica irioqueate jocamajajianquitsi. Iriraqueate teeca irashintamajajiguempaji capichajipae yojocajiaque.

³⁰ Ariqueate yojocajiaqueneri Verenave aisa Saoro irajaianaqueneri quempoguijajiguirica irapiguemisantariteni Jerosarequitica.

12

Erorishi icatsimamajajianaqueri quemisantajiatatsica

¹ Ariqueate irira majirontatsica Erorishi* imapocanaquero icatsimamajagarantajiaqueri quemisantajiatsica.

² Imetojacaanqueri Santiago iriguentijeguite Joanca, iroguenti ijitorejantajitacari cotsiro.

³ Ariquea iriatimpa itsanirotaque ishineventamajajiacari joriojia, yaacaanqueriqueate Peerero aisa. Iro yaacaantantacarica savincaguiteripae ishecatantajitaroca pan teeca onconoguemparoji anempoantaca.

⁴ Yoguijacaantaqueri santanaqui, itigarancijaque 16 coaretajia amenajiaquerineca. Ijivetaca avisanaquegueti Paashicoa iramacantaqueri icapiocajiacagueti maasano incatsimatimentajiquerinijite.

⁵ Ariqueate yoguisantajiaqueri santanaqui, cotanquitsi iriraqueate quemisantajiatsica

* **12:1** Iriratica **Erorishi** irio icantajitica Erorishi Aguiripa I, irio ishaine iriquetica Erorishini majirontanquitsica ivoaquegueti Jessoji (Mt. 2.1).

igantaga yamanajiaqueri Aapani Irioshi
yamanacoventajaqueri Peerero.

⁶ Apanivani tsiteniri intsitenitacotanaje,
ariqueate osavincaguitetanaquegueti ira-
macaantaquerimequeate Erorishi. Imaanaque
Peerero, niganqui yoajiavetacari mavite coareta,
ishiticacotantajiavecari mavite cavorejatsari
ijempequiqui. Iriraqueate itsipapae coareta
iticaajiavetaca sotomorontsiqui.

⁷ Ari imapocapojaca irashivantite Amajirote,
otsirencanaca intsompogui santanaqui.
Iriraqueate ashivanti ichagatapojaqueri Peerero
imerequiqui, itinajaqueri, icantiri:

—Pintinajanaque taampina.

Ariqueate mana oishorejaguetanaca cavorejat-
saripae ishiticantajivetacarica.

⁸ Ariquea icanneri ashivanti:

—Pinchompimashitacotanajempa, pincavigui-
titanajempa.

Iroompaqueate yagacaguetai, icantsitariqueate
aisa ashivanti:

—Pampinaicanajemparo pimorenatsite
quitsaarentsi, caacate poguijatanaquena.

⁹ Icatianaca yoguijatanaqueri, cotanquitsi tee
intsateji arimajaca yaanajiri irashivantite Aapani
Irioshi, mana oquejetimotacari yoguimagaguetai.

¹⁰ Iroompaqueate isotoanajiguetai iriqueti
yavisajianaque coaretapae amenajiavecarica
isantanatacojiguetaica, ariqueate iquejejianaqueri
choocajianquitsica ontaniqui. Ariquea
yarejetapojacaro otsipa sotomorontsi yashitan-
tajitacaca cavorejamentari agasotoncacaguetai
quenavoquirontsiqui ochoocaguetaqueguetai

tsovironaqipae. Ariqueate mana inchiquiojitsataqueate ashirejashitanaca. Isotosotoitanaque yoajianaque yagatejiaquerogueti otsipapoqui, ariqueate ipeapitsatajari ashivanti.

¹¹ Iriraqueate Peerero isavigarejacotanajigueti icanti:

—Iroosacanicate arimajasacanicate itigarancaquenari Aapani Irioshi irashivantite, yoguisotojaana aatonijite imetojacaantana Erorishi, aisa aatonijite yatsipetacaajianatsi napijoriojateni.

¹² Arikea yamenamajavetanajagueti teequeate inchoocatajeji santanaqui, yoanaji otsovironaquitequi Maria iriniro Joanca pajitatsica aisa Maricoshi. Arikeate ichoocajiaque oraniqui irapiguemisantarijijateni icapiocajiacaca yamanajiaqueri Aapani Irioshi.

¹³ Itinquiapojaqueroqueate ashitacomentonsti, arikea ocoraqueque aajanirentsi icantajitica Irore amenaquitiri taaca ipajita.

¹⁴ Arikeate oquemapojaqueri iriguenti quenquetsatanquitsi Peerero oshinetanacaqueate, cotanquitsi teequeate ashirejacoteriji, mana opianaca intati oshianacaqueate ocamantajiaqueri chooca Peerero sotsiqui.

¹⁵ Iriatimpajia icantajiguiro:

—Mana pishoncacotaca intati.

Cotanquitsi ocanti iroatimpa:

—Arimaja.

Iriatimpajiaqueate icantajiguiro:

—Iroosacanicate, iriocajate irashivantite Aapani Irioshi quempoguijirica.

16 Cotanquitsi iriatimpa arimpaqueate itinquianaquero ashitacomentonpsi. Iroompaqueate yashirejacojiavecarigueti yamenajiguiri iriguenti Peerero, mana yoajianaque intati.

17 Iriatimpa icantiri vacoc cameetsanijite irimajerejianaquenijite. Ariqueate icamantajiaqueri quero icotajirini yoguisotojairigueti Aapani Irioshi santanaqui. Aisa icantajiguiri:

—Pincamantajigueri Santiago,[†] jerijia maasano atsipajiacapiguemisantarijiate.

Ariqueate yoanaque Peerero otsipaqui tsovironaqui.

18 Iroompaqueate osavincaguitetanajigueti itinajajavetanajagueti coaretajia yamenavetari cajaraguiteni Peerero. Itsaroajianaque icantava-cajianaqueate:

—¿Querocate yoanaqueni?

19 Iriraqueate Erorishi itigarancajiaqueri itsipa coaretajia incojajaquiteri, cotanquitsi yamenajavepojari cajaraguiteni. Ariqueate icoacojaqueri quempoguijajavetacarica, ariqueate imetojacaantajiaqueri. Ariqueate yojocanajiro Erorishi Jorea, yoanaque Sesareaqui, ariquea iguinentitaja ontaniqui.

Imetojaquegueti Erorishi

20 Irira Erorishi icatsimajiaqueri guntenijatsica Tiroqui aisa Shironequi, teequea capichaji

[†] **12:17 Santiago.** Iricatica Santiago, tee irio iriguentijeguite Joanca imetojacaantajaquea Erorishi (otsapa 2), iricatica iriguento iriguentijeguite Jesoshi (Mt. 13.55; Jn. 7.3-5; Ya. 1.14). Irioquea amenaqueca imaica jivaquerica quemisantajatsica Jerosarequi (Ya. 15.13; 21.18; Ga. 1.19; 2.9). Irio tioncaqueroca paperi icantajitica **Santiago**.

incatsimajigueriji, cotanquitsi iriatimpajia iquemavacaajiaca iroajianaque irogameetsajiajateri, iriotarite majirontatsica oponeacagueti isheca. Iriqueti yoguishinejajapojaque iramajirore icantajitica Verashito cameetsanijite irionijite amitacojiaquerine cantajiaquerineca inintaque irogameetsajiajeri.

²¹ Ariquea irira Erorishi icajemacaantajiaqueri querocaca savincaguiteri incoraquejiaque irogameetsantavacaajiajempaqueate. Ariquea aapojaca incoraquetantajiaquempaca iquitsaanacaqueate Erorishi iiitsaare iquitsaatapinicaca icapiocajiaqueta. Ariqueate icoraquejiaque isavicaque iriatimpa isavicampiniquegueti iquenquetsatapiniquegueti, ariqueate iquenquetsatacaaajiaqueri.

²² Ariqueate iquemajiaqueri capiocajianquitsica icajemajianaquequeate ishineventajianacari icantajiguiri:

—Irinta quenquetsatanquitsica teenicate irio caquinte, iriguenti irioshitatsica.

²³ Iroompaqueate iquemavaquitigui Erorishi yaventacomajatatiganimaja tee incantamajateji cameetsa, tee incanteji: “Naroguenti caquinte, choocatarite apaniro Irioshimajaca agavejamajatatsica.” Iroompaqueate iquejetanaquerogueti imaica icoraquetapojaque irashivantite Amajirote yashinoncajacaanacari. Ariqueate iquenaque yashinoncajanaca iquenitanaqueriqueate quenitsi, ariquea imetojanaque.

²⁴ Oraqueate Iguenquetsatsare Aapani Irioshi arimpaqueate ovarajacovaetanacani

otsitacaguitejacovaetanaca
itsavetantajitanaquero.

maasano,

²⁵ Iriraqueate Verenave jeri Saoro iteroncaquerogueti icoraquetashitaqueca Jerosarequi ipijianaja Antioquiaqui itsipajianacari Joanca Mari-coshi.

13

Yoajianaquegueti Verenave aisa Saoro intsavetantajigueri Amajirote Jesoshi

¹ Irira quemisantajiatsica guntenijiatsica Antioquiaqui iconoagarantajiaca iriguenti tsavetantajiguiroca icanquerica Aapani Irioshi, itsipa iriguenti tsatacaantiroca Iguenquetsatsare Aapani Irioshi. Jeri irica: Verenave, Shimeone (icantajitica Quisaari), Iroshio Shirenequitica, Saoro, jeri Manaene (itsipataca majirontatsica Erorishi* iquenquevarijiguigueti).

² Ariqueate icapiocajiacar iriatimpajia yovashianquitiro isheca, iriguenti isavicaventajiaque it-saroventajigari Amajirote. Ariqueate icantajiguri Ishire Aapani Irioshi:

—Poashitenari Verenave jeri aisa Saoro irisavivacentenaroniji nocajemimentajiaquerica.

³ Iroompaqueate yovashianquitirogueti isheca, yamanajiaquerigueti Amajirote, ipamijiaqueriqueate Verenave jeri Saoro icantajavaqueri:

—Pija imaica.

* **13:1** Iriratica **Erorishi** irio icantajitica Erorishi Antipashi; pamenero tioncanquitsica isavivanaqui otsapaqui Irc. 3.1.

4 Ariqueate itigarancajiaqueri Ishire Aapani Irioshi yoajianaque ontaniqui Sereoshiaqui quentijaqui. Itehiteitanaca yaacojianaqueri tampija yoajianaque inirovogorequi icantajitica Tspere.

5 Iroompaqueate yarejerejeipojacagueti yagatacojiapojaque quinteninintsiqui icantajitica Saramina, yoajianaque shinagogapaequi icapiocantapinijiacaca joriopae itsavetantajianaquero Iguenquetsatsare Aapani Irioshi. Itsipatanacariequeate aisa Joanca[†] yamitacojiaqueri.

6 Arikeate itsavetantajianaquero itsitacaguitejajianacaro quinteninintspae ontaniqui Tsperequi, iroompa yarejejiaca Paposhiqui. Arikeate inejajiapojaqueri amataatsica aventaroca iragavejane ampatsini, icantamampeaca: “Jero icanquenaca Aapani Irioshi.” Iriatimpa iriguenti jorio icantajitica Varejesoshi, ipajijitajiri aisa Erimashi.

7 Iriguenti itsipataca majirontatsica Sergio Pavoro, caaviji itsamajati. Irira Sergio Pavoro ininquetarite inquemisanquero Iguenquetsatsare Aapani Irioshi icajemacaantantajiacarica Verenave, Saoro cameetsanijite intsatacaaajaqueri.

8 Cotanquitsi Erimashi, irira aventaroca iragavejane ampatsini (irootaquetari oncanque ivajiro oguipitsoquerogueti), iticaticatacovetavacariequeate yaacanatantajiavetavacarica aatonijite iquemisantajiguiritsi majirontatsica.

9 Iriraqueate Saoro (pajitatsica aisa Paavoro)

[†] **13:5 Joanca.** Irioquea icantajitica Joanca Maricoshi, mavitetatsica ivajiro. (Pamenero 12.12, 25; 13.13; 15.37-38.) Iriguenti ijitanne Verenave (Cor. 4.10).

ichoocashirentamajatanaqueri Ishire Aapani Irioshi, ariquea yamenanaqueri intati sorere,

10 icantiriqueate:

—Aviguenti amatavijantatsica guijatacotirica ampatsini pantaguishetantacaroca covaeguisherentsi, manaquea pimanintaquero maasano iroomajatatsica. Ogantaga pogaaquero itsatacaantaqueca Amajirote. ¿Aatompa povashiantiro pantanaqueca?

11 Imaicaqueate incatsimatinenquempiro Aapani Irioshi, pishamponcajatanaquequeate. Osamanitanaque aatoqueate pamenajitsi, ompitsequimotaquitempiqueate.

Ariqueate taampinaqueate opitsecacotanaqueri, teequeate iramenajeji. Ipamipamiguite-tanaquequeate intati, ininquequeate quericampa acatsatanajerineca.

12 Ariqueate yamenavaquerigueti Sergio Pavoro iquemisanqueri Quirishito, manaquea yoanaque intati iquemaquegueti itsatacaantajiaqueca itsavetanquerigueti Amajirote.

Yoajianaquegueti Paavoro aisa Verenave Antioquiaqui choocatantacaroca Pishiria

13 Iriraquea Paavoro aisa itsipajiacaca itejianaca Paposhiqui, iquenajatacojianaque yoajianaque Perejequi choocatatsica Pampiriaqui. Irirampani Joanca ipiapitsatanajari yoanaji Jerosarequi.

14 Iriatimpajia yarejetapojacaguetai Perejequi, yavisanaque aisa yoajianaque ontaniqui otsipaqui Antioquiaqui, ora Pishiriaquitica. Ariqueate aapojacaguetai

saavaro imagorejantajitaca iquijaquijaitanaque shinagogaqui icapiocantajiacá joriojia, isavicajiapojaqueate.

¹⁵ Ariqueate iteroncajitaquerogueti yapat-sajavantajitaquerogueti itioncacotanaqueca Moishishini aisa itioncacojianaqueca tsavetantajiguirica Aapani Irioshi, iriraqueate jivajianquitsica shinagogaqui icapiocantapini-jiacaca icamantacaantajiaqueri Paavoro jeri Verenave icampojaqueri:

—Napijorijiateni, choocaguetti pintajia-queca pincamantajiaquena cameetsanijite pintampishitacaimentajiaquenanijite, iiintsija pincamantajiguena.

¹⁶ Icatianacaqueate Paavoro icanqueri vacoc cameetsanijite irimajerejianaque, icantajiguiri: “Pinquemisantajavaquenaja shiramparijia ishi-raerijia, aisa maasano itsipajia pincatsajiguirica Aapani Irioshi.

¹⁷ Coramani Irioshite ishiraerijia icoguiajiaque-riquea avaesatiniteni, yoshequiamajatanaqueri iguintenijiavetacaguetti Ejepitoqui. Iroompa yonigaaquiaqueri itampishica, yaajianajiri.

¹⁸ Yatsiperejacojiacarieate Aapani Irioshi ovegarataca 40 ajagantsi ichoocajiaquegueti oquitamampororoipojaquegueti.

¹⁹ Ariqueate yamitacojiaqueri yagavejacaajia-queri iteroncajiaqueri oshequini guintenijiatsica Canaanequi, yaapitsajiaqueri iguepatsite, irio-queate yojocajiajini avaesatinijiateni. Iriraqueate caquinteguetatsica teroncajianquitsica ovegarajia-aca iguenquetsatsarepae 7.

20 Ariquea ocaratapojaque 450 ajagantsini maasano ocatica.

“Iroompá icanque Aapaní Irioshi inchoocataque joese comajamajajiaquerineca. Ariquea imetojavetaca, cotanquitsi choocaqueate piaguetajarica irosati aapojacaguetti ichoocaquegueti Samoirini irira tsavetantirinica Aapaní Irioshi. Irioqueate carapojaqueroca.

21 Iroompá iriatimpajia icantajiaqueri Aapaní Irioshi inintajiaque inchoocataque imajirojiate. Ariquea Aapaní Irioshi iquemisantajiaqueri ipeacaantacarica imajirote Saoroni irijaniteni Quishini ichoviquini Vejamineni. Ariquea imajirontaca 40 ajagantsi.

22 Iroompá Aapaní Irioshi yovashiantajiri Saoroni, irioqueate ipeacaaja imajirojiate Taavini irijaniteni Isaini. Ariqueate icamantacoqueri icanti: ‘Namenqueriquea Taavi irijanite Isai, noshineventamajatacari, irantaguequeroquea iriguenti maasano noninqueca.’

23 Imaica inetsanataquero Aapaní Irioshi icanqueca coramani, itigarancaqueriquea acaniqui Ishiraeriqui irira Aantavanquitsica ichoviquiqueca Taavini, irioquea Jesoshi.

24 Tequerataguetti incoraquete Jesoshi intsavetante, iriqueti parianacaro Joanca itsavetantaque icantajianaqueri maasano ishiraerijia incantashitatijaianaquempa irovashiantajianaquero yantajiguiroguetti teeca oncameetsateji iriviñacajatacantajianaquempa.

25 Ariqueate pajiniguetti interonquero Joanca yantaqueca icantanaque: ‘¿Taa pijiquenaji? Tee naroguenti, irioquea impoitapojenanea.

Iriatimpa caaviji yanaaqueña, aatotarite noquempejitaritsiquea iriatimpa nompeaque-mpame amiquerineca noishorejacoquerime igaviguitire.'

²⁶ "Imaica nonintaque noncamantaji-aquempiqueate aviatimpajia nogonorojia ichoviquijanaqueca Averaameni, aisa aviatimpajia teeca pijorijoigueji pincatsajiguirica Aapani Irioshi, aroguenti itigarancacajiro ocatica Quenquetsatsarentsi iraantavajajica.

²⁷ Maasano guitenijiatsica Jerosarequi, aisa imajirojiate teenicate intsajiguenericate iroguenti icoraquetashitaque Jesoshi irimeshiajiajaji, teenicate inquemeroji itioncacotaqueca tsavetantirinica Aapani Irioshi yapatsajavantapinijiavetacarogueti savincaguiteri imagorejantajitaca. Cotanquitsiqueate imetojacaantajiaquerigueti onetsanatanaca itioncacojiquerogueti.

²⁸ Teequeate onchoocavetempaji onquenan-tapojempaca irimetojimentantajitaquemparica, cotanquitsiqueate arimpaqueate icantajiana-queri Pirato: 'Pimetojacaanterishinete.'

²⁹ Iroompa inetsanajiaquerogueti maasano itioncacojitaquerica, imetojaquegueti ariqueate yogaguijitacojiqueri coroshipu, yoguijaajitaquitiri omoroqui.

³⁰ Imetojamajavetaca, cotanquitsi Aapani Irioshi ivochantajiri.

³¹ Ariqueate ovegaratanaca oshequi savincaguiteri yonigaaguetajari oguijajianaquerica iponeacaguetti Garireaqui yoanaquegueti Jerosarequi. Iriojiatarite imaica

tsavetantajajirica icamantajiaqueri caquinte.

³² “Imaica nocamantajiaquempiro aviatimpajia oguishinejantatsica: oratica icantajiaquerica Aapani Irioshi avaesatinijiate,

³³ inetsanacajiroquea aatimpajia ichoviquijianaqueca, yovochantajiritarite Jesoshi. Iriotaque itioncacojique Saremoqui 2 icanquegueti Aapani Irioshi:

‘Aviatimpa aviguenti Irijani,
ocatica savincaguiteri aviro nashimajaca nirijante.’

³⁴ Icanquetarite Aapani Irioshi coramani irovochantajeri Jesoshi aatonijite avejancatsi itsino. Aritarite ocanque itioncacojiqueca ocanti:
‘Aviatimpajia nonetsanaquempiro maasano no-canquerica Taavini.’

³⁵ Aisa itioncacojiquero otsipaqui [Saremo] ocanti:

‘Aato pishinetiro avejanquempa itsino Pigomajamajare.’

³⁶ Iriraqueate Taavini yamitacojiaqueri igonorojia coramani, yagaqueneri maasano inintacaaquerica Aapani Irioshi, cotanquitsi coajica imetojanaquegueti iquitajitajatiguiri itsipajijaari avaesatinijiate, ariquea yavejancanacaqueate.

³⁷ Cotanquitsiqueate iriraticaquea ivochantajica Aapani Irioshi teequeate iravejanquimateempaji.

³⁸ Irootaquequea, nogonorojia, nonintantacaca pintsamajajiaque iriraquea Jesoshi, iriguenti agavejatsi irishejiajajiro aguempevaerejia, irootaque notsavetantimojiaquempi.

39 Ora itioncacotaqueca Moishishini teenicate agavejeji ogameetsajiajeri iriraqueate oguijataco-jiaqueroca, teequeate omeshiajigueriji. Cotan-quitsi irira aventajigarica Jesoshi irimeshiajiajeri irogameetsantajiajeri.

40 Shoshoh, inchiquiojitaja piquejejigaritsi irirajia icantacojiaqueca Aapani Irioshi itioncacaaque-rigueti tsavetantajiguirica icanti:

41 ‘Pamenajigue aviatimpajia shirontimentantat-sica,
mana poajianaque intati, pimpeajiaquempaquea maasano,
irooriji choocatirajampigueti nantaquequea oa-caantantatsica intati,
cotanquitsiquea oratica nantaqueca aato piquemisantajiguiro
inchoocajiavequempagueti camantajiave-quempineca.’”

42 Iroompaqueate isotosotoitanajigueti shingogaqui, irirajia quemisantajiaquerica icantajia-avaqueri:

—Pimpiajeja pinquenquetsatacabajena aapo-jajempagueti otsipa saavaro imagorejantajitaca, pinquenquetsatacatajero ocatica.

43 Iroompaqueate icatiajianaja Paavoro jeri Verenave yoguijaguijaitanaqueri oshequini joriojia, jerijia teeca iriojia joriojia guijatacojiguiroca itioncacotanaqueca Moishishini. Arikea icantajiaqueri ogantagaja inquemisantamajajiaqueri Jesoshi.

44 Arikeate aapojajagueti saavaro imagorejantajitaca icapiocajianajaqueate oshequini caquinte, icoraquetashijiaqueri

Paavoro jeri Verenave iquemisantajiaqueri itsavetantajiaquerogueti Iguenquetsatsare Amajirote. Tee iroshequigueji irira teeca incoraquejigueji.

45 Cotanquitsi irira joriojia iroompaqueate yamenajjavaquerigueti icapiocaventajianacari ocanquitiri shirec icatsimajianaquequeate. Ariqueate inijashijianacari Paavoro icantajiguiri maasano:

—Aatoqueate piquemisantajiguiritsi, mana yamatavijajiaquempi intati.

46 Irira Paavoro jeri Verenave tee intsaroajigueji arimpaqueate iquenquetsajianaque icantajiguiri:

—Avquietitarite nocoraquetashijiavetaca iroaqueragueti nontsatacaaajiaquempirome Iguenquetsatsare Aapani Irioshi, aviguentitarite joriojia, cotanquitsi teequeate pishineventajjavaquemparoji, teecampa pinintajigueji pincoguitempani panijajaje. Imaicaqueate iriguenti noashijianaje nontsatacaaajiaqueri teeca iriojia joriojia.

47 Irootarite icantajiaquenaca Nomajirote, icanti:

‘Nopeacaaquempi tsivotacojiguirica caquin-teguetatsica,
cameetsanijite pintsatacaaajiaqueri quero nocotaca nomeshiantigueti,
pintsitacaguitejanaquemparo maasano quepatsi
ovegaraguetapojacaguetti.’

48 Iroompaqueate iquemajjavaquitiguiiri teeca iriojia joriojia ishinejianaca icantajianaque:

—Oganejencamajata Iguenquetsatsare Amajirote.

Ariqueate iquemisantajiaque maasano intantacajiaqueca Aapani Irioshi coramani incoguitempani inconoajiaquempari jenoqui inquitequi.

⁴⁹ Arimpaqueate ovarajacotanacari Quenquetsatsarentsi tsavetantaquerica Amajirote iquemajiaquero maasano quintenijiatsica oraniqui.

⁵⁰ Cotanquitsiqueate irirajia joriojia iquenquetsatacaaquiaqueriqueate imajirojiate Antioquiaquitica jerojia manquigarentsijia anaantaguetatsica ora caavijica oquemisantamajaiavetari Aapani Irioshi, inijashijiacari Paavoro aisa Verenave. Arikea iroompaqueate iquemajavaquitigui iriatimpajia icatsimajiaqueri Paavoro aisa Verenave itigarancajajiri aatoniji ichoocataji iguinteniqui.

⁵¹ Iriatimpajia ipanerejamajajianajiroqueate quepatsivane yagaticacojiaquerica cameetsanijite iroonijite iramenantajiaquemparigueti intsajiaqueri aato ipiajatsi, teenica irinintajigueji inquemisante. Aritaquequeate yoajianaque Iconioqui.

⁵² Cotanquitsi iriraqueate quemisantajijatsica Antioquiaquitica ishinejianacaqueate, ichoocashirentamajajianaqueri Ishire Aapani Irioshi.

14

Paavoro jeri Verenave ichoocajiaque Iconioqui

¹ Arikeate yarejejiapojaca Iconioqui iquijajapoaquequeate shinagogaqui icapiocantajiacajoriojia iquenquetsajiaque. Iquemisantagarantajiaque oshequini joriojia jerijia aisa teeca iriojia joriojia.

² Cotanquitsi irira joriojia teeca irinintajigueji inquemisantajigueji iquenquetsatacaa jiaqueri teeca iriojia joriojia yagavejajiana queri, irootaquequeate itsititantajianacaca icatsima-jiana queri quemisantajiatsica.

³ Cotanquitsiqueate Paavoro, Verenave teequeate intsaroajigueji arimpaqueate itsavetantajiana queri Amajirote. Osamani ichoocajiana queni itsatacaantajiana que. Iriguentitarite agavejaca queri Aapani Irioshi yantantajiacaca teeca irinejajiteji cameetsanijite iramenimentajia querinijite iriguenti tigaranca queri Aapani Irioshi.

⁴ Cotanquitsi irira queate guntenijiatsica Iconioqui teequeate inquemavacaajianajempaji. Iconoagarantajiacaqueate iriguentijia ishineventajiacarica joriojia. Choocaquea aisa shineventajiacarica itigarancanejia Jesoshi.

⁵ Ariqueate irira joriojia jerijia teeca irijorijoigueji iquemavacaajiacaca itsipajiacari imajirojiate icantajiguiri:

—Jameshiatsi ancatsimajigueri antsina-cajigueri.

⁶ Iroompaqueate iquemaco jiaquerigueti ishiashia itanaca yoajiana que Irishitiraqui aisa Terevequi choocague tatsica Iricaonia qui, jero aisa ovegaragueta pojacagueta Iricaonia,

⁷ itsavetantajiana queri Quenquetsatsarentsi Oganejencatatsica.

⁸ Ontaniquiqueate Irishitiraqui inejajia poja-queri savica que irira magoviroshiri ogantaga ivoaco queri iroaqe raguesti imagoviroshica.

9 Iriatimpa iquemisantamajatavaqueri Paavoro iquenquetsataquegueti. Iroompaqueate yamenaquerigueti Paavoro yamenamajatanaqueri itsantacarica arimaja itsataque iragavejaque Aapani Irioshi irogueshitajeri.

10 Icajemicotsitariqueate:

—¡Pincatiamajatanajeja!

Icatianacaqueate catic yanijitanaji.

11 Irirajiaqueate capiocajianquitsica yamenajiaavaquerigueti yogatiajiri Paavoro ican-tajianaque inirojencani iguenquetsatsarejiaqui Iricaoniaquitica icantajigui:

—Yaguijijiapojaque irioshijia, caquintejiapojaque.

12 Irira Verenave icantajiaque iriguenti Seoshi,* iriraquea Paavoro icantajiaque iriguenti Eremeshi, iriguentitarite quenquetsamajatan-quitsica.

13 Oraqueate teemporo itsaroventantajitarica Seoshi ochoocaque ovegaraguetapojacaguetai otantotacaguetai Irishitira. Iriraqueate saserorote quempoguijiroca teemporo yamacaaantajiaque-queate caapironcaaripae iconconatacaaguecaro ochotentegapae itsipajiaopojacari oshequini caquinte. Inintajavetaca irijitorejajiaquenerime caapironcaaripae, irojocaquequenerime Verenave jeri Paavoro.

* **14:12 Seoshi** (Zeus) aisa **Eremeshi** (Hermes) iroguenti ivajiropae irioshivijirentsipae itsaroventajiacaca guiriegojia. Irira Iromauquitica ipajitaqueri Seoshi **Júpiter**, ipajitaqueri Eremeshi **Mercurio**. Icantajiaque irira Seoshi iriguenti irioshi anaantamajatatsica, irira Eremeshi icantajiaque iriguenti itigarancane irioshipae, itsavetacotaquero icantajiaquerica.

14 Cotanquitsiquea i quemajiava quegueti Verenave jeri Paavoro itigarancanejia Jesoshi, iperejaco jianaca i itsaare ira menimentajaque-rinijite teequeate irinintajigueji intsaroventajia-quempari, teequeate irinintajigueji irijijiaqueri iriguenti irioshi. Ishiashijianacariqueate icapiocajiacaguetai icajemajianaque icantajigui:

15 —Aato piquejejiguiro imaica. Aato pitsaroventajigana. Naatimpajia ariquetae noquejejiaquempi aviatimpajia, caquintetarite nonajiaque. Iroguenti nocoraquetashijiaque noncamantajiguempi povashiantajianajeronijite pishineventashijiacaca intati, irionijite pinquemisantajiaje Irishimajaca peacaague-tacaroca inquite, quepatsi, quentija aisa maasano choocatantaguecaroca.

16 Coramani Aapani Irioshi yovashiantajiavecari maasano caquinteguetatsica manaqueate ichoocatashijiajaquea intati yantajiavetaca taaca opajitapae inintajiaqueca.

17 Cotanquitsiqueate teequeate impeacomajajiguempariji irosati imaica teequea impeacojiaji aatimpajia, ogantagaqueate icavintsajajiaji cameetsanijite antsajiaquenijite chooca iriatimpa. Itejajiro incani aisa yoguimoncague-tajiro panquirentsipae ochoocatantajaca ashecajiacaca ashinetantajiacaca. Iriguentiqueate pintsaroventajiguempa.

18 Iquejejiavecariquetae imaica teequeate inquemajigueji, querocampate incojiaquerini, arimpaqueate inintajiavetanacaqueate irijitorejajiaquenerime caapironcaari, irojocajiaquenerime.

19 Ariqueate yarejerejeipojaca joriojia Antioquiaquitica jerijia Iconioquitica iquenquetsatacaa jia poja queri maasano ican-tajia queri incatsimajia queri, irootaque queate yaantajiancarica Paavoro ipishoncashijia queri mapi taan, taan, itsinatsinajia queri. Ariqueate ijijia queri ji metojamajatana que inoshicajiana queri yaajiana queri ipishoncajiaquitiri ovegaraguetapojacagueta tsovironaquipae.

20 Cotanquitsi ariqueate icapiocaventaji-apojacari irapiguemisantariteni itinajanaja icatianaca yoanaji Irishitiraqui. Osavincaguite-tanajigueti itsipatanajari Verenave yoajiana que Terevequi

21 itsavetantajiana quero Quenquetsatsarentsi Oganejencatatsica. Iquemisantajia que oshequini. Ariqueate iteroncajiana jirogueti ipiapaitanaja Irishitiraqui, Iconioqui aisa Antioquia qui.

22 Itampishitacajaianajiri maasano quemisan-tajatsica icantajianajiri:

—Pincoguitempani pinquemisantamaja-jiana que, aato povashiantajiguirotsi piquemisan-tajia que ca. Aritarite antsipejia quempa oshequi anquijantana quempaca imajirontague ti Aapani Irioshi.

23 Ariqueate yaagarantajia queri cameetsanijite inquempoguijajiajjeri quemisantajatsica capio-capinijiatsica. Yamanajia queri Aapani Irioshi, yoguipaquijajiaquitiro isheca teequeate irisheca-jiguempaji, ariqueate icantajianajiri:

—Inquempoguijajajempi Aapani Irioshi piquemisantajia que ca.

²⁴ Ariqueate yoajianaque Paavoro jeri Verenave iquenajianaque queate Pishiriaqui yarejerejeivaetaca Pampiriaqui.

²⁵ Itsavetantajianaquero Iguenquetsatsare Aapani Irioshi Perejequi, ariquea yoajianaque Atariaqui.

²⁶ Ariquea itejianaja yoacojianaji Antioquiaqui. Ariqueate oraniqui itigarancajitaqueri iroaqueragueti, icantajitiri Aapani Irioshi: "Jeri irica pincavintsajajiaqueri irinetsanajiaquempiroguedi taaca opajitapae pinintacaajiaquerica." Ariqueate inetsanajiaquero.

²⁷ Imaica yarejetapoajagueti icajemajiaqueriqueate maasano quemisantajatsica icamantajiapojaqueriqueate maasano yagavejacaamerica Aapani Irioshi aisa icamantajiaqueri icavintsajajiaquerigueti Aapani Irioshi teeca iriojia joriojia cameetsanijite inquemisantimentajiaquenijite iriatimpajia.

²⁸ Ariqueate osamani ichoocajiaque ontaniqui itsipajiacari irapiguemisantarijijateni.

15

Icapiocajiac Jerosarequi iquenquetsatacojiaquero itioncacotanaqueca Moishishini

¹ Choocatirajagueti Paavoro aisa Verenave Antioquiaqui icoraquejiaque joriojia poneponeitanquitsica Joreaqui itsatacaajiaqueri quemisantajatsica icantajiguiri:

—Pinetsanajiaquero itioncacotanaqueca Moishishini, pintotsaiquitacaantajiguero

pichonquimashi. Aatogueti pitotsaiquijiguiro aato imeshiguimpitsi Aapani Irioshi.

2-3 Cotanquitsi iriraqueate Paavoro aisa Verenave icantimentajavaqueri. Arim-paqueate ipigatsatavacaajianaca teenicate inquemavacaajiguempaji. Irootaquequeate itigarancantajiacarica Paavoro aisa Verenave, jerijia itsipa quemisantajiatsica icantajiaqueri:

—Poajianaque Jerosarequi pincoacojiaquiteri querocaca incantajigue itigarancanejia Jesoshi jerijia quempoguijajigurica quemisantajiatsica.

Itigarancajiaqueri, ariqueate yoajianaque ique-naquenaitanaque Penishiaqui aisa Samariaqui icamantaguetapojaqueri:

—Imaica iquemisantajiaque oshequi teeca irio-joria joriojia.

Iroompaqueate iquemacojiaavaquerigueti maasano quemisantajiatsica ishinejianacaque-ate.

4 Arikeate yarejerejeipojacaguetai Jerosarequi yamenajiavaquerigueti quemisantajiatsica ishinejianacaqueate. Aritarite ichooocajiaque itigarancanejia Jesoshi jerijia quempoguijajigurica quemisantajiatsica. Icamantajiapojaqueri maasano yantaguetaqueca Aapani Irioshi yamitacojiaquerigueti itsavetantajiaquerigueti.

5 Cotanquitsi ariqueate iconoajiacari pariseojia quemisantajiaquerica Quirishito icatintiitanacaqueate icantajiguiri:

—Intotsaiquitacaantajiaquereroqueate ichonquimashijia quemisantajiatsica teeca iriojia joriojia, aisa irinetsanajiaquero maasano itioncacotanaqueca Moishishini.

6 Ariqueate icapiocajiac a itigarancanejia Jesoshi jerijia quempoguijajiguirica quemisan-tajatsica inquenquetsatavacaajiaquempa inquemavacaajiaquempa.

7 Osamaniqueate isavicaventajiaquero iquen-quetsatavacaajiac a. Ariqueate icatianaca Peerero icanti:

—Napiguemisantarijiate ni, aviatimpajia pitsajiaqueta rite icogui aquena Aapani Irioshi coramani, pinejaco jiaquenatarite. Ariqueate itigarancaquena nontsavetanquero Quenquetsatsarentsi Oganejencatatsica, nonquenquetsatacaajiaqueriqueate teeca iriojia joriojia cameetsanijite inquemajiavaquerogueti inquemisantajiaqueri Jeso quirishito.

8 Ariqueate irira Aapani Irioshi amenashirenta-jiguirica maasano caquinte itigarancajiaqueneri Ishire teeca iriojia joriojia iquejetacaajiac aji aatimpajia cameetsanijite antsamajajiaquenijite ishineventajiacari iriatimpajia aisa.

9 Ipintsajiacari iquejetacaajiac aji aatimpajia, inquemisantajiaqueritarite ari queate imeshiajiaqueri ipeacotsijiajari iguempevaerejia.

10 Imaica ¿arimpate pamenantempari Aapani Irioshi? ¿Arimpate pijiqueji teeji intsateji? Picantavetacaritarite teeca iriojia joriojia aatogueti inetsanajigiro itioncacotanaqueca Moishishini aato imeshiajiguiri Aapani Irioshi. Aroguenti jorio amejia vetaro, cotanquitsi tee agavejajigueji anetsanamajajiaquero, aisa maasano avaesatinijiate tee iragavejajigueroji. ¿Quero incojiaquempa itsipapae caquinte irinetsanatantajiaquemparoca?

11 Cotanquitsi imaica atsajiaque mana icavintsajajacaji intati Amajirote Jesoshi yaantajiava-jica aatoniji apegas. Ari iquejajiaqueri iriatimpajia aisa teeca irijorijoigueji, mana icavintsajajiaqueri intati.

12 Iroompaqueate yagatanaquitigui Peerero, imajerejianaque maasano iquemisantajia-vaqueri Verenave jeri Paavoro itsavetanta-jiaqueroqueate maasano yantajiaqueca yagavejacaajiaquerigueti Aapani Irionshi iquenquetsatacaaajiaquitirigueti teeca iriojia joriojia, yantajiaque oacaantantatsica intati intsatimentajiguenijite iriatimpajia irio tigarancaqueri Aapani Irionshi.

13 Ariqueate iteroncajianaquerogueti itsavetanta-jiaqueca, irio quenquetsatananquitsi Santiago, icanti:

—Pinquemisantajiaquena aviatimpajia napiguemisantarijijateni.

14 Imaica icamantajiacaji Shimo* quero ocotacani iroaqueragueta imapocaquerogueti Aapani Irionshi icavintsajajiaqueri itsipapae caquinte teeca irijorijoigueji, manatarite inintacaaqueri inquemisantajiaqueri iriatimpajia aisa.

15 Tampatica oanaquero itioncacojiaqueca tsavetantajiguiroca icanquerica Aapani Irionshi ocanti:

16 ‘Oncoramanitapoja jegueti noncoraquetaje,

* **15:14 Shimo.** Iriotaque Shimo Peerero. (Pamenero otsapa 7.) Iroquetinica paperi itioncaqueca guriegotsaqui ocanti “Simeón”, iroguenti ivajiro iguenquetsatsarequi evereo.

nogatiajero iitsaarevanconi Taavini[†] soveanquisica,
novetsicajero pomatsavetatsica,
nonetsanatajero.

¹⁷ Ariqueate nonquejetaquero imaica cameetsanijite itsipapae caquinteguetatsica incoaguetaqueri Majirontamajatatsica,
irirajia teeca irijorijoigueji nocantacojiaqueca nashintajiacari.'

¹⁸ Aritarite iquejetaquero imaica iquenquetstaquegueti Amajirote, itsavetanquerogueti coramani.

¹⁹ "Irootaque noncantantajiaquempica aato asereajiguiritsi teeca iriojia joriojia quemisantajiatsica, aato acantajiguiri irinetsanajiaquero maasano itioncacotanaqueca Moishishini.

²⁰ Iroguentiqueate antioncajiaqueneri ancantaquiaqueri: aatoja ishecatimajijaaritsi yojocajivetanarica ipeashijiaca caquinte irioshivijitashitaca intati; aatoqueate ijatashijiajirotsi manquigarentsi teeca iro irashi, aisa manquigarentsi, aato ojatashijiajiritsi teeca irio ashi; aatoja ishecatimajijaaritsi icaticajigueta aisa aatoja ishecatacoji-jaaritsi irirajapae ishecajigueta.

²¹ Aritarite ocanque itioncacotanaqueca Moishishini icantimenqueriqueate oca aritarite yapatsajavantapinijiguiro coramani shinagogaqui savincaguiteriqui imagorejantajitaca arejevaetanaca imaica."

[†] **15:16** Icanquegueti **nogatiajero iitsaarevanconi Taavini**, icantacotaqueri inchoviquitanaqueca majirontanquitsineca quejetajemparineca Taavini imajirontagueti.

22 Iroompaqueate iquemajiavaquitigui itigarancanejia Jesoshi, aisa maasano quemisantajatiatsica jerijia quempoguijajiguirica, icantajiguiri:

—Iintsija antigarancajiaque mavite iroguijajianaqueri Paavoro aisa Verenave iroajianaque Antioquiaqui.

Iriguenti itigarancajiaque Jorashi icantajitriquea aisa Varesava, jeri Tsirashi. Iriatimpajia iriguentijia quemisantajatiatsica anaantajatiatsica.

23 Itioncajiaqueneriqueate paperiqui yojocajiaavaqueneri irajaianaqueneri, icantajiaqueri:

Imaica napiguemisantarijijateni, non-tioncajiaquempi paperi aviatimpajia teeca pijorijoigueji guntenijiatsica oraniqui Antioquiaqui, Shiriaqui aisa Shirishiaqui. Naatimpajia ocaniqui novegarajiacá itigarancanejia Jesoshi, itsipapae quempoguijajiguirica quemisantajatiatsica aisa maasano quemisantajiguirica Jesoshi.

24 Imaica nontioncajiaquempi aviatimpajia noquemacojiaquempitarite yoajianaquegueti guntenijiatsica acaniqui yasereajiaquempi ican-tashitatijaiananacaro notsatacaaajiaquempica. Icantajiaquempi poguijajajeroja itioncacotanaqueca Moishishini pintotsaiquitacaantajiaquero pichonquimashi, picantantajiacaca: “¿Querocampa noncojiaquempani cameetsanijite nontsajiaque queri nonquemisantajiaqueca?” Cotanquitsi teequeate naatimpa nontigarancajigueriji, inchiquiotsitarite yoashijianaca iriatimpajia.

²⁵ Ariquea noquemavacaajiacac nontigarancajiaqueri nocoguiajiaqueca iroajianaque irinejajiaquitempi, iriguenti iroguijaguijaitanaque Vere nave aisa Paavoro nopintsajiacaca.

²⁶ Iriatimpajia tee intsaroacaguemparoji irimetojaquegueti itsavetanquerigueti Amajirote Jeso quirishito.

²⁷ Iroguenti notigaranquimentajiaqueri Jorashi aisa Tsirashi incamantamajajiaquempiqueate maasano oca notioncajiaquempica.

²⁸ Iroguenti noncantajiaquempi inintaguequeca Ishire Aapani Irioshi, ariqueate nocantajiaque naatimpajia aisa: “Cameetsavaeque, iintsija ancamantajiaqueri.” Imaica jeroqueate pinetsanajigueca:

²⁹ aatoja pishecajijaaritsi yojocajiguevecanarica ipeashijiaca caquinte irioshivijitashitaca intati; aatoja pishecajijaaritsi irirajapae ishecajiguetaca; aatoja pishecajijaaritsi icaticajiguetica; aatoja pijatashijiajirotsi manquigarentsi teeca iro pashi; pinquejetaquempa aisa aviatimpajia manquigarentsijia, aatoja pijatashijiajiritsi shirampari teeca irio pashi. Pinetsanajiaquerogueti oca pincomajamajajiaquempa. Imaica ariotapojaque.

³⁰ Iriraqueate itigarancajiaqueca yoajianaquequeate Antioquiaqui icapiocajia pojaca maasano yojocajia pojaqueneri paperi.

³¹ Iroompaqueate yapatsajavantajiaquerogueti ishinevaejiaca.

³² Iriraqueate Jorashi aisa Tsirashi iriguenti jiarite tsavetantajatsica, iquenquetsajiaque

itampishitacajiaqueri yoguishinejajiaqueri
irapiguemisantarijiate ni, icamantamajajiaqueri.

³³ Osamaniqueate iconoajiaquitari. Ariqueate
iquenquetsatacaa jiajavajiri irira irapiguemisantari-
jiate ni icantavajiriqueate:

—Cameetsataque poajianaje iguntenijiaqui
tigarancajiaquempica iroqueragueti.
Pamenanontaguetanajempaja.

³⁴ Cotanquitsi irira Tsirashi ariqueate yamepo-
jaca, apaniro yoanaji Jorashi.‡

³⁵ Irira Paavoro aisa Verenave ari ichoocajiaque
Antioquiaqui itsipajiacari itsipapae itsatacaan-
tajiaque queate itsavetantajiaquero iguenquetsat-
sare Amajirote.

*Yapijtajiro Paavoro yoaguetanaque intsav-
tantajeri Amajirote*

³⁶ Oshequiana quegueti savincaguiteri
ariqueate Paavoro icantiri Verenave:

—Iintsija ampiapiaitanaje anejajijaateri
maasano apiguemisantarijiate ni acaman-
tajiaquitica coramani atsavetanquerogueti
iguenquetsatsare Amajirote. Amenajateri
queroca icojiacani.

³⁷ Inintavetaca Verenave intsipatanajempari
Joanca, icantajitica aisa Maricoshi.

³⁸ Cotanquitsiquea tee irininteji Paavoro
intsipatanajempari, yamenaueritari
coramani Pampiriaqui ipiapitsatanajaritari

‡ **15:34** Choocaguetaque paperipae iroquetinica iguenquetsat-
sare qui guiriego teeca intioncajiteroji ocaniqui tioncanquitsica
otsapaqui 34.

tee interonqueroji iquenaguetanaquegueti itsavetantaquerigueti Quirishito.

³⁹ Iquenquetsatavacaajiajaveataqueate aisa teequeate inquemavacaajianajempaji ariquatee itsinampirejavacaanaca. Irira Verenave itsipatanacari Maricoshi itehiteitanaca yoajianaque Tsiperequi.

⁴⁰ Irira Paavoro iriguenti itsipatanaca Tsirashi. Maasano irapiguemisantarijiate ni yamanacoven-tajaqueri cameetsanijite incavintsajajiaqueri Aapani Irioshi, quishoniji iroajianaqueri.

⁴¹ Icatiajianaca yoajianaque Shiriaqui aisa Shirishiaqui itampishitacajajiaqueri maasano quemisantajiatsica.

16

¹ Ariquatee yoajianaque Terevequi aisa Irishitiraqui. Inejajiapojaqueri quemisantatsica ican-tajitica Timoteo, oraquatee oguirica iroguenti jorio quemisantatsica. Irira queate oacaantirica iriguenti guiriego.

² Irirajiaquea quemisantajiatsica guntenijiat-sica Irishitiraqui aisa Iconioqui yamenajiaqueri iriguenti caaviji icomajamajata.

³ Inintantacacaqueate Paavoro intsi-patanaqueempari, cotanquitsi iroquetiqueate itotsaiquitacaanqueri ichonquimashi aatonijite icatsimajiavaqueritsi joriojia guntenijati-sica iroaroaitanaquegueti. Maasanotarite itsajiaqueri iriguenti oacaantiri guiriego.

⁴ Ariquatee querocagueti iquenaque-naitanaquegueti gunteninintsipaequi icamantajianaqueri irapiguemisantarijiate ni

icantajiaquerica itigarancanejia Jesoshi jerijia quempoguijajiguirica quemisantajiatsica guintenijiatsica Jerosarequi. Ariquea icantajiaqueri inintajiaque irinetsanamajajianaquero.

⁵ Iriraqueate quemisantajiatsica arimpaqueate iquemisantamajajianaquero Amajirote. Maasano savincaguiteripaequi arimpaqueate yoshequia-majatanaque.

⁶ Ariqueate inintajiavetaca intsavetantaji-aquierome Iguenquetsatsare Aapani Irioshi Ashiaqui, iro cotanquitsi tee irinintacagueriji Ishire Aapani Irioshi, yoantajianacaca Pirijiaqui aisa Garashiaqui.

⁷ Yarejerejeivaetanaca ovegaraguetapo-jacagueti Mishia. Inintajiavetaca iroajianaqueme Vitiniaqui, ari oquejetaca iroatimpa tee irininteji Ishire Jesoshi iroajianaque.

⁸ Ariquea iquenaguijianaquero yanajaiana-quero Mishia, yoajianaque yarejejiapojaca Toroashiqui.

⁹ Ariqueate onianquittapojaquegueti irira Paavoro ariqueate mana oquejetimotacari iguimaane, yameniri icatiimotacariequeate Maseroniaquitica, icampojaqueri:

—Caacate pinquenapojaque acaniqui Maseroniaqui, pamijiapojena.

¹⁰ Yamenaquerigueti, taampinaquea nonetsanajianaquero* cameetsaniji nosotoajianaque noajianaque Maseroniaqui, notsajiaquequeate imaica iriguenti nintanquitsi Aapani Irioshi

* **16:10** Jero acaniqui amenaquero itioncaquegueti **nonetsana-jianaquero** ocantacotaqueri Irocashi tioncaqueroca, itsipatacari imaica Paavoro.

nonquenquetsatacaa jiaqueri Maseroniaquitica
nontsavetantapojaquero Quenquetsatsarentsi
Oganejencatatsica.

Yoanaquegueti Paavoro Piripoqui

¹¹ Ariquea notejianaca Toroashiqui namajatacojianaque, apatiroti noajianaquero Samoterashiaqui. Ariquea osavincaguitetanajigueti aisa ariquea narejejiapojaca Neaporishiqui.

¹² Ariqueate nanijinijiitanaque quenavoirontsiqui noajianaque Piripoqui. Irootaque guiteninintsi anaaqueroca otsipapae quempejitanquitsica choocajianquitsica Maseroniaqui. Iriguenti guitenipojaro poneanquitsica Iromaqui. Ariquea nochoocajianaque aparopae savincaguite ri.

¹³ Ariqueate aapojacagueti saavaro imagorejantajitaca nosotosotoitanaque ovegaraguetapojacagueti tsovironaquipae noajianaque ojaaqui yamanapinijitirigueti Aapani Irioshi. Ariqueate nosavicapojaque notsavetantajapiro Iguenquetsatsare Aapani Irioshi nocamantajiaquero manquigarentsijia capiocajianquitsica.

¹⁴ Ariqueate ochoocaque ocaniqui icantajitica Riria poneanquitsica Tiatiraqui. Iroatimpa iroguenti jocantaguetiroca ametsomagori camachoncamagori. Iroguenti tsaroventarica Aapani Irioshi. Oquemisantamajatavaqueri Paavoro iquenquetsataquegueti, iriguentitarite quenquetsashirentacaaquero Amajirote, irootaquequeate oquemisantantavacarica.

15 Ariqueate oviñacajatantacaca otsipajiacari maasano maimojiguiroca. Arikeate ocantajiaquena:

—Pitsaqueragueta arimaja noquemisan-tamajataqueri Amajirote pincoraquejiaque notsovironaquitequi pimaimojaquitenata.

Arikeate otsipajianaquena noajianaque.

16 Arikeate noanoaitanaque yamanap-inijitirigueti Aapani Irioshi, notonquiv-ojajiavacaro aajanirentsi iroaqueraca quenquevarotananquitsi ichoocashirenquero ampatsini otsavijiguevetantacaroca querocaca oncoguetanaquempani coajica, iroguentiqueate yaampinijiaca ca imentaquipae aajanijigaroca. Ininquegueti igonoro ontsatsiquenempari taaca opaji ininque, ari irovegarataquero.

17 Iroatimpa oguijajianaqueriqueate Paavoro aisa naatimpajia, ocajemanaqueate ocanti:

—Irirajia iriguentijia itigarancanejia Irioshi Anaantamajatatsica, itsavetantaquequea icamantajiaquempi quero pincojiaquempani irimeshiimentajitajempinijite.

18 Arikeate oquejetaquero imaica oshequi savincagüiteri noapinijiaquegueti. Arikeate asereaqueri Paavoro ipitsocashitsitanacarоqueate icantsitariqueate choocatancaroca:

—Noncantantaquempiro ivajiroqui Jesoquirishito pisotoanajero.

Arikeate iquenanaque isotoanaque.

19 Cotanquitsi irira aajanijigaroca itsajia-queterite aato yaantajijaaro imentaquipae, yaitsijianacariequeate Paavoro aisa Tsirashi yaajianaqueri niganqui ochocataquegueti

tsovironaqipae, aritarite ichoocajiaque oraniqui imajirojiate.

²⁰ Yonigaajiapojiri icantajiguiri:

—Jeri irica joriojia iroguenti icoraquetashiji-aque yasereajaquenaqueate itsimajajiaquena maasano quintenijiatsica ocaniqui aguinteniqui.

²¹ Itsatacajaipojaquenaquea yamejigaca iriatimpajia. Tee oncameetsateji anquemisantajiguero itsatacaapojacajica, icantimentajitajirotsi. Aatimpajitarite agonoroncari Iromaquitica.

²² Opejaianaqueriqueate itsimajenca maasano. Iriraqueate majirontajjatsica icantacaantajiaqueri isapocajiaqueri itavatavaajiaqueri.

²³ Ariqueate yagajiaquerigueti itavatavaajiaquerigueti yaajianaqueri yoguijajiaqueriqueate santanaqui, icantajiaqueriqueate ashitacotantatsica:

—Pinquempoguijacomamajajiaquerija, ishianacatsi.

²⁴ Ariqueate iquemaquerogueti icantiquerica arimpaqueate yoguijamajajianaqueri intsimpogui, yavinaacojiaqueri iguitiqui inchacotaqui.

²⁵ Ariqueate onianquiitetapojaquegueti, irira Paavoro, Tsirashi yamanajiaqueri Aapani Irioshi aisa itsarontaventajiacari. Iquemisantajiaqueriqueate itsipajia santanatacojianquitsica.

²⁶ Cotanquitsiqueate omoguecanaquequeate ocantanaquequea santana mogué, mogué, mogué, ariqueate otanarejaguetanaca sotomorontsipae, oshiticarejaguetanaca

oparipariitanaquequeate cavorejatsaripae ishiti-
cacotantajivetacarica maasano yoguijajitaqueca
santanaqui.

²⁷ Itinajanacaqueate ashitacotantatsica
santanaqui yameniroqueate tanarejaguetanaca
sotomorontsipae itsaroanaquequeate ijiqueji
shiajianaca yoguijajiaqueca santanaqui,
yaavetanacaqueate igotsirote irimocorojem-
pamequeate.[†]

²⁸ Cotanquitsiqueate icajemanaquequeate Paav-
voro icanti:

—¡Aato pimocoroja! Maasano choocajiana
ocaniqui.

²⁹ Iroompaqueate iquemavaquitigui icanti:
—Pintsivoteri tsivorentsi namenamajajiaque-
rita.

Ariqueate yamaqueneri, ishianacaque-
ate iriatimpa iquijanaque intsompogui
itsaroanaquequeate yompioncanacaqueate,
yogueroaventanacariea Paavoro aisa Tsirashi.

³⁰ Ariqueate itsipajianacari yoguisotojajiri
icantajiguiri:

—Iintsija pincamantena, ¿querer nonco-
quempani iraantavajenaca aatoniji nogui
camorecariqui?

³¹ Icantajiguiri quea:

[†] **16:27** Yamejigaca iriatimpajia coramani aatogueti
iquempogujamajatiri yashitacoqueca irishianaquegueti,
ariquea irantsipetacaajitaquempari quempogujavetacarica,
irimetojajiteri. Irootaquequeate itsaroantanacaca
ashitacotantatsica.

—Paventanajempari Amajirote Jeso quirishito, irioquea aavajempineca aatoniji pogui camorecariqui, ariqueate inquejetacaajiaquempari maasano piconoacaca.

³² Ariqueate itsatacaajiaqueri iriatimpa jerijia maasano iconoajiacaca, itsavetantaquero Iguenquetsatsare Amajirote.

³³ Iroompaqueate iteroncajiana jirogueti itsatcaa jiaquerigueti, irira queate ashita cotantatsica santana qui yaajiana queri iquivagueta jiniri iquirajashitequitacaajiaquerigueti itavaajiaquerigueti. Ariqueate iviñacajataca antaca iriatimpa jerijia maasano iconoajiacaca.

³⁴ Ariqueate yaajiana queri itsovirona quite qui yojo caja queneri isheca. Ishinevaejiaca iriatimpajia jerijia aisa iconoajiacaca iroorijite iquemisantajiaqueri Aapani Irioshi.

³⁵ Ariqueate osavincaguitetanajigueti irira queate majirontajiatsica itigarancajiaqueri coareta pae incantajiaquiteri:

—Poguipaquijajeri irintatica shiramparijia.

³⁶ Irira queate ashita cotantatsica icantiri Paavoro:

—Icanti majirontajiatsica noguipaquijajempi. Imaica queate pisotosotoitanaje cameetsaqueate poajanajje.

³⁷ Cotanquitsiqueate Paavoro icantsiji gariqueate coaretapae:

—Aato noajiguitsi. Arimpate chapinqui manaqueate itavaajiaquena intati. Naatimpajitarite nogonoroncari Iromaquitica cotanquitsiqueate teequeate iroquetita incoacojiavaquenaji taaca

nantaque. Ariqueate yamenajiaque maasano yoguijajiaquena santanaqui. Imaicaquea imaica ¿arimpate iromanaquero iroguisotoajiajenagueti? Iintsijate incoraquejaque iriatimpajia, iriotaquequeate oguisotojaijaatenane.

³⁸ Ipiapiaitanajaqueate coaretapae icaman-tajapojaqueri majirontajitsica. Arikeate iquemacojiaquerigueti iriguentijia igonoroncari Iromaquitica, arikeate itsaroajianaque.

³⁹ Yoashijianaqueriqueate yogameetsaji-jaatiriquea yoguisotojaijaatiri icantajiguiri:

—Nonintaque poajianaque, povashiantanajero noguinteni.

⁴⁰ Iroompaqueate isotosotoitanajigueti yoajianaque otsovironaquitequi Riria iquenquet-satacaajianajiriqueate irapiguemisantarijijateni yoguishinejajiaqueri. Arikeate yoajianaji otsipaqui gunteninintsi.

17

Yoanaquegueti Paavoro Tesaronicaqui

¹ Arikeate iquenaquenaitanaque Ampiporishiqui aisa Aporoniaqui irosati yarejetantapojacaro Tesaronicaqui. Arikeate oraniqui chooca shinagoga icapiocantapinijiacaca joriojia.

² Iriraquea Paavoro iquijapinitaquequeate 3 savincaguiteri imagorejantajitaca iquenquetsatavacaajiacaca, itsatacaajiaqueri Tioncarentsimajaca, ogantagatarite yamecaro itsatacaantapinique imagorejantajitaca icapiocajiacagueti joriojia.

³ Yoguisotoaqueneri ijicoguetaqueneri Tioncarentsiqui ocanquegueti irantsipevae-taquempa irira Quirishito, irimetojaque, cotanquitsi impochatanaje. Icanti: “Iricatica Jesoshi notsavetantaquempica, iriotaque Quirishitotatsica.”

⁴ Iconoagarantajiaca joriojia iquemisanta-jiaque ariqueate iconoajiacari Paavoro aisa Tsirashi. Aisa iquemisantagarantajiaque guiriego tsaroventajigarica Aapani Irioshi. Ariqueate oquejejiaca oshequini manquigarentsijia anaantajiatsica oquemisantajiaquequeate.

⁵ Yamenajiavaquerigueti joriojia teeca in-quemisantajigue opeacojianaqueri itsimajenca, icapiocantajiacarica peraguetatsica teeca incameetsajigueji. Iriatimpajia icajemaji-aguetanaqueriquea icatsimajianaquequeate maasano, itsipatsipaitanacariequea, yoajianaque itsovironaquitequi Jasoni icojaiavecariqueate Paavoro aisa Tsirashi irinoshicajiaque-rimequeate irojocajiaquenerimequeate capiocajianquitsica.

⁶ Cotanquitsiqueate tee irinejajapirojaqueri. Iriguentiqueate inoshicajiaque Jasoni jerijia itsipa irapiguemisantarijiateni, yaajianaqueneri majirontajiatsica icajemajianaquequeate icantajigu:

—Irirajia asereajiguirica maasano caquinte quepatsipaequi, imaica ariqueate icoraquejiaque ocaniqui,

⁷ yaajiaavaqueriqueate Jasoni. Iriatimpajia yo-jocaavaquero icantica majirontatsica Sesa tee-queate inquemisantajigueriji, icantajiaquetarite

chooca itsipa majirontatsica icantajitica Jesoshi.

⁸ Iroompaqueate iquemajiavaquerogueti maasano capiocajianquitsica jerijia majirontatiatsica opejaianaqueriqueate itsimajenca.

⁹ Icantajiguiri Jasoni jerijia irapiguemisantarijiateni:

—Iriraqueate Paavoro aisa Tsirashi teequeate nonintajigueriji ocaniqui, antigarancabajeria iroajianaje. Cotanquitsi imaica pojocajiguena pimentaquitsitepae, coajicaqueate iroajianajegueti noguipiajajempiriqueate.

Ariqueate yojocajiaqueneri, iroompa yoguipaquijajiajiri.

¹⁰ Arikeate opitsecanaquegueti iriraqueate quemisantajiatsica itsipajianacari Paavoro aisa Tsirashi yoajiavajiri iroajianaquequeate Vereaqui. Iroompaqueate yarejejiapojacagueti iquiaquijaitapojaque shinagogaqui icapiocantapinijiaca joriojia.

¹¹ Iriraquea joriojia quintenijiatsica Vereaqui teequeate inquejejiguempariji quintenijiatsica Tesaronicaqui. Iriatimpajia intintamajajiaque inquemisantajiavaqueri itsatacaaajaquerica. Irosati savincaguiteriqui yapatsajavantamajajiaavaquero Iguenquetsatsare Aapani Irioshi iramenajiaquero cameetsaca itsatacaaajaquerica.

¹² Irootaquequeate iquemisantantajiacarica Jessoji oshequini jorio aisa guiriego. Iquemisantajiaqueri shiramparijia jerojia manquigarentsijia anaantajiatsica.

¹³ Cotanquitsi iquemacojiavaquerigueti joriojia quintenijiatsica Tesaronicaqui chooca Paavoro

itsavetanqueroqueate Iguenquetsatsare Aapani Irioshi Vereaqui, icoraquejiaque icantajiapojaqueri Vereaquitica:

—Aato piquemisantiri Paavoro, mana pincatsimajigueri intati.

¹⁴ Iroompaqueate iquemajiaavaquitigui irapiguemisantarijateni Paavoro, itigarancantajiacarica iroanaque otsapijaqui quentija. Iriguentinivani choocatajatsi Tsirashi aisa Timoteo.

¹⁵ Iriraqueate tsipajianacarica yoajiavaequitiri Atenashiqui, ariqueate ipiapaitaja. Iriraquea Paavoro icantajiavajiri:

—Pincantajiapojajerija Tsirashi aisa Timoteo taampinaja incoraquejiae.

Paavoro iquenquetsataque Atenashiqui

¹⁶ Ariqueate Paavoro yoguijajavaquerigueti Atenashiqui, yamenaguequeri ipejaiguica irioshivijitashitaca guintenijiatsica ocaniqui, yoshequiamajatatiguinimaja, ariqueate ishimampojancavaetanacaqueate.

¹⁷ Iquenquetsatantanacacaqueate shinagogaqui icapiocantapinijiacaca joriojia. Iquemisantajiavaqueri iriatimpajia jerijia itsipa caquinte tsaroventajigarica Aapani Irioshi. Ariqueate iquenquetsatavacaajiaca. Aisa ogantaga savincaguiteriqui yoapiniquequeate oniganquiquegueti guinteninintsi yojocanta-jiguetirogueti taaca opajitapae iquenquetsata-caajiaqueriqueate choocajianquitsica oraniqui, iquenquetsatavacaajiaca.

18 Ariqueate ichoocajiaque guijatacojiguiroca itioncacotanaqueca Epicoro jerijia aisa guijatacojiguiroca itioncacojianaqueca tsatacaantajatsica icantajitica eshitoicojia. Iriatimpajia itsipajiacari Paavoro iquenquetsajiaquequea, cotanquitsi ariqueate iconoagarantajiaca icantajiaque:

—¿Querocate icocani irira quenquetsavaeri?

Itsipaqueate icantajiaque:

—Iriocampate quenquetsatacotirica itsipapae irioshipae.

Icantantajiacaca imaica itsavetanquerotarite Paavoro Quenquetsatsarentsi Oganejencatatsica tsavetacotirica Jesoshi aisa ipochatanajigueti.

19 Ariqueate yaajianaqueri aatsonquiriqui icantajitica Areopago icapiocapinijiacagueti majirontajatsica icoacoquiaqueriqueate icantajiguri:

—¿Taate opajita ocatica iroaquerari pitsatacaantaqueca?

20 Teequeate nontsajigueroji pitsatacaaajiaquenaca, nonintantajiacaca poguisotoamajataquenaro.

21 Icantantajiacaricaqueate imaica iriguentijiatarite Atenashiquitica jerijia ponejaianquitsica otsipapaequi guinteninintsi oraniqui iroguentitarite isavicaventajiaque iquemisantajiaqueriqueate iquenquetsatacojiguirogueti otsipapae teeca intsajigueroji, coajicaqueate irioqueate quenquetsajajatsi.

22 Icatianacaqueate Paavoro niganqui Areopagoqui icantiri:

“Aviatimpajia guntenijiatsica Atenashiqui, namenajaquempi caaviji pishineventamajajiavecari pirioshivijitashitacaca.

²³ Ontaniquiqueate noquenaguetanaquegueti namenitsiguetanaquempiro pitsaroventapinijiacaca, nonejapojaquero aretare pitsaroventantaca chooca itioncajitaquero ocanti: ‘Iriguenti antajiaqueneca irioshi teeca inquemacojiteriji.’ Iriraqeate teeca pinquemacojigueriji, manaca pitsaroventashijiacaca intati, iriotaquequeate notsavetantica naatimpa.

²⁴ Iriatimpa iriguenti Irioskimajaca. Iriotaquequeate peacaacaroca quepatsi, jeri maasano choocatantaguecaroca. Iriatimpa iriguentitari ashintaguetaroca inquite aisa quepatsi, teequeate inchoocatantemparoji tsovironaqui ishitiquica caquinte.

²⁵ Teetarite incoguimentempaji irantaqueneri caquinte. Iriotari peacaajiacaji, aisa irioqueate anijacaajiacaji yojocajiacajiroqueate maasano.

²⁶ Iroaqueragueti ipeacaacari caquinte apaniroqueate ichoocaque. Ariqueate yoshequiaqueri, ariqueate ijatacojiaque maasano caquinteguetatsica teequeate incantashitatijaiguempaji. Ivorocaqueriqueate cameetsanijite intsitacaguitejajianaquemparo maasano quepatsi. Iriotaquequeate cantanquitsi quero avoajiaqueni aisa queroca aguinentijiaquempani.

²⁷ Ariqueate iquejejiacaji imaica cameetsanijite anintajiaquenijite antsajiaqueri, antsatantajiapojemparica, teenica irisamanitacoteji itsitacaguitejacarotarite maasano.

²⁸ Iriotaquequeate anijacaajiacajica tampishitacaajiacajica. Aatomegueti ichoocatime iriatimpa aatomete achoocajiguime. Aritarite icantajiaque pigonorojia caavijica itsamajajigu: ‘Aroguentijia irijanijiate Aapani Irioshi.’

²⁹ Aroguentigueti irijanijiate Aapani Irioshi, aato ajijiguiri imaica iquejetacari ipeacaajitaca cavorejaguetatsica irooca mapi, ora iquenquejashitaca intati caquinte.

³⁰ Coramani teenicate intsajiguencate caquinte, teequeate incantajigeriji Aapani Irioshi, cotanquitsiqueate imaica icantajiacajiqueate maasano ancantashitatijaianajempa avashiantajianajero aguempevaerejia.

³¹ Choocatarite savincaguiteri itsatsicaca Aapani Irioshi, iriraquea shirampari inintacaaqueca incanquequea quericaca intsipatajempaca Aapani Irioshi aisa quericaca oananquitsine camorecariqui, cameetsaqueate iroaquero, iriguentitarite cantaqueri coramani Aapani Irioshi. Iriraqueate Aapani Irioshi yovochantajiri cameetsanijite antsatimentajiquerinijite iriguenti inintacaaqueca.”

³² Iroompaqueate iquemajiaququitigui iquenquetsatacotaquerogueti intancorejajianaje coajica metojaguevetatsica, iconoagarantajianaca ishirontajianaca inijashijianacariequeate. Choocaqueate itsipapae cantajianquitsica:

—Coajica nonquemajiajempi aisa.

³³ Ariqueate icatianaja Paavoro.

³⁴ Cotanquitsi iconoagarantajiac a quemisantajiaqueri Jesoshi, ariqueate yoguijaguijaitanaqueri Paavoro. Iquemisantaque apaniro

majirontatsica Areopagoqui icantajitica Tionishio. Aisa oquemisanque manquigarentsi icantajitica Tamarishi. Ariqueate iquejejiaca itsipapae iquemisantajiaqueri Jesoshi.

18

Paavoro iquenquetsataque Corintoqui

¹ Arikeate iponeanacani Paavoro Atenashiqui yoanaquequeate Corintoqui.

² Arikeate inejapojaqueri jorio icantajitica Aquira quintenivetatsica Pontoqui. Iriaquerasano coraquetanquitsi iponeaca Itariaqui itsipatamacarо imanquigare icantajitica Pirishira. Icoraquetantacaca manatarite yoguishiaqueri majirontatsica Caraorio, teenicate irinintajeji inchoocajiaje joriojia Iromaqui. Arikeate yoanaque Paavoro itsovironaquitequi irinejajigueri.

³ Arikea iquejetavacaajiacaqueate, irio avoguetiroca quitsaarentsivanco, irootaquequeate iconoampojacarica itsipatavacaajiacaqueate ontaniqui yantajiaquequeate.

⁴ Ogantaga savincaguiteriqui imagorejantajitaca yoapinitaque shinagogaqui icapiocantajiacaca joriojia iquenquetsatacaaajiaqueri iriatimpajia jerijia aisa guiriegojia cameetsanijite inquemisantacaimentajiaquerinijite.

⁵ Arikeate yarejerejeipojacagueti Tsirashi aisa Timoteo iponeponeitaca Maseronaiqui, iriraqueate Paavoro arimpaqueate isavicaventanaquero Iguenquetsatsare

Aapani Irioshi itsavetantamajatanaquero icamantamajajiaqueri joriojia icanti:

—Irira Jesoshi iriguenti irira Quirishito Meshiantatsica poguijajiavecaca.

⁶ Iriatimpajia ipigatsajianacarieate inijashijianacari, ipotecantanacaroca Paavoro iitsaare cameetsanijite intsajiaquerinijite mana yovashiantajianaqueri aatoqueate isavicaventajajiritsi intsatacaaajiajeri. Icantajiguiri:

—Nocamantajiajavequempiqueate, teequeate pinquemisantajiguenaji. Imaicaqueate inchiquiotsiqueate pinquejetacaantajiaquempa aviatimpajia pimetojajianaquegueti, aato naatimpa noquejetacaantimpitsi. Iroosacanicate imaica iriotaquequeate noashijianaque teeca iriojia joriojia nontsatacaaajiaqueri.

⁷ Iroompaqueate icantajiaquerigueti isotoanaji yoanaque itsovironaquitequi Tishio Joshito tsaroventarica Aapani Irioshi. Oraqueate itsovironaquite mana otsipatacaro shinagoga icapiocantajiaca joriojia.

⁸ Irira Quirishipo jivatanquitsica shinagogaqui iquemisantajiaqueri Amajirote. Ariqueate iquejejiaca ijitanejia jerijia aisa oshequini Corintoquitica, iquemajavaquerogueti Iguenquetsatsare Aapani Irioshi iquemisantajiaqueri Amajirote, ariqueate yoviñacajatacaantajiaca.

⁹ Ariqueate yoguimaaca Paavoro tsiteniriqui, ariqueate yoguimaacari Amajirote icampojaqueri:

—Aatoja pitsaroguitsi. Arimpaqueate pinquenquetsatanaque, aato povashiantirotsi.

¹⁰ Ogantagaqueate quisho noaquempi aato yantajitimpí, choocatarite acaniqui oshequini quemisantajiaquenaca.

¹¹ Ariqueate ichoocaque Paavoro Corintoqui apatiroti ajagantsi aisa otsipa niganqui ajagantsi, itsatacaantaquero Iguenquetsatsare Aapani Irioshi.

¹² Oraqueate ichoocaquegueti acaniqui icoracuetaquequeate Gario ipeacaqueate imajirojiate Acayaquitica. Ariqueate irira joriojia icapiocaventajiacari Paavoro yaajianaqueneri iriatimpaqui,

¹³ icantajiguiri:

—Iracaqueate iroguenti yantaque icantimentajitica, iroguentitarite isavicaventajiaque iquenquetsatamampeanacaro Iguenquetsatsare Aapani Irioshi cameetsanijite inquemisantimentajiaquerinijite maasano, cotanquitsi icantashitatiacaro.

¹⁴ Iroompaqueate inquenquetsatanaqueme Paavoro iquenquetsatanaquequeate Gario icantajiguiri joriojia:

—Imaicaquea joriojia, arimequeate iraitsitantaqueme, iroguenticame irimetojantaqueemequeate, arimequeate nonquemisantajiaquempime.

¹⁵ Cotanquitsi teequeate ariquea inquejeteroji imaica, iroguenti picatsimatimentajiaqueri itsatacaajiaquempigueti icantashitatiita-jiaquempirogueti pitsatacaantajiguica. Pinetsanajiguerojate aviatimpajia. Aatoqueate noquemisantajiguimpitsi.

¹⁶ Ariqueate yoguisotoajiaqueri.

¹⁷ Ariquea maasano [guiriegojia] icatsimajianaqueri Soseteneshi jivatanquitsica shinagogaqui icapiocantapinijiaca joriojia yaajianaqueri itavaajiaqueri tac, tac. Yamenajiavecariequeate Gario, cotanquitsiqueate tee incantajigueriji.

¹⁸ Ariqueate irira Paavoro ichoocaque oshequi savincaguiteri oraniqui Corintoqui. Ariqueate yoanaji iquenquetsatacaajianajiri irapiguemisantarijiatevi. Ariquea itejianaca yamajatacojianaque iroajianaque Shiriaqui itsipatanacaro Pirishira aisa irira Aquira, cotanquitsi yoajapanajanti Senquereaqui yojocaguinatapanajantaqueate cameetsanijite irinetsanataquero icantaquerica Aapani Irioshi, icantiri: “Coajica nonteroncaquerogueti nocamantaquempica nojocaguinataquempa.” Ariqueate itejianaca yamajatacojianaque.

¹⁹ Ariquea yarejerejeitaca Epesoqui, ariquea oraniqui aguijitanaque Pirishira aisa Aquira. Irira Paavoro yoapanajanti shinagogaqui icapiocantapinijiaca joriojia iquenquetsatacaajapanajantiriqueate capiocajianquitsica.

²⁰ Iriatimpajia icantajiavetavajari:
—Aatotacaja pijatitsi, pimaimojianaquena.
Cotanquitsi iriatimpajia tee irininteji, icantajiguiriiqueate:

²¹ —[Nonintaque noanaque Jerosarequi nogavisaquitero Pentecoshite.] Ininquegueti Aapani Irioshi nompiaje.

Itetanaca yoajianaque isotoantanajaro Epeso.

²² Yagatacopojaque Sesareaqui yoanaque Jerosarequi inejajiaquitiriqueate quemisanta-jiatsica. Ariqueate yoanaque Antioquiaqui.

23 Osamani ichoocatanaque acaniqui, ariqueate yoanaque iquenaguetanaque Garashiaqui aisa Pirijiaqui intampishitacaimentajianaquerinijite maasano quemisantajiatsica inquemisantamaja-jiaquerinijite Amajirote.

Itsatacaantaque Aporoshi Epesoqui

24 Arikeate yarejetapojaca apaniro jorio Epesoqui iponeaca Arejantiriaqui. Iriatimpa ariguenti ipajita Aporoshi, iriguenti quenquetsatatsica cameetsa aisa itsamajatiro Itioncacaantaqueca Aapani Irioshi.

25 Iquemacocomajataqueri Amajirote Jesoshi. Itsavetantamajataqueri, aisa itsatacaantaque-gueti yoguisotoamajataqueroqueate, cotanquitsi iroguenti itsavetaca itsatacaantica Joanca Viñacajatantatsica.

26 Arikeate imapocanaquero iquenquetsatanaque shinagogaqui icapiocantajiacorrioja, teequeate impashiventempaji. Iroompaqueate iquemajiaquaitigui Aquira aisa Pirishira yaajianaqueri oraniqui intsatacaimentamaja-jiaqueriniji, yoguisotoamajajiaqueneri quero ococani iguenavoquiro Aapani Irioshi.

27 Arikeate Aporoshi iquenquejanaji iroanaje-queate Acayaqui. Iriraqueate irapiguemisantarijijateni icantajiaqueri cameetsataque iroanaque inquenquetsate ontaniqui.

Itioncajiaqueneri quemisantajiatsica Acayaquitica iraajiavaquerija. Arikeate coramani icavintsajajiaqueri Aapani Irioshi

Acayaquitica irootaquequeate iquemisantat�ajajarica. Imaica yarejetapojacagueti Aporoshi oshequiqueate itampishitacajaiapoaqueri.

²⁸ Iriatimpa inetsanajianaqueneriquea maasano joriojia capiocajianquitsica itsatacaantajiavecaca, cameetsa yoanaquero maasano, iroguentitari ipampiatanaque Itioncacaantaqueca Aapani Irioshi itsavetantaquerigueti Jesoshi icanquegueti iriguenti irira Quirishito Meshiantatsica. Irootaquequeate querocampate incojiaquerini iriatimpajia.

19

Iopianajagueti Paavoro Epesoqui

¹ Oraqueate choocatirajagueti Aporoshi Corintoqui, irira Paavoro itoncotoncoguetanaquequeate otsempipae ipianaja Epesoqui. Inejajiapojaqueri quemisantajiatsica. Teequeate iroshequiamajateji.

² Icoacojiaqueri icantajiguiri:

—Iroqueragueti piquemisantaquegueti չari icoraquetaque Ishire Aapani Irioshi ichoocashirentaquempi?

Icantajiguiri:

—Teequea nonquemacojigueri chooca Ishire Aapani Irioshi.

³ Icantajiguiri Paavoro:

—Iroosacanicate չtaampate opajita piviñacajatashijiaca?

Iriatimpajia icantajiguiri:

—Iroguenti noviñacajatashijiaca cameetsanijite nonetsanatimentajiaqueronijite itsatacantica Joancani Viñacajatantatsica.

⁴ Icantiri Paavoro:

—Oraqueate iviñacajatantaquegueti Joancani mana iviñacajatantaque cameetsanijite iroonijite intsatantajitaquemparoca jac yovashiantanaquero iguempevaerejia, cotanquitsi icantajiaqueri: ‘Pinquemisantajiaqueri impoitapojenanca’, iriofea Quirishito Jesoshi.

⁵ Iroompaqueate iquemajiaavaquitigui yoviñacajatacaantajianaca ivajiroqui Amajirote Jesoshi.

⁶ Ariqueate Paavoro ipamijiaqueriqueate, ariqueate icoraquetapojaque Ishire Aapani Irioshi ichoocashirentajapojaqueri, imapocantajianacaca iquenquetsatantajianacaro otsipapae quenquetsatsarentsipae teeca intsajiatempaji, itsavetantajiaqueroqueate icamantajiaquerica Aapani Irioshi.

⁷ Iriraqueate viñacajajianquitsica yovegarataca 12.

⁸ Ariqueate yoapinitaque Paavoro 3 taai shinagogaqui icapiocapinijiacagueta joriojia iquenquetsataque, teequea impashiventempaji. Itsavetanqueri Aapani Irioshi quero icota imajirontague, icamantamajajiaqueri.

⁹ Cotanquitsi iconoagarantajiaca imaintajiaquero icamantajiaquerica, teenicate irinintajiguenticate inquemisantajigueteriji irira Quirishito, ariquea icapiocajiacagueta maasano manaquea inijashinajianacaro Quenavo quirontsi Iroomajaca.

Itsinampirejantanajaca Paavoro itsipajianacari quemisantajiatsica yoajianaque itsatacaantigueti Tirano. Ariqueate iquenquetsatavacaapinijiaca oraniqui ogantaga savincaguiteriqui.

¹⁰ Ariqueate iquejetanaquero imaica aavaepojacani mavite ajagantsi itsavetantanaqueri Amajirote Jesoshi, irootaquequeate iquemacotantajiacarica maasano guntenijiatsica Ashiaqui, jorojia aisa guiriegojia.

¹¹ Aapani Irioshi yagavejacaamajataqueri Paavoro yantaguetantacaca teeca irinejajiguetoji.

¹² Irootaquequeate yantimatavaquerogueti Paavoro paañopae irooca quitsaarentsipae, ariqueate icoraquejiapoji itsipa yaanaquero, yaajianaqueneri ashinoncajajianquitsica, ariqueate ipejaianaja. Ariqueate iquejejianaja ichoocashirentajiaqueca ampatsinipae isotoajianaque choocashirentajiavetacarica.

¹³ Cotanquitsiqueate chooca iconoagarantajiaca joriojia iquenaguetanaque gunteninintsipaequi mana yantavaeventiroqueate yonigaanontajiapinitacari caquintejia ichoocashirentajiaqueca ampatsini. Ariqueate inintajavetaca inquejejiaquemparime Paavoro yonigaaguetariegueti ampatsinipae iroguenti yaventashijiacari ivajiro Amajirote Jesoshi, icantantajiacarica choocashirentajiaquerica apaniro caquinte:

—Imaica naventashitantajiaquempiro ivajiro irira Jesoshi itsavetantica Paavoro noncantajiaquempiqueate pisotoajianaje pijajiae.

¹⁴ Arikea iquejejiaca irijanijiate jorio icantajit-

ica Eseva. Irira Eseva irio saserorote anaantan-quitsica, irijanijiate ivegarataca 7.

¹⁵ Cotanquitsiqueate iquejejiacagueti imaina icantajia vecarigueti ampatsini, mana ipigatanacari icantiri:

—Naatimpa notsataqueri Jesoshi iriguenti agavejamajatatsica, aisa irira Paavoro noquemacotiri, cotanquitsi ¿taampate pinajiaque aviatimpajia?

¹⁶ Ariqueate irira caquinte ichoocashiren-queca ampatsini ishiashitanacariequeate itaviajianaqueri icapocapotanaqueri yagave-jajiaqueriequeate iperejacojiaqueri iiitsaare, irootaquequeate ishiantajianacaca cajaratsinojia chochororo iriraja.

¹⁷ Iroompaqueate iquemacojiaquerigueti maasano joriojia jerijia maasano guiriegojia quintenijiatsica Epesoqui itsaroajianaque, irootaquequeate ishineventantajianacarica Amajirote Jesoshi, icantajogui:

—Irira queate Amajirote Jesoshi iriguenti caaviji yagavejamajati.

¹⁸ Ariqueate icoraquejiapojaque oshequi quemisantajiatsica icamantacojiaquero yantagushejiguica, icantajogui:

—Jero oca nantaqueca teeca oncameetsateji. Nonintaque irogameetsantajena Aapani Irioshi.

¹⁹ Oshequini matsiguetsica aisa itsipajia aventapinijigaroca iragavejane ampatsini yamatavijantajiacarica itsipapae, yamajiaquerroquea tionarentsipae yashintajiacaca, irootaque otsatacaavecariaca yantantaguevecaroca. Icapiocajiaquero ariqueate itaimojaqueri

maasano caquinteja. Ocapiocacagueti maasano paperi ovegaravaetaca, ari ovegaratacani 50,000 imentaquitsitepae.

²⁰ Arimpaqueate yoshequiamajatatinimaja quemisantajiguirica Amajirote aisa arimpaqueate i quemisantamajajianaquero quenquetsatsarentsi tsavetantaquerica Amajirote, yamenajiaquerotarite arimaja ocantamajataque.

²¹ Ariqueate Paavoro ipintsatanaja iroanaje Jerosarequi inquenanajequeate Maseroniaqui aisa Acayaqui, icanquetarite:

—Noanaqueueti Jerosarequi, ariqueate nopintsataca noavaetanaque Iromaqui.

²² Ariquea itigarancaqueri mavite amitacojiguirica, irira Timoteo aisa Erashito, iroanaque Maseroniaqui, cotanquitsi iriatimpa choocatiraja Ashiaqui.

Icatsimajianaqueueti Epesoquitica

²³ Ariqueate irira Epesoquitica icantimentajiaquero Quenavoquirontsi Iroomajaca, teequeate capichaji incatsimajigueji.

²⁴ Iriguentiqueate quejetacaantaquero Irimitio vichajiroca cavorejatatsica. Iriatimpa iriguenti vichajiroca teemporojaniqui iquejetacaacaro teemporo itsaroventajigarogueti irioshivijitashitaca Aretemisa.* Iriraqueate antimojiguirica yaantamajataroqueate imentaquipae.

²⁵ Icapiocantajiacarica aisa quejejigarica iriatimpa vichajiroca cavorejatatsica icantajiguiri:

* **19:24 Aretemisa.** Irirajia Iromaquitica icantajiguiroquea **Diana.**

—Aviatimpajia pitsajigui irooqueate aantajiac
imentaqipae antajiguica.

²⁶ Cotanquitsi imaica pamenajigueja irira Paavoro iquenquetsataquegueti icanquequeate iriraqueate irioshivijrentsi yantajiguica caquinte teequeate irioquea irioshimajaca. Piquemajiaqueri aviatimpajia. Imaicaqueate imaica yoshequianaque guntenijiatsica acanqui Epesoqui quemisantajiaquerica. Cotanquitsi teequeate apaniro inquejetero ocatica, ariqueate itsitacaguitejanacaro aisa maasano Ashiaqui.

²⁷ Quejetanquitsica imaica teequeate oncameetsateji, manaqueate aato aantajijaarotsi imentaqipae, aisa oteemporote arioshite Aretemisa anaantanquitsica manaqueate irovashiantajitanaquero intati, aatoqueate ishineventajitarotsi. Maasanotarite shineventajiacaroca guntenijiatsica Ashiaqui jerijia aisa otsipapaequi aatoqueate ishineventajijaarotsi.

²⁸ Iroompaqueate iquemajavaquitigui opejianaqueri itsimajenca icajemajianaquequea ican-
tajigui:

—¡Cameetsavaetaque Aretemisa, atsaroven tajiac
Epesoquitica!

²⁹ Icajemajianaque ishiajianaca queate maasano guntenijiatsica oranqui, yaajiapo-
jaqueri Gayo aisa Arishitarico, yaajianaqueri yoajianaque icapiocapinijiacaguetti. Iriguentijia Maseroniaquitica itsipajiacaca Paavoro itsavetantirigueti Amajirote.

³⁰ Irira Paavoro inintavetaca queate iroanaqueme iriatimpa, cotanquitsiqueate irapiguemisantarijijateni icantajiaavaqueri:

—Aatota pijati.

³¹ Ariqueate iquejejiaca majirontajiatsica Ashiaquitica iconoagarantajiacaqueate ipintsatacari Paavoro, icantacaantajiaqueri aatonijite ijati icapiocajiacaguetai.

³² Ontaniquiqueate icapiocajiacaguetai icaje-majianaque, itsipaqueate cantashitatiavacaroca, cotanquitsi yoshequiamajatatinimaja teeca intsajigueji taaca icapiroquimentajaca.

³³ Iconoagarantajaca joriojia inejaitatiguiri Ar-ijantero ariqueate ichoocaque iriatimpa oraniqui, ariquea yaajianaqueri yoajiaqueri niganqui inquenquetsatacamentajiaqueriniji. Arikea iriatimpa itinajavacovetanaca cameetsanijite inquemisantimentajavaquerinijite maasano inquenquetsatacaaquerime.

³⁴ Cotanquitsi iroompaqueate itsajiaqueriguetai iriguenti jorio, arimpaqueate icajemamaja-jianaque aricampa mavite hora, icantajigui:

—¡Cameetsavaetaque Aretemisa, atsaroven-tajacaca Epesoquitica!

³⁵ Iriraqueate sequeretario tioncatsica ariqueate yagavejajianaqueriguetai yoguima- jerentajiaqueriguetai icantajiguiri:

—Aviatimpajia Epesoquitica, pinquemisan-tajiguena, maasanotarite otsitacagui-tejacovaetanacaro itsajitiro aatimpajia aroguentijia quempoguijajiguiroca teempor o itsaroven-tantajitaroca Aretemisa jero aisa mapi quejecaroca iroatimpa parianquitsica jenoqui inquitequi coramani.

³⁶ Aato ichoocati cantashitatiacuemparoneca, irootaquequeate nocantantajiaquempica

pinquemisantajiguena. Aatoqueate taaca opajita pantajiguitsi. Aatoshiatsi, iroquetita pinquenquejamajajigue.

³⁷ Iricatica pamajiaqueca tee iraitsigueteroji choocaguetanquitsica teemporoqui itsaroventantajitaroca Aretemisa, aisa tee irinijashitemparoji ariosohite.

³⁸ Pincantajigueriqueate Irimitio jerijia antavaetimojiguirica, choocaca inintajiaqueca incatsimajiaqueri, iiintsija iroajianaque icantomajantajiguigueti joese irioqueate quemaquerine, irootarite ichoocatashijiaque incantajiaqueriqueate quericaca quejetanquitsica aisa quericaca teeca inquejetempaji.

³⁹ Cotanquitsi choocagueti otsipa tsimajajiaquempica poguijajigueriqueate majirontajiatsica incapiocajiaquempigueti ariqueate pincantajigueri.

⁴⁰ Imaicaquea imaica aatoshiatsi icamantacojitajitsi amajirojiatequi, ijiqueji irooca acapiocashijiaca anaimanajiaqueri, ariqueate incoacojicacajigueti: ‘¿Taate picapiocashijiaca?’ querocampate ancantajianaque.

⁴¹ Iroompaqueate icantaquegueti, itigarancajajiri maasano capiocajianquitsica iroajianaje.

20

Yoanaquegueti Paavoro Maseroniaqui

¹ Ariqueate isanticojianajigueti Epesoquitica, irira Paavoro icajemajiaqueri irapiguemisantarrijateni icapiocajiaqueri itsatacaaajiaqueriqueate yavinajavajiri. Arikeate iquenquetsatacaa-jianajiri icantajiguiri:

—Noanaquequeate Maseroniaqui.
Ariqueate yoanaque.

² Iquenaguetanaquequeate iquenquetsata-
caajianaqueriqueate irapiguemisantarijiate
itampishitacajaianaqueriqueate inquemisan-
tamajajiaquerija Quirishito. Arikeate
yarejerejeivaetani Gureshiaqui.

³ Arikeate ichoocatanaque ontaniqui 3 taai.
Arikeate pajinimequeate intetanaquempame
iroanaqueme Shiriaqui iquemacojiaquerijoriojia
isariajiacari irimetojajiaqueri, ipiantanajaca
Maseroniaqui.

⁴ Iriguenti itsipajianaca Sopatere (irijanite
Piro poneanquitsica Vereaqui), Arishitarico jeri
Segonto (ponejaianquitsica Tesaronicaqui), Gayo
(poneanquitsica Terevequi), Timoteo, Tiiquico
jeri Toropimo (ponejaianquitsica Ashiaqui).

⁵ Iriatimpajia ijivajianaque yoguijaguijaiavae-
tana Toroashiqui.

⁶ Arikeate anaapojacaguetti savincaguiteri ish-
ecatantajitaroca pan teeca inconoantajitemparoji
anempoantaca notenoteitanaca noponeponei-
tanaca Piripoqui. Arikeate aapojacaguetti 5
savincaguiteri notonquivotonquivoitavajari
Toroashiqui. Arikeate nochoocajianaque 7
savincaguiteri.

⁷ Arikeate aapojacaguetti savincaguiteri
pariapojaroca semana* nocapiocajiac
notsipajiacari napiguemisantarijiate
noncotarejaquero pan noshecajiaquemparo

* **20:7** Iroguenti opariantanaja semana savincaguiteri tominco.
Irootaque ipochatantajaca Jesoshi.

nonquenquejajiaqueri irira Quirishito
 imetojaventajiaquitajigueti. Arikea
 iquenquetsataque Paavoro iroosatiquea
 inianquiitetacovaetanaque, itsaquetarite
 osavincaguitetanajegueti iroanaje.

⁸ Ariguenti nochoocajiaqueni oshitamencoshi-tamencoatacagueti jenoqui notsivojiacaqueate.

⁹ Arikeate ichoocaque oraniqui iriaqueraca quenquevaritananquitsica icantajitica Eotico, isavicaque omorotacagueti. Osamanitarite iquenquetsataque Paavoro, iriraquea Eotico ipochoquitanaque imaanaque, cotanquitsi iroompaqueate imaamajavetanacagueti isorocanaquequeate yomposapojacaca isavi tan. Yoajiavetanacaqueate yaajiavetapojacariequeate, jac metojanaquequeate.

¹⁰ Cotanquitsiqueate irira Paavoro
 yaguijitashitsitanacari yovanquetapojacari
 ineguiqui yavinatanaqueri, icantajiaqueri
 maasaño:

—Aato pitsaroajiguitsi, jeri pochatanaji.

¹¹ Arikeate ipianaja Paavoro jenoqui, icotarejaquero pan yojocajiaquenaro maasano, arikeate noshecajia. Yapijita jiroqueate iquenquetsatanaji aisa irosatiquea isavincaguite-tacotantanajaca. Arikeate yoanaji.

¹² Irira Eotico itsipajianajari itsovironaquitequi peamajatanajaqueate ishinejiaca maasano.

¹³ Naatimpajia nojivajivaitanaquequeate namajatacojianaquequeate quenajarontsiqui noajianaque Asoqui naajapanajanteriqueate Paavoro, iriatimpa iroguenti ishivoquitanaca que-navoquirontsiqui.

¹⁴ Ariqueate notonquivojajiajari Asoqui notejianajiriqueate noajianaque Mitirenequi.

¹⁵ Osavincaguitetamanaquegueti nogaajianaca nanajaianaquero Quio. Ariqueate otsipatapojacaguerti savincaguiteri nagatacojiapanajanti Samoshiqui. [Nagatacojiapanajanti Torojirioqui,] otsipa savincaguiteri nagatacojiaque Miretoqui.

¹⁶ Apatiroti noajianaquero teequeate nagatacojigueji Epesoqui, teenicate irininteji Paavoro inchoocate oshequi savincaguiteri Ashiaqui, manatarite taampina inanaque inchiquiompare irarejetempa Jerosarequi aricaca iragavejaquempagueti irogavisaquitero ontaniqui savincaguiteri icantajitica Pentecoshite.

¹⁷ Ontaniquiqueate nochoocajiaquegueti Miretoqui ariqueate itigarancaque Paavoro camanta jiaquiterineca quempoguiajiguirica quemisanta jiatsica guntenijiatsica Epesoqui, icampojaqueri:

—Icajemacaanquempi Paavoro.

¹⁸ Icoraquejiapojaquegueti icantajiavaqueri: “Aviatimpajia pitsajiaque quero nocotaquita nochoocatimojiaquitimpigueti. Iroaqueragueti nocoraquetaque acaniqui Ashiaqui nocomajataca irosati imaica.

¹⁹ Ogantaga nantavaetaqueneri Amajirote, tee naventacotempaji, mana oparijaatanaque oshequi nojaquia, aisa natsipevaetaca isarijavetaquenagueti joriojia, inintajavetacatari irimetojajiaquename.

²⁰ Teequeate novashiantejí aparo noquenquetsatacaaajiaquempagueti noguisotoama jataquempiro maasano. Notsatacaaajiaquempi

pichoocajiaquegueti icapiocajitagueti jero aisa pitsovironaquitepaequi.

²¹ Aisa notsatacaaajaqueri joriojia jerijia aisa guiriegojia nocantajiaqueri incantashitatijaiana-jempa irovashiantajianajero iguempevaerejia in-quemisantajiajeri Aapani Irioshi jeri aisa Amajirote Jesoquirishito.

²² Imaica noanaque Jerosarequi, iriguentitari tigarancaquena Ishire Aapani Irioshi. Teequea nontsateji taaca oaquenane.

²³ Iroguenti notsataque querocagueti noanaque icanquenaqueate Ishire Aapani Irioshi mana irashitacojitaquena santanaqui aisa irantsipetacajaiquena.

²⁴ Cotanquitsi naatimpa tee nontsarogueji capichaji, teenicate nontsaroacaguemparoji nometojaquegueti. Iroguenti nonintaque nonteroncamajaquero maasano icantaguetaque-naca Amajirote Jesoshi, nontsavetantaquero Quenquetsatsarentsi Oganejencatatsica camantacajica quero icota Aapani Irioshi icavintsajantigueti.

²⁵ “Coramani noquenquetsatacaaajaquempi noquenaguetanaquegueti notsavetanqueri Aapani Irioshi quero icota imajirontagueti. Imaica not-samajataque aato pinejajijaanatsi maasano avi-atimpajia.

²⁶ Irootaquequea imaica nocamantantajiaque-mpica choocagueti teeca inquemisantajigueji tee-queate naroguenti quejetacaanterine impeaque-mpagueti.

²⁷ Notsavetantaguequerotari maasano icanquenaca Aapani Irioshi, teequeate

nomanacoteji aparo.

²⁸ Irootaquequeate nocantantajiaquem-pica inchiquiotsiqueate pamenajiajempa aviatimpajia. Pinquempoguijajajerija maasano quemisantajiatsica, iriguentitarite cantajiaquempi Ishire Aapani Irioshi pinquempoguijajajerija quemisantajiguirica Amajirote metojaventajiacajica, ivegaratantajiacajiro iriraja.

²⁹ Naatimpa notsamajataque iroom-paqueate namerencanaquitatiguempa incoraquetashijiaquempi amataajatiatsica iroguivorocajiaquempi inquejejiapojaquempari lobo[†] yoguivoroquirigueti oveja.

³⁰ Aisa iconoajiaquempi amataajatiatsica intsata-caajiaquemriqueate teeca iroomajaca iramatavi-jajiaqueriqueate intati yapiguemisantavetacaca iriguentijiatari iroguijatacojianaque.

³¹ Cotanquitsi naatimpa noncantajiaquempi inchiquiojia yamatavijajiguimpitsi. Aato pipeacojigarotsi ogantagatarite notsatacaa-jiguimpi savincaguiteriqui aisa tsiteniriqui niraaniraavaetacaqueate irosatiqueate najagantsitacotanaque 3 ajagantsi.

³² “Imaica, napiguemisantarijjateni, nocan-queri Aapani Irioshi inquempoguijajajempi. Pinquemisantamajatero Icanqueca caman-tajiacajica icavintsajajiacajigueti iriatimpa, irooqueate tampishitacaajajempineca. Coajica incapiocajiacaji ontaniqui ichoocaquegueti

[†] **20:29** Irira **lobo** iquejevercar i shishi iririjeguini catsimari. Ichocati tomirishiqui otsipaniqui guntenintsiqui.

iriatimpa, anconoajiaquempari maasano icoguiajiaqueca imeshiajiaqueca.

³³ Naatimpa teequeate nonintsijigueri itsipa igavorejaquirite, imentaquitsite, iitsaarepae.

³⁴ Pitsajiaquetarite aviatimpajia, inchiquiotsi nantanontaca naatimpa nacoqui naaguetigueti nonintaguequeca aisa nojocajiguinirica notsipajiacaca.

³⁵ Oraqueate noquejetaquerogueti imaica cameetsanijite poguijatacotimentajiaquenanijite pincavintsajimentajiaquerinijite coacojianquisica. Pinquenquejajajero icanqueca Amajirote Jesoshi icanti: ‘Caaviji anaantaque ocameetsama-jataque pincavintsajantajiaquegueti, anaquiero aviguentijiaca incavintsajaitaque.’ ”

³⁶ Iroompaqueate icantajiaquerigueti igueron-canaca yamanaqueri Aapani Irioshi itsipajiacari maasano.

³⁷ Irabajianacaqueate maasano, yavinajjavajiri Paavoro, inintavorotavajiriqueate.

³⁸ Ishimampojancavaejianacaqueate iquemajiaqueritarite icantajianajiri aato inejajiajirtsu. Ariqueate itsipatsipaitanacari yojocajijaatiri inirojeguiqui quenajarontsi yamenajjavajiri itetanaja.

21

Yoanaquegueti Paavoro Jerosarequi

¹ Ariqueate nopintsamajajiavecari napiguemisantarijijateni, aritaque noajianaji notejianaja namajatacojianaque, catinca noajianaquero Coshiqui. Ariquea osavinca-guitetanajigueti nogaajianaca, ariqueate

noquenajatacovaetanaque Irorashiqui.
Osavincaguitetanajigueti nogaajianaca aisa,
noquenajatacovaetanaque aisa Pataraqui.

² Ariqueate nonejajiapojaquero inirojegui
quenajarontsi oananquitsineca Penishiaqui,
ariqueate notejianacaro.

³ Ariqueate namajatacojianaque noajianaque,
namenacojianaquero Tspere iroguenti
ochhocatantaca najampatequi. Nanaanaquero
noajianaque Shiriaqui, ariqua nagatacojia-
panajanti Tiroqui irogaguijtanaqueroqueate
ajaararontsi.

⁴ Ariqueate oraniqui nonejajiapojaqueri
quemisantajiatsica, yaajiavaquena ariqueate
nomaimojianaqueri 7 savincaguiteri. Ontaniqui
nochoocajiaquegueti Ishire Aapani Irioshi
iquenquetsashirentacaajiaqueri iriatimpajia
icantantajiavetavacarica Paavoro:

—Aatocaja pijati Jerosarequi.

⁵ Aapojacagueti nopintsatancaca ariqueate
noajianaji nosotosotoitanaqueroqueate
ovegarapojacagueti tsovironaqipae. Maasano
iriatimpajia jerojia aisa imanquigarejia
jerijia irijanijiate itsipajianaquena otsapijaqui
impanequivi. Notigueroajianacaqueate
namanajiaqueri Aapani Irioshi.

⁶ Ariqueate noquenquetsatacaaajianajiri, ican-
tajiajavana iriatimpajia: “Iintsija”, ariqua note-
jianaja noajianaji. Iriatimpajia ipiapaitanaja
itsovironaquitequi.

⁷ Ariqua nopponeanaca Tiroqui, namajat-
acotanaque noajianaquero Toremairaqui,
ariqueate nagatacojiapojaque oraniqui.

Noajianaquequeate nonejajiapojaqueri
napiguemisantarijijateni, aparo nomaimojiana-
queri.

⁸ Osavincaguitetanaquegueti noajianaque
Sesareaqui narejerejeipojaca itsovironaquitequi
Jeripe tsavetantiroca Quenquetsatsarentsi
Oganejencatatsica. Iriatimpa iriguenti itsipajiac
7 cavintsajajiguirica quemisantajatiatsica inintaca-
jaitaqueca iroaqueragueti savicavenqueroneca
irojocajiaquenero osheca coacojianquitsica
guntenijiatsica Jerosarequi.

⁹ Choocaqueate 4 irorijanitejia majinaroja.
Iroatimpajia iroguentijia tsavetantajiguiroca
icantajiguiroca Aapani Irioshi.

¹⁰ Nochoocajianaquequeate oshequini savinca-
guiteri, icoraquetaquequeate tsavetantiroca
icanquerica Aapani Irioshi icantajitica Agavo.
Iponeaca Joreaquí,

¹¹ iroguenti icoraquetashitaque irinejaji-
aquitena. Yaitsitanqueriqueate ichompimashite
Paavoro yoishoguititaca aisa iracoqui, icanti:

—Icanti Ishire Aapani Irioshi: ‘Ariqueate
inquejejiaqueri joriojia Jerosarequitica
iroishojiaqueri ashintarica irica ichompimashite,
ariqueate irojocajiaqueneri teeca iriojia joriojia
irajaianaqueri.’

¹² Iroompaqueate noquemajiavaquitigui
naatimpajia jerijia aisa guntenijiatsica
Sesareaqui nocantajiatavajariqueate Paavoro:

—Aatocajate pijatitsi Jerosarequi.

¹³ Cotanquitsiqueate icanti Paavoro:

—¿Taaquea oaquempi piraantajiacaca?
Naroguenti pishimampojancacaanaca. Teenicate

nompincatsateroji iroishojitaquenagueti.
 Iriogueti nintanquitsine Amajirote Jesoshi
 nometojaventaqueri Jerosarequi, aatoqueate
 nagamajarotsi nometojaquegueti.

¹⁴ Nocantajiavecari, cotanquitsi teequeate in-
 quemisantajiguuenaji, aatoquea nocantajiri, ario-
 tapojaque. Nocantajiaqueri:

—Iriompate Aapani Irioshi querocacaqueate in-
 inqueca.

Yarejetacagueti Paavoro Jerosarequi

¹⁵ Ariqueate nonetsanajianaca noajianaque
 Jerosarequi.

¹⁶ Yoguijagarantajianaquena napiguemisan-
 tarijiateni guntenijiatsica Sesareaqui,
 yamajiaquenari Manaso poneanquitsica
 coramani Tsiperequi irioquea quemisantatsica
 coramani, ariqueate nomaimojiaqueri.

¹⁷ Ariqueate narejerejeipojacagueti Jerosare-
 qui yaajiavajanaqueate napiguemisantarijiateni
 ishinejianaja.

¹⁸ Osavincaguitetanajigueti itsipajianaquena
 Paavoro noajiaquitiqueate nonejajiaquitiri
 Santiago. Ariqueate ichoocajiaque maasano
 quempoguijajuirica quemisantajiatsica
 icapiocajiacaqueate.

¹⁹ Irira Paavoro iquenquetsatacaaajiaqueri it-
 savetacotaquero maasano quero icotani yagave-
 jacaaguetaquerigueti Aapani Irioshi iquenquet-
 satacaaajiaquerigueti teeca iriojia joriojia.

²⁰ Iroompaqueate iquemajavaquitigui ishin-
 eventajianacariqueate Aapani Irioshi. Icantajigu-
 iriquea:

—Cameetsataque, napiguemisantarite, cotanquitsi choocajia yoshequiamajatatigunimaja apijoriojateni quemisantajiguirica Quirishito iroguenti inintaque irinetsanajiguero itioncacotanaqueca Moishishini.

²¹ Iriatimpajia iquemacojiaquempi pitsatacaaaji-aqueri joriojia quinteninijiatsica osamani conoajiacarica teeca iriojia joriojia ijijiaqueji pitsatacaaaji-aqueri cameetsanijite aatonijite inetsanajiajiro itioncacotanaqueca Moishishini. Aisa ijiji-aqueji picantajiaqueri aatonijite itotsaiquitsijajiri ichonquimashi irijanijiate aisa aatonijite yoguijatacojiajirotsi icantajiguinica avaesatinijiate.

²² ¿Querocampa ancojiaquempani? Imaica inquemacojiaavaquempigueti incapiocaventajiapo-jempi.

²³ Noquenquejajiaque caaviji ocameetsataque pinquemisantajiaquenagueti noncantajiaquempica. Chooca acaniqui 4 shiramparijia jocaguinatacaantajianquitsineca irinetsanajiaquerogueti icantajiaquerica Aapani Irioshi icantajiguiri: ‘Coajica nonetsanajiaquerogueti nocamantajiaquempica nojocaguinatacaantajiaquempa.’

²⁴ Paajianaqueri teemporoqui pintsipajianaquempari pincanteri Aapani Irioshi irogameetsatantajajempica. Pivegarajigueneri maasano cameetsanijite irojocaguinajiaquempa. Irootaquequeate intsatantajiaquempaca apijoriojateni mana itsojeventajitaquempi intati, ogantagatirajatarite pinetsanatiro itioncacotanaqueca Moishishini.

²⁵ Cotanquitsi irira teeca iriojia joriojia

quemisantajiatsica notioncajiaqueneri mana nocantajiguiri intati aatoqueate ishecajijaaritsi imetojajitaquenerica ipejaiguica irioshivijitashitaca, aatoqueate ishecatacojijaarotsi iriraja, aatoqueate ishecajijaaritsi icaticajiguetica, aisa aatoja ijatashijajirotsi manquigarentsi teeca iro irashi.

²⁶ Ariquea iquemisantajiaqueri Paavoro. Osavincaguitetanajigueti itsipajianacari jocaguinajianquitsineca irogameetsajiaquempa. Ariquea yoanaque teemporoqui itsaroven-tantajitarica Aapani Irioshi icamantajiaqueri saserorotejia querocaca onteroncantanajempaca irogameetsatantajajempaca cameetsanijite irijitorejajiaqueneri Aapani Irioshi viratsipae.

Yashitacojitaquerigueti Paavoro santanaqui

²⁷ Ariqueate pajinigueti onteroncanajempaji savincaguiteri yogameetsatantajiacaca, iriraquea joriojia poneaguetanquitsica Ashiaqui inejajiaqueri Paavoro oniganquirequi oticaacoroqui teemporo yogametsajajiaqueriquea capiocajianquitsica, icatsimajianaquequea, ariqueate yaajiaqueri.

²⁸ Arikeate icajemajianaque icantajigui:
—Shiramparijia ishiraerijia, pamitacojigue-nashiatsi. Iriotaque irira quenaguetatsica amatavijajiguirica caquinte. Iroguenti isavicaventi itsatacaaajaqueriqueate maasano, iquenquetsatacoguishetaqueri agonorojia jero aisa maasano itioncacotanaqueca Moishishini. Aisa inijashicaro ocatica teemporo. Aisa yama-jiaqueri guriegojia yoguijaajiaqueri acaniqui

teemporoqui, icovaeguishetacaantacaroca
ocatica yashintacaca Aapani Irioshi.*

29 Icantantajiacarica yamenajiaqueri
itsipajiacari Toropimo poneanquitsica Epesoqui
ijiqueji ariji itsipatacari iriatimpa teemporoqui
itsaroventantajitarica Aapani Irioshi.

30 Opejianaqueri itsimajenca maasano, ishija-
iapojaca yaajiapojaqueri Paavoro, inoshicajiana-
queri sorororo soaa yaajianaqueri sotsiqui otan-
totacotacagueti teemporo. Taampina yashija-
quiero osotomoro.

31-32 Irovepojaca irimetojajiaquerime,
cotanquitsi iroompaqueate icamantajitaqueri
imajirote coaretajia opejianaqueri itsimajenca
maasano Jerosarequitica, icajemajiaquequeate
icapiocajiaqueriqueate igoaretajiate jerijia
aisa itsipajia imajirojiate, ishiamajajanaca
yoajianaque iramenajiaquiteri. Iroompaquea
inejajivaqueri iriatimpajia, yovashiantajia-
jiriqueate Paavoro teequeate intavaajajeriji.

33 Ariqueate icoraquepojaque imajirote coare-
tajia yajiricapojaqueri Paavoro ishiticacaanqueri
mavite cavorejatsari. Icoacojiaqueri catsimaja-
querica icantiri:

—¿Taa ipajita irica? ¿Taate opajita picatsimati-
mentajiaqueri?

* **21:28 icovaeguishetacaantacaroca ocatica yashintacaca Aapani Irioshi.** Chooca 3 oniganquitejirepae teemporo. Chooca
aparo irashi shiramparijia ishiraerijia, chooca otsipa ashi man-
quigarentsijia ishiraero, chooca otsipa irashi itsipajia teeca irio
ishiraeri. Inquijajegueti teeca irio ishiraeri niganquitejirentsiqui
irashi ishiraeri, irimetojajiteri, icanqueuea covaeguishetanaca.

34 Cotanquitsi iriatimpajia arimpaqueate icajemajianaqueri icantashitatijaianacaro icantaguetaquerica itsipaqueate cantashita-tiavacaroca teequeate aparo incantajigeriji, irootaquequeate tee inquemamajajigueri imajirote coaretajia, yaacaantantacarica Paavoro itsovironaquitequi coareta.

35 Iroompaqueate yarejejiapojacagueti yataitapinijiguigueta coaretajia, icompi-jianacariqueate yogajenocajianaqueriqueate aatonijite yaajiavaqueri catsimajiaquerica.

36 Yoguijaguijaipojaqueriqueate icajemajiapo-jaquequeate:

—¡Imaicaschia irimetoje!

Paavoro iquenquetsatacaaajaquerigueti capio-cajianquitsica

37 Pajinigueti inquijacaanaquerime sotomorontsiqui iquenquetsatanaque Paavoro icantiri imajirote coaretajia:

—¿Cameetsampa nonquenquetsatacaguempi?

Icantiri:

—¿Pitsatirompate aviatimpa iguenquetsatsare guiriego?

38 Iroosacanicate, ¿teesacanica aviguenti irira Ejepitoquitica nintavetanquitsica iroguisotoaquerime majirontatsica aajiana-querica 4,000 metojantatsica ontaniqui oquitamampororoipojaquegueti?

39 Icantiri Paavoro:

—Tee. Naatimpa naroguenti jorio, ariguenti novogui Tarisoqui ora caavijica iquemacomajajiti Shirishiaquitica. Iintsija pincante nonquenquet-satacaaqueri capiocajianquitsica.

40 Iriraqueate imajirote coaretajia icantiri:
—Iintsija.

Icatianacaqueate Paavoro yataitampinitacaca coareta, icanti vacoc. Imajerejianaquegueti maasano iquenquetsatacaaajaqueri, iquenquet-satantacaro iguenquetsatsare evereo, icanti:

22

1 “Nogonorojia aisa nomajirojiate, pinquemisantajiavaquena nonquenquetsaventanaquempagueti.”

2 Iquemajiajaquerigueti iquenquetsatantanacaro iguenquetsatsare evereo iquemisantamajajiajaqueri. Ariqueate icanti Paavoro:

3 “Naatimpaqueate naroguenti jorio, ariguenti novogui Tarisoqui choocatanquitsica Shirishiaqui, cotanquitsiqueate ariguenti noquenquevaritaque acaniqui Jerosarequi. Iriguenti tsatacagana Gamarieri maasano itsatacaantica avaesatinijiate. Ogantaga noquemisantamajatiri Aapani Irioshi noquejejaquempi aviatimpajia imaica.

4 Coramani caaviji nocatsimamajatiri guijatacojiguiroca ocatica icantajitica Quenavoquirontsi. Naajianaqueri shiramparijia aisa manquigarentsijia irashitacojitaqueriqueate santanaqui irosatiquesteate irimetojajiguetaqueri.

5 Irira saserorote anaantamajatanquitsica, jerijia majirontajiatsica itsamajajiaquena arimaja nocantamajataque imaica, iriojiatarite jocajiavaquenaroca paperi naajianaqueneri agonorojia quintenijiatsica Tamashicoqui

cameetsanijite naimentajiaquerinijite quemisan-tajiatsica naajianaqueriqueate Jerosarequi irantsipetacaimentajitaquempariniji.

⁶ “Cotanquitsiqueate iroompaqueate naavetanacarogueti oquempejipojaquegueti Tamashico pajinigueti intampaticatapojaque catsirincaiteri ocantanaquitiguiqueate morec oponeaca jenoqui inquitequi oashitapojaquena anquiritacotapojaquena.[◊]

⁷ Notejanaque isaviji quepatsiqui toren no-quemiqueate icantajipojana: ‘Saoro, Saoro, ¿taa picatsimatantaquenaca?’

⁸ Naatimpaqueate nocantsitariqueate: ‘¿Taam-pate aviatimpa, Nomajirote?’ Icantanaqueate: ‘Naatimpa naroguenti Jesoshi Nasarequitica pi-catsimaqueca.’

⁹ Iriraqueate notsipajiacaca yamenava-querogueti ocantanaquegueti morec, itsaroa-jianaquequea, cotanquitsiqueate teequeate inquemajigueriji quenquetsatanquitsica.

¹⁰ Naatimpaqueate nocantiri: ‘Nomajirote, ¿quiero noncoquempani?’ Ianti iriatimpa: ‘Imaica pintinajanaque poanaque Tamashicoqui, ariqueate incantajiquempiqueate ontaniqui maasano taaca pisavicaventaqueca.’

¹¹ Namenavaquerogueti ocantanaquegueti morec ariqueate tee namenajeji, manaqueate yacatsajianajanaquea intati notsipajiacaca, yaajianaquena Tamashicoqui.

¹² “Ariqueate ichoocaque oraniqui apaniro icantajitica Ananiashi tsamajatiroca

[◊] 22:6 Ya. 9.1-19; 26.12-18.

itioncacotanaqueca Moishishini. Maasano joriojia guitenijiatsica ontaniqui Tamashicoqui cameetsaqueate iquenquetsatacojiaqueri.

¹³ Icoraquequitiqueate inejaquitanaqueate. Yarejetapojacagueti icampojaquenaqueate: 'Napiguemisantarite Saoro, pamenanaje.' Ariqueate nocotanaja namenanaji, nonejaqueriqueate.

¹⁴ Arikeate icanquena: 'Irira Irioskite avae-satinijiate icoguiaqueempiqueate cameetsanijite pintsiquerónijite inintaguequeca. Icoguiaque-mpi cameetsanijite pinejaquerinijite irira Caav-ijica Icomajamajata aisa pinquemaqueronijite icanqueca ivagantequi.

¹⁵ Aviatimpa pintsavetanqueri pintsatacaajiaqueri maasano caquinte pincamanteri maasano pamenaguetaqueca aisa piquemaqueca.

¹⁶ ¿Taampa opajita poguijavaque? Pinca-tianaqueja povíñacajatempa paventemparija Amajirote, pincajemaqueri ivajiroqui, cameetsanijite inquivitsitajempironijite piguempevaere.'

¹⁷ "Arikeate nopianaja Jerosarequi noanaquequeate teemporoqui itsaroventantajitarica Aapani Irioskite namanaqueriqueate. Arikeate nonejaitatigiro manaqueate oquejetimotaquena noguimaanequi.

¹⁸ Inegaaquena Amajirote icanquena: 'Pijashiatsi taampina, pisotoantanaquemparo Jerosare, acaniquitarite pintsavetantaveque-naqueate aato iquemisantajiguimpitsi.'

¹⁹ Naatimpa nocantiri: 'Nomajirote, iriatimpajia yamenamajajiaquena coramani

noapinitaquegueti shinagogapaequi ica-
 piocapinijiacagueti joriojia naajianaqueri
 tsaroventajiguimpica nashitacojiaqueri
 santanaqui notavaacaantajiaqueri.

20 Aisa coramani imetojajitaquerigueti
 tsavetantimpinica Ishitivano, ariqueate no-
 choocaque naatimpa noshinevaetanacaqueate,
 irootaquequeate nonetsanatsitantavajaricaque-
 ate iitsaarejia metojajiaquerica.'

21 Cotanquitsiqueate iriatimpa icantana:
 'Pija, nontigarancaquempitarite osamani
 pinquenquetsatacaaajiaqueri teeca iriojia joriojia.'

22 Ariqueate iroaqueragueti iquenquet-
 satanaquegueti Paavoro iquemisantajiave-
 tavacariqueate maasanojia, cotanquitsi
 iroompaqueate iquemajiavaquerigueti
 iquejetanaquero imaica icantigueti inquen-
 quetsatacaaajiaqueri teeca iriojia joriojia
 icajemajianaquequeate:

—Imaicashia irimetoje aatoniji ichoocataji
 acaniqui quepatsiqui. Teequeate oncameetsateji
 iranijajegueti.

23 Arimpaqueate icajemajianaqueri ipishon-
 camagojianaqueroqueate otsipamago iitsaare
 ipishoncavanejianaqueroqueate quepatsivane
 cameetsanijite intsatimentajiaquerinijite
 icatsimamajatatiguirinimaja Paavoro.

24 Irira imajirote coaretajia yoguijajianaqueri
 intsompogui intavaacaantajiaqueri cameetsani-
 jite incankequeate taa opajita icatsimatimenta-
 jiaqueri.

²⁵ Iroompaqueate yoishojoia vecarigueta intavaajiaquerimequeate iquenquetsatanaque Paavoro icantiri tsipatarica imajirote coaretajia catianquitsica acaniqui:

—Naroguentitarite gonorontarica Iromaquitica. ¿Arimpate pagavejaque pintavaacaanquena tequeratanicate incoacomajitenaji?

²⁶ Iroompaqueate iquemavaquitigui yoanaque icamantaquitiri imajirote icanti:

—Aatoshiatsi pitavaacaantiritsi, iriguentisacanicate gonorontarica Iromaquitica.

²⁷ Ariqueate yoanaque ichoocaquegueti iriatimpa icantiri:

—Intsija pincantena, ¿arimaja avirompaqueate gonorontarica Iromaquitica?

Icantiri:

—Jeejeguitatsi, naroguentiguitatsi gonorontarica Iromaquitica.

²⁸ Icantiri:

—Naatimpaqueate mana novegaraventaca intati oshequi imentaquipae nompeaqueempaqueate igonorojia Iromaquitica.

Icantiri Paavoro:

—Naatimpaqueate naroguentiqueate nopeaca igonoro Iromaquitica iroqueragueta novoaque.

²⁹ Ariquea iquenajianaquequea itsaroajianaquequeate tavajaiquerinemea ariquea itsipacarejajapanajantiri. Ariqueate iquejetaca imajirote coaretajia iriatimpa itsaroanaqueinejaquetarite ishiticacaanqueri gonorontarica Iromaquitica.

Yaajitanaquerigueti Paavoro incoacojiteri

30 Iroompaqueate osavincaguitetanaquitigui inintaque imajirote coaretajia intsamajaquero taaqueate opajita icatsimamentajiaqueri joriojia, ishiticarejacotacaanqueri igavorejatsarite. Ariqueate icajemacaantajiaqueri saserorotejia anaantajianquitsica jerijia majirontajiajatsica icapiocajiaqueri. Ariqueate yaajitanaqueri Paavoro yogatiajiapojaqueri ichoocajiaquegueti iriatimpajia.

23

1 Irira Paavoro yamenajiaqueri sorerere majirontajiajatsica icantajiguiri:

—Nogonorojia, naatimpa ogantaga noquemisantamajatiri Aapani Irioshi nocomajamajata irosati imaica. Notsataque tee onchoocateji incatsimatinenquenaca.

2 Iriraqueate saserorote anaantamajatanquitsica icantajitica Ananiashi iquemavaquitigui icantajiguiriqueate choocajianquitsica Paavoroqui:

—Pampatoncavaganteteritsija.

3 Icantanaquequea Paavoro:

—Avirompaqueate irampatoncaque Aapani Irioshi, aviatimpa mana picameetsatamampeaca intati. Iroorijite imaica iroguenti pisavicashiv-etaca acaniqui pimpampiatavaproqueate itioncacotanaqueca Moishishini cameetsanijite pincanque aricampate nantaque teeca oncemeetsate aricaca tee. Cotanquitsi imaica mana pantaque icantimentantaqueca papatoncavagantetacaantaquenagueti.

4 Irira choocajianquitsica acaniqui icantajiguri:

—Oraqueate aato piquejetiri imaica saserorote anaantamajatanquitsica antinirica Aapani Irioshi.

5 Icantiri Paavoro:

—Nogonorojia, teenicate nontsatenica nojiqueji tee irioji saserorote anaantamajatanquitsica. Nontsaquemequeate aatomequeate noquejetirome imaica. Ocantitarite itioncacojiqueca: ‘Aatoja pinijashinataritsi pimajirojiate.’

6 Ariqueate iriraquea Paavoro yamenajiaquerigueti majirontajiatsica iconagarantajiaca jerijia saroseojia, itsipa jerijia pariseojia, icajemanaquequeate icanti:

—Nogonorojia, naatimpa naroguenti pariseo, iriguenti oacaantana pariseo, cotanquitsi imaica iroguenti icatsimatiamentajitaquena nocanquegueti intancorejajianaje metojadiavetanquitsica.

7 Iroompaqueate icantaquitiguiri ariqueate icojianaca iquenquetsatavacaajianaca yacavacajianaca pariseojia jeri saroseojia icatsimatavacaa-jianaca.

8 Icantajiaqueterite saroseojia aato itancorejanaji metojadiatsica. Icantajiaquequeate aisa tee inchoocateji irashivantijitete Aapani Irioshi, aisa tee inchoocateji jeocanquitsica. Iriraqueate pariseojia icantashitatijaiacaqueate mana icantajiaque intati intancorejajianaje metojadiavetanquitsica, aisa chooca irashivantijitete Aapani Irioshi, aisa chooqueate jeocanquitsica.

9 Arimpaqueate icajemajianaque maasano. Ica-tiagarantajanacaqueate pariseoja tsatacaanta-jiguiroca itioncacotanaqueca Moishishini icanta-jiguiri:

—Notsajiaqueri teequeate iranteji teeca on-cameetsateji. Iriocampate quenquetsatacaqueri jeocanquitsica irioca irashivantite Aapani Irioshi.*

10 Iriatimpajia arimpaqueate icatsimatava-cajianaca irootaquequeate yamenantacarica imajirote coaretajia yagamajacotanacari Paavoro icanti aricampa iriserajaiaqueri, icajemacaantantajiacarica igoaretajiate iraapitsajavajeri irajaianajeri intsompogui itsovironaquitequi coaretajia.

11 Oraqueate osavincaguitetanajigueti coajica otsitenitanajigueti aisa irira Amajirote yoni-gaacari Paavoro, icatiapojaca quempeji icantiri: “Pishinetanaquempa, Paavoro, aato pitsaroguitsi. Quejetaca pitsavetanquenaguetai acaniqui Jerosarequi, ariqueate pinquejetaquempa ontaniqui Iromaqui.”

Isariajivecarigueti irimetojajiquerime Paavoro

12 Osavincaguitetanajigueti iconoagarantajiacariorojia iquemavacaajiaca isariajiacari irimetojajiaqueri Paavoro, icantajigui:

—Imaica, aatogueti ametojiri, aato ashecajijaatsi aisa aato amirajijaatsi. Iintsijate irogashinoncajimentajiro Aapani Irioshi aatogueti anetsanajiguiro.

* **23:9** Chooca iroquetinica tioncanquitsica ogavitaquero acaniqui, ocanti: “Oquejetacaguetai, shoshoh acatsimatiritsi Aapani Irioshi.”

¹³ Yavisajiaquero 40 sariajiacarica irimetojajigueri.

¹⁴ Yoashitantajianacarica saserorotejia anaantajianquitsica jerijia majirontajiatsica icantajiajapoaqueri:

—Naatimpajia noquemavacaajiaca nocantajiaque aatogueti nometojiri Paavoro, aato noshecajijaatsi. Aatogueti nonetsanajiguiro nonintajiaque irogashinoncajimentenaro Aapani Irioshi.

¹⁵ Imaica aviatimpa poajianaque pamatavijajiaquiteri imajirote coaretajia pincantajiaqueriqueate iramajianaquemperi Paavoro cameetsanijite pincoacotimentajiaquerinijite. Naatimpajia nosenacashijiavaquempariqueate quenavoquirontsiqui nometojajiaavaqueri.

¹⁶ Cotanquitsi iroompaqueate iquemacoquerigueti irijanite itsijoite Paavoro, yoanaque itsovironaquitequi coaretajia icamantapojaqueri Paavoro.

¹⁷ Iroompa Paavoro icajemaqueri itsipataca imajirote coaretajia, icantiri:

—Jeri irica notineri paanaqueri pimajirotequi cameetsanijite incamantimentaguetaquerinijite.

¹⁸ Yoanaque itsipatanacari icamantapojaqueri:

—Irira Paavoro yashitacojitaqueca santanaqui icanquena namampijaquemperi irica, inintaque incamantaguetaquempi.

¹⁹ Iriatimpa yacatsatanaqueri yaanaqueri oraniqui icantiri:

—Iintsija imaica pincamantena.

²⁰ Iriatimpa icantiri:

—Noquemacojiaqueri joriojia iramatavijajiaquempi incantajiaquempi osaitequera

paajianaqueri Paavoro imajirojiatequi
incoacomajajiaqueriqueate.

²¹ Cotanquitsi aato piquemisantajigu-
iritsi, choocajatarite yavisajiaquero 40
senacashijiaquemparineca irimetojajavaqueri,
icantajiaqueta: ‘Aatogueti ametojiri Paavoro,
aato ashecajijaatsi aisa aato amirajijaatsi.
Iintsijate irogashinoncamentajiro Aapani
Irioshi aatogueti anetsanajiguiro.’ Imaica chooca
yoguijacojiaquempi quero pincanterini.

²² Iroompaqueate iquemaquitiguiri imajirote
coaretajia itigarancajiri icantavajiri:

—Imaica aatoja pitsavetitsi.

²³ Ariqueate icajemajiaqueri mavite itsipataca
icantajiaqueri:

—Pincajemajigueri coaretajia pinca-
piocajiaqueri, 200 irovegarajiaquempa
anijijiananquitsineca, aisa 70 shiacojianan-
quitsineca quitavaireriqui, ariquea aisa 200
ajiricajiananquitsineca imocorojamento.
Oraqueate ompitsecamajatanaquegueti
paajianaqueri Paavoro Sesareaqui.

²⁴ Imaica pinetsanajigueneri Paavoro
quitavaireripae irishiacotantanaquempaca
cameetsanijite parejetacaimentajiaquempa-
rinijite ichoocaquegueti majirontatsica Perishi.

²⁵ Yojocajiavaqueneri paperi itioncaquenerica
majirontatsica Perishi ocanti:

²⁶ Narotaque Caraorio Irishia, notion-
caquempi, nomajirote Perishi nopincatsatica.
¿Cameetsaca pichoocaque?

27 Imaica nonintaque nontioncacotaqueri irira Paavoro yaajianaquempica coaretajia. Irira joriojia yaajijaqueri icatsimajiaqueri inintajavetaca irimetojajiaquerimequeate, cotanquitsi naatimpa iroompaqueate noquemacoquerigueti iriguenti gonorontarica Iromaquitica noanaque notsipajianacari nogoaretajiate namiqueriqueate naajivajiri.

28 Ariqueate nonintaque naatimpa nontsataque taa opajita icatsimatimentajiaqueri. Irootaquequeate naantajavetanacarica ontaniqui ichocajiaquegueti imajirojiate.

29 Ariquea iriatimpajia icamantajiaquena iroguenti icatsimatimentajiaqueri yamena-jiaquerigueti teequeate irinetsanatajeroji itioncacotanaqueca Moishishini, cotanquitsi naatimpa namenaqueri tee onchoocateji querocampate iroguijaimentajiquerisantanaqui aisa irimetojajitaquerigueti. Manaqueate isarijashijiavecari intati.

30 Irootaquequeate iroompaqueate noquemacoquerigueti isariajiacari joriojia irimetojajiguéri notigarancantacarica aviatim-paqui. Aisa nocantajiaqueri catsimajiaquerica iroajianaque inchiquiotsi incamantajiaquitemp. Imaica ariotapojaque.

31 Ariqueate irira coaretajia inetsanama-jajiaquero icantajiaquerica. Iroompaqueate onianquiitepojigueti yaajianaqueri Paavoro Antipatirishiqui.

32 Osavincaguitetanaquegueti irira coaretajia anijijiananquitsica ipiapaitanaja Jerosarequi.

Irira shiacojiananquitsica quitavaireriqui irioqueate tsipajianacari Paavoro.

³³ Ariqueate yarejerejeipojacagueti Sesareaqui yojocajia pojaqueneri majirontatsica paperi, ariquea icantajiguiri:

—Jeri Paavoro irica.

³⁴ Iteroncaqueroguetiqueate yapatsajavanta- querogueti paperi, icoacoqueri Paavoro icantiri:

—¿Quero piguintenita?

Icantiri:

—Shirishiaqui.

Iquemaquegueti ariguenti iguntenita Shirishi-aqui, icantiri:

³⁵ —Nonquemisanquempi incoraquejiaque- gueti catsimajiaquempica.

Ariqueate icantajiaqueri coaretajia iraajiana- queri imapipancotequi Erorishini, inquempogui- jamajajiaqueriqueate aatonijite ishianajatsi.

24

Iquenquetsatacotanaca Paavoro ipigamenta- cotanaca

¹ Arikeate avisanaquegueti 5 savincaguiteri yarejetapo jaca Ananiashi irira saserorote anaan- tamajatanquitsica, itsipatsipaitacari imajirojiate joriojia jeri cantacoventantatsica icantajitica Teri- toro irira amitacoquerineca Ananiashi. Iroguenti icoraquetashitaque incantajiguieri Perishi ima- jirojiate taa opajita icatsimatimentajiaqueri Paav- voro.

² Irira Perishi icajemacaantaqueri Paavoro. Arikeate yarejetapo jatiga iquenquetsatanaque Teritoro icantiri Perishi:

—Noshineventajiaquempiqueate, jeemat-siqueate aviguenti peanquitsi nomajirojiate. Imaica nochoocajiaque cameetsa, teequeate inchoocateji asereajenaneca. Pinetsanaguetajero oshequini teeca oncameetsavetempaji acaniqui aguinenti, cameetsatari piquenquejitsitacaro.

³ Maasano nogonorojia querocagueta ichoocajiaque itsaquero, nomajirote Perishi, nocantantajiaquempica: ‘Arioteesaa.’

⁴ Imaica aato nasereamajajiguimpitsi iroguenti nonintaque pinquemisantaquena capichaji non-canquempica.

⁵ Irira Paavoro iriguenti caaviji yasereanti aisa yoanaque itsitacaguitejanaquero iquenquetsat-acaaajiaqueri nogonorojia joriojia quepatsipaequi, ariqueate icatsimatavacaajianaca itsinampirejavacaajianaca. Iriatimpa iriguentitarite jivatirica quemisantirica Jesoshi Nasarequitica.

⁶ Inintavetaca aisa incovaeguishetaquerome teemporo, irootaque naantajiacarica nonintajiatavetaca noncasiticajiaquerime noguijatacojiaquerome icantacaantica nomajirojiate.

⁷ Cotanquitsi icoraquetaque Irishia imajirote coaretajia itaviimentaguetapojaquenari yaapisajiaquenari.

⁸ Icantajiaquena quericaca catsimataquerica Paavoro incoraquejiaque incantajiaquempi taate opajita icatsimatimentajiaqueri. Imaicaquea imaica avirompate pininquegueti pincoacotaqueri, pincoacoqueriqueate cameetsanijite pintsatimenqueronijite taaca opajita nocatsimatimenqueri.

⁹ Irirajia joriojia tsipajiacarica icantajiaque:
—Jeejeguitatsi, arimajaqueate icantama-
jataquequeate.

¹⁰ Ariqueate icanque vacoc irira majirontatsica
inquenquetsatantanaquempaca iriatimpa
Paavoro. Arikea icanti Paavoro:

—Noshinevaetaca pinquemisanquena
imaica nonquenquetsaventanaquempagueti,
notsaquetarite pimajirontsitacani coramani,
pinetsanatacopinitavajiri nogonorojia.

¹¹ Imaica nonintaque noncamanquempi,
maasano itsajiaque iroaquera avisananquitsi
12 savincaguiteri noquitiqueate Jerosarequi
notsarovenquitariqueate Aapani Irioshi.

¹² Querocagueta nochoocagueque, aricampa
teemporoqui, aricampa shinagogaqui, aricampa
ocapiocaguetaqueti tsovironaqui, teequea
ariquea noncantimajigueriji choocajianquitsica
ontaniqui cameetsanijite onquenantaquemparo
noncatsimatavacaajiaquempa iroguentica
incatsimatavacaajiaquempa iriatimpajia.

¹³ Querocampate irajaiaqueero iricajia ironi-
gaaquempica incantajiaquequea arimaja inejaji-
aquena nocatsimajiaquerigueti.

¹⁴ Cotanquitsi jero noncamantaquempica:
noguijatacotaquero oratica icantajitica
Quenavoquirontsi icantacojiavetacaca
iriatimpajia, 'Iro iguemisantashitane.' Irootaque
nantaque noquemisantamajataquerigueti
Irioshimajaca itsaroventajianica novaesatinini-
jatiene. Notsamajaque iroguenti iroomajaca
maasano itioncacotanaqueca Moishishini, aisa

maasano itioncacotanaqueca tsavetantironica
icanquerica Aapani Irioshi.

¹⁵ Cotanquitsi ariqueate noquejejiacari
iriatimpajia notsaroventajiacari Aapani
Irioshi, nocantajiaquequeate intancorejajianaje
maasano metojajiavetanquitsica. Intancoreja-
jianaje antajiguiroca cameetsaguetatsica jerijia
aisa antaguetiroca teeca oncameetsateji.

¹⁶ Irootaquequeate nonintantacaca
noncoguitempani noncomajamajaquempa
cameetsanijite iramaenaquenanijite Aapani
Irioshi jerijia maasano caquinte naroguenti
comajamajatatsica.

¹⁷ “Naatimpa mana nochoocae osamani,
ariqueate anaapojacagueti oshequi ajagantsi
nopianaja Jerosarequi, naajianaqueneri
imentaqipae napijorijoiateni coguitejacojian-
quitsica, jero aisa nojocaqueneri Aapani Irioshi
noguishinejantacarica.

¹⁸ Ariqueate noteroncaguetanajirogueti
nogameetsatanajegueti ontaniqui tetemporoqui
icoraquejiaque joriojia ponejaianquitsica
Ashiaqui yamenajiapojana, cotanquitsi
tee apaniro nonejeji incapiocaventajiji-
aqueate caquinte, aisa tee nonejeji
noncatsimatavacaguempaji.

¹⁹ Iriomete coraquejianquitsineme imaica in-
cantajiaquempime taa opajita icatsimatimentaji-
aquinaca onchooquaqueme nantaqueca teeca on-
cameetsateji.

²⁰ Pincantajiguerijate imaica iricajia quero in-
cantajigue. ¿Taate inejaque ontaniqui chapinqui
nochooquaquetu icapiocantajiacaca majironta-

jiatsica? ¿Choocampate nantaqueca teeca oncameetsateji?

²¹ Aricampa iroocampa inejajiaque nocajemanaquegueti nocanquegueti: ‘Iroguenti picatsimamentajiaquena nocanquegueti intancorejajianaje metojajianquitsica.’”

²² Irira Perishi iquemacomajaquerotarite ocatica Quenavoirontsi Iroomajatatsica, irootaquequate iquemavaquitiguir Paavoro icanti:

—Imaicaquea ariota pojaque. Coajica incora quetaquegueti Irishia imajirote coaretajia, irio queate camantamajataquitenane.

Ariqueate isantico jianaji.

²³ Arikeate icantaqueri itsipataca imajirote coaretajia:

—Tee onchoocateji otsipa, cotanquitsi aato picantimentajiguiri incoraque pinijiaque queate itsipajiacca irinejapinijiaquerigueti iramajiaque neriqueate taaca opajita icoguitejague queaca.

²⁴ Arikeate anaapojacaguetti oshequi savincaguiteri icoraquetajiqueate Perishi itsipatascar omanquigare. Iroatimpa iroguenti jorio icantajitica Toroshira. Arikea icajemaca antaqueri Paavoro iquemisanqueri itsavetanquerogueti quero ancoquempani aventamajaquemparigueti Jeso quirishito.

²⁵ Itsavetanquero quero ancoquempa ancomajamaquempa aisa cameetsa anchoocaque. Aisa icanqueri coajica aapojempagueti savincaguiteri irogashinoncajajiaqueri Aapani Irioshi quempe vaejiatsica. Arikeate itsaroanaque Perishi, ican queri:

—Imaica ariotapojaque. Pijataje. Coajica aatogueti taaca opajita nosavicaventi, ariqueate noncajemaanta jempi nonquemisantajempi pinquenquetsataje.

²⁶ Iriguentitarite yoguijacovetavaca irojocaque-nerime imentaquipae cameetsanijite irovashiantajeri irootaquequeate icajemacaantantapinicarica inquenquetsatacayaeri.

²⁷ Ariqueate iquejetaquero imaica aavaetanaca mavite ajagantsi. Irioqueate piajari Poroshio Peshito. Irira Perishi manatarite inintaque iroguishinejajiguéri joriojia irootaquequeate tee irovashiantantajemparica Paavoro.

25

Paavoro yaventacarigueti Sesa

¹ Ariqueate icoraquepojaque Peshito Sesareaqui impeguempa majirontatsica. Avisanaquegueti ³ savincaguiteri yoanaque Jerosarequi.

² Iroompaqueate yarejetapojaatiga icoraquetashijiaqueri saserorotejia anaantajanquitsica itsipajiacari itsipa joriojia anaantajiatsica itsajeventajia pojacari Paavoro.

³ Ariquea icantajiguiri:

—Nonintajiaque pincajemaanta nari Paavoro iramajiqueri acaniqui Jerosarequi.

Iroguentitarite icantimentajiaque cameetsanijite irisenacashitimentajiaavaquemparinijite que navoquirontsiqui irimetojajiaavaqueri.

⁴ Cotanquitsi Peshito icantiri:

—Irira Paavoro choocatarite yoguijaajitaqueri santanaqui Sesareaqui. Naatimpatarite taampinatarite nompianaje.

⁵ Imaica pincantajigueriqueate pimajirojiate iroguijaguijaitanaquenaqueate cameetsanijite intsavetacotimentajiaquerinijite arigueti arimajaca yantaquero teeca oncameetsateji.

⁶ Irira Peshito ichoocaquiti ontaniqui 8 savincaguiteri, aricampa 10, ariqueate ipianaja Sesareaqui. Iroompaqueate osavincaguitetana-jigueti yoanaque isavicaque icantomajantigueti, ariqueate icajemacaantaqueri Paavoro.

⁷ Iroompaqueate iquijapojaque Paavoro itsipajapojacari joriojia ponejaianquitsica Jerosarequi, itsojeventajiacariqueate icantajiaquequea yantaquero oshequi covaeguishemajaca.

⁸ Cotanquitsi Paavoro ipigamentanaca icantiri:

—Teequea taaca opajita nantagueteji: tee noncantashitatiguemparo icantacaantajitaquenerica jorio; teequea nanteji teeca oncameetsateji temporouqui, tee noncovaeguisheteroji; aisa teequeate nonijashinatempariji majirontatsica Sesa.

⁹ Cotanquitsi irira Peshito ininquietarite irogushinejajiaqueri joriojia icantiri Paavoro:

—¿Pinintaque poanaque Jerosarequi cameetsanijite noncoacomajaqueMPI?

¹⁰ Icanti Paavoro:

—Oraqueate arimete pincoacomajataquename acaniqui, aritarite icanque majirontatsica Sesa incoacotantajitaquero acaniqui. Pitsamajataque aviatimpa tee queroca noncantimajigueriji joriojia cameetsanijite incatsimajiaquenanijite.

11 Oraqueate aviroguetiqueate nejaquena nantaquegueti teeca oncameetsateji, iiintsija irimetojajiten, nonquemisantacoquempaqueate aatoqueate nopigamentatsi. Cotanquitsi oraqueate teegueti arimaja onchoocateji icantajiaquenaca, aato queri agavejatsi irojocaquena irimetojajiguena. Arimpaqueate nonintaque noanaque Sesaqui, irioqueate coacomajataquenane.

12 Irira Peshito icoacojiaqueri itsipatashijiacaca icantomajajiaquerigueti iramene quero incojiaquerini iriatimpajia. Ariqueate icantiri Paavoro:
—Irootarite pinintavintsataque incoacoquempi Sesa, ariqueate poanaque iriatimpaqui.

*Paavoro iquenquetsatacaaquerigueti
majirontatsica Aguiripa*

13 Avisanaquegueti oshequi savincaguiteri, ariqueate irira majirontatsica Aguiripa* yoanaque Sesareaqui irinejeri Peshito. Oguijatanaqueriqueate itsijoite Verenise.

14 Ichooocajiaquegueti ontaniqui oshequi savincaguiteri, iriraquea Peshito iquenquetsatacaaqueri majirontatsica, itsavetacotaqueri Paavoro. Icantiri:

—Chooca acaniqui apaniro yashitacotacaantaqueca santanaqui Perishi.

15 Ontaniquiqueate noanaquegueti Jerosarequi, irirajia saserorotejia anaantajianquitsica jerijia aisa imajirojiate joriojia icoraquejiaque

* **25:13 Aguiripa.** Irio icantajitica Erorishi Aguiripa II, irio irjanite Erorishi Aguiripa I (pamenero Ya. 12.1, aisa tioncanquitsica isavivanaqui).

naatimpaqui, itsojeventajiacari, inintajia veca nometojacaanquerime.

¹⁶ Cotanquitsi naatimpa nocantajiaqueri irira Iromaquitica tee irimetojantajigueji intati, mana iroqueti incajemaanta jiaqueri catsimajianquisica jerijia icatsimajia queca, inquenquetsaven-taquempa inquemajiaqueri maasano.

¹⁷ Irootaquequeate iroompaqueate icoraquejia quegueti iriatimpajia acaniqui tee osamani nogueroji, iroompaqueate osavincagui-tetanaquegueti ariqueate noanaque nosavicaque nocantomajantigueti nocajemacaanqueri Paavoro.

¹⁸ Iroqueragueti nojiqueji ariji incanta-jiaquena yantaque icantimentantica Sesa, cotanquitsi teequea inquejeteroji imaica.

¹⁹ Iroguenti icantajiaquena yogaaquero yame-jigaca itsaroventajigarigueti Irioshi aisa iquen-quetsatacojiaqueri apaniro metojatsica icanta-jitica Jesoshi, cotanquitsi irira Paavoro icanti: ‘Pochatanaji.’

²⁰ Naatimpaqueate anaquena nococotantavetacarica Paavoro: ‘¿Pininque poanaque Jerosarequi incoacojitaquempiqueate ontaniqui?’

²¹ Cotanquitsi iriatimpap teequea irininteji, manaqueate inintaque iroashitanaqueri Sesa, irioqueate coacotaquerine. Ariqueate nocantantacaca aato yovashiantajitiritsi ogantaga inchoocaqueni acaniqui irosati nontigarancaquerigueti ontaniqui iriatimpap.

²² Irira Aguiripa icantiri Peshito:

—Nonintaque nonquemaqueri naatimpa.

Iriatimpa icanti:

—Iintsija osaitequera pinquemaqueri.

²³ Iroompaqueate osavincaguitetanajigueti yoanaque Aguiripa inquemaqueri Paavoro, itsipatanacaro itsijoite pajitatsica Verenise, jerijia imajirojiate coaretajia jerijia aisa jivajigurica igonororjia, netsanatacojiavaetacaqueate maasano. Iroompaqueate iquijaquiaipojaquegueti, iriraquea Peshito icajemacaanqueri Paavoro.

²⁴ Icanti Peshito:

—Majirontatsica Aguiripa, aviguentijia maasano, jeri irica Paavoro icatsimajiaqueca maasano joriojia Jerosarequitica jerijia guintenijiatsica acaniqui. Ogantaga icantajiaquena nometojacaanteri.

²⁵ Naatimpaqueate namenaqueri teequeate iranteji querocampate irimetojimentajiquerica, cotanquitsi irlotarite nintanquitsi iroashitanaqueri Sesa, irioqueate coacotaquerine. Irootaquequeate nontigarancantaquemparica iriatimpaqui.

²⁶ Cotanquitsi querocampate noncanteni nontioncaquenerigueti Amajirote Sesa noncamantaquerigueti taa opajita icatsimamentajitaqueri, teenicate onchoocateji. Irootaquequeate imaica namacaantantacarica pinejajiaqueriniji aviatimpajia, aisa aviatimpa, nomajirote Aguiripa, nonintamajataque aviguenti nejaquerine cameetsanijite pincoacotimentamajataquerinijite, irooqueate nontsatantaquempaca quero noncanteri nontioncaquenerigueti.

²⁷ Namenaquerotari tee oncameetsateji non-tigarancashivetaquemparigueti intati santanat-acotanquitsica aatogueti notioncacotaqueri taa opajita icatsimativitajitaqueri.

26

Paavoro icatiimotanacari Aguiripa ipigamentanaca

¹ Ariqueate iquenquetsatanaque Aguiripa ican-tiri Paavoro:

—Iintsija pinquenquetsaventanaquempa.

Irira Paavoro icanti vacoc iquenquetsatanaque icanti:

² “Majirontatsica Aguiripa, notsataque piquemacojiaqueri apijoriojiateni icat-simajiaquenagueti icantajiaquenagueti taaca opajitapae. Imaicaqueate imaica noshinetaca nonquenquetsatacaquaquempigueti nonquenquetsatacoventanaquempa.

³ Aviatimpa pitsamajatitarite yameguetaca apijoriojiateni aisa pitsati taa opajita icatsimatimen-tantajigui. Irootaquequeate nonintantacaca pin-quemisantamajatavaquena, aato piperatanatsi.

⁴ “Naatimpa noguintenitimojiacari apijorioji-ateni coramani chaajaniquitirajanagueti irosati imaica. Yamenamajajiaquena noguintenicagueti Tarisoqui jero aisa Jerosarequi, irootaquequeate itsatantamajajiaquenaca quero nocotani.

⁵ Irootaquequeate imaica irinintajiaquegueti incamantajiaquempi, incamantajiaque-mpiqueate. Naatimpa noponeanacaro iroaqueragueti noquenquevaritapojaque nogui-jatacomajataqueri pariseojia. Iriatimpajia caaviji

yanaaque itsamajatiro itioncacotanaqueca
Moishishini.

⁶ Coramani Aapani Irioshi icantajiaqueri avaesatiniteni intancorejajajeri metojajiatsica. Ariqueate noquejetaca naatimpa notsataque nometojavetaquempagueti intancorejajena, irootaquequeate yaimentajiaquena acaniqui cameetsanijite pincatsimatimenquenanijite pimetojacaantimenquenanijite.

⁷ Arimajaqueate icanque Aapani Irioshi intancorejajajeri metojajiatsica, irooqueate yoguijajiaque maasano agonorojia irirajia ichoviquiguetaqueca 12 irijanijiateni Ishiraerini. Irootaquequeate ogantaga isavicaventajiguiro irinetsanamajajiaquero inintaguetica Aapani Irioshi cameetsanijite intancorejajajeri coajica. Irootaquequeate, Nomajirote Aguiripa, icatsimatimentajiaquena imaica joriojia yamenajiaquenagueti noquejejiacari iriatimpajia nocanquequeate nontancorejanaje naatimpa aisa.

⁸ ¿Pijijiaqueji aviatimpajia aato itancorejajajiri Aapani Irioshi metojajiatsica?

⁹ “Noquenquejavitaca naatimpa coramani cameetsavaetaque nantaguetaque oshequi taaca opajitapae nonticaacotantaquemparoca ivajiro Jesoshi Nasarequitica.

¹⁰ Ariqueate noquejetaca Jerosarequi nocatsimajiaqueri nonintaquequeate noguijajiaqueri santanaqui. Irootaquequeate nocantantajiacarica saserorotejia anaantajian- quitsica irojocajiavaquena paperi iroonijite navenquempaca, ariuea noguijajiaqueri

santanaqui oshequini igomajamajare Aapani Irioshi. Oraqueate imetojajiaquerigueti noshinevaetacaqueate.

¹¹ Ariquea noquejeveca nocatsimapinijiaqueri ontaniqui maasano shinagogapaequi icapiocantapinijiacaca cameetsanijite novashiantacaajajerinijite aatonijite itsaroventajijaaritsi Jesoshi. Ariqueate nocatsimamajajianaqueri irootaquequeate noashitantajianacarica osamanipaequitica aisa, nocatsimajiaqueri natsipetacaajiacariqueate.

¹² “Ariqueate naanaquero paperi yojocajiaavaquenaca saserorotejia anaantajianquitsica, noanaquequeate Tamashicoqui naajiguerime aisa itsipapae.

¹³ Cotanquitsiqueate, majirontatsica, iroompaqueate itampaticatapojaquegueti catsirincaiteri noavetanacaqueate quenavoquirontsiqui,[☆] nonejaitatiguiro ocantanaque morec oponeaca jenoqui inquitequi, cavorejavaequequeate anaaqueriqueate ivoreguigueti catsirincaiteri, otsirencapojaquenaqueate anquiritacotapojana naatimpa jerijia maasano notsipajianacaca.

¹⁴ Maasano notejatejaitanaquequeate isaviji quepatsiqui, noquemiqueate icantajipojaquenaqueate iguenquetsatsarequi evereo: ‘Saoro, Saoro, ¿taa picatsimatantaquenaca? Avisatiquestate atsipetacajatsi. Piquejetanacari caapironcaari impigatanaquemparigueti quempoguijirica impateaterogueti inchaquiji, irisatiquestate chaticavatsatajatsine.’

[☆] **26:13** Ya. 9.1-19; 22.6-16.

¹⁵ Naatimpaqueate nocantsitariqueate: ‘¿Taampate aviatimpa, Nomajirote?’ Icantanaqueate: ‘Naatimpa naroguenti Jesoshi picatsimaqueca.

¹⁶ Imaica pintinajanaque pincatianaque, mana nonigaaquempi noncanquempiqueate nonintaque nontigarancaquempiqueate pintsavetantanaquena pintsavetacotero maasano pamenaguequeca imaica jero aisa maasano nonigaaguequempica coajica.

¹⁷ Nontigarancaquempiqueate pinquenquetsatacaaquiaqueriqueate joriojia jerijia aisa teeca iriojia joriojia. Namiquempiqueate cameetsanijite irajaiavequempigueti irovashiantajajempiqueate.

¹⁸ Irooqueate nontigarancantaquempica intsatantajajempaca. Oquejetimovecariqueate opitsecashirentimovecariqueate: teetarite intsafigueriji Aapani Irioshi, iriguenti Satanashi amatavijajiaqueri. Poashitanaqueriqueate pintsatacaaquiaqueri cameetsanijite irovashiantimentajajeronijite iquenquejaguishejiguica taaca opajitapae, aatonijite iquemisantajajiritsi Satanashi, irioqueate inquemisantajajanaje Irioshi, aisa inquemisantamajajiaquenaqueate naatimpa cameetsanijite nonetsanajajieri, aato noquenquejacaajajiritsi iguempevaerejia, inconoajiaquempariqueate maasano nomeshiajiaqueca.’

¹⁹ “Irootaquequeate imaica, majirontatsica Aguiripa, nonintaque noncanquempi nonetsanaquero maasano icanquenaca Jesoshi yonigaaquenagueti ontaniqui quenavoquirontsiqui.

20 Iriquetiquea noquenquetsatacaa jiaque quintenijiatsica Tamashicoqui. Ariqueate noquejejiaqueri quintenijiatsica Jerosarequi jerijia maasano quinteniguetatsica Joreaqui. Noquenquetsatacaa jiaqueri aisa teeca iriojia joriojia nocantajiaqueri incantashitati jiana-jempa irovashiantajianajero iguempevaerejia, irioqueate intsarоventamajajiaquempa Aapani Irioshi, cameetsaqueate inchoocajianaje intsatantajiaquemparica caquinte arimaja i quemisantaqueri Aapani Irioshi.

21 Irootaquequeate yaimentajiaquenaca joriojia teemperoqui itsarоventantajitarica Aapani Irioshi inintajavetaca queate irimetojajiaquename.

22 Cotanquitsi yamiquena itampishitacaa quena Aapani Irioshi, arimpaqueate notsavetanta queri arejevaetanaca queate imaica, notsatacaa jiaqueri irirajia anaantajiatsica jerijia aisa teeca iranaantajigueji, mana notsatacaa jiaqueri icantajiguinica tsavetantirinica Aapani Irioshi jeri aisa Moishishini. Teequeate naashitemparo intati.

23 Iriatimpa icantajiaqueta tarite irantsipevae-taquempa irira Quirishito, ariquea irimetojave-quempa impochatanaje. Iriqueti jivatanajatsine impochatanaje cameetsanijite intsavetantero tsirencaguiterimajaca intsatimenqueronijite maasano joriojia jerijia teeca iriojia joriojia."

24 Iroompaqueate i quemavaquerigueti Peshito i quejetanaquero imaica i quenquetsaven-tanacagueti icajemana queate:

—¡Paavoro, ariqueate pishoncacotanaca! Iroori-jite pisavicaventaquero pivaperite manaca os-

honcacotanaquempi intati.

25 Icanti Paavoro:

—Teequeate noshoncacotempaji, nomajirote Peshito. Maasano nocanquempica iroguenti arimajaca teequeate namataguempaji.

26 Irina majirontatsica Aguiripa iriatimpa itsamajatiro oca nocantajiaquempica, irootaqueate noshinetantacaca iquemaquerogueti maasano. Itsatiro iroguenti arimajaca, teenicate iromanacojiteroji noquenquetsatacoguetaqueca imaica.

27 Aviatimpa majirontatsica Aguiripa, ¿quiero pincante aviatimpa? Oraqueate itioncacojiaqueca tsavetantajiguirica Aapani Irioshi coramani ¿iro iroomajaca?

28 Icanti Aguiripa:

—Pajiniqueate pinquemisantacaguena naatimpa aisa, nonquemisantantaquemparica Quirishito.

29 Icanti Paavoro:

—Aricampa imaica, iroocampa coajica, naatimpa nonintavetaca pinquemisanqueme, cotanquitsi aato apaniro aviatimpa piquemisanti, inquemisantajiaquequeate aisa maasano quemajiaquenaca imaica inquejejiaquena naatimpa, cotanquitsi aato yoishojitiri cavorejatsariqui.

30 Iroompaqueate icanquitigui imaica icatianaca majirontatsica Aguiripa aisa majirontatsica Peshito itsipajianacaro Verenise. Ariqueate iquejejianaja maasano itsipajiacaca.

31 Yoajianaquegueti iquenquetsatacogiaqueri Paavoro, icantajiaquequeate:

—Namenaqueri naatimpa teequeate taaca opajita iranteji irimetojimentajiquerica aisa aatomesano yoguijaajitirime santanaqui.

32 Icantiriquea Aguiripa Peshito:

—Aatomeguitatsi inchiquiotsi icantime iriatimpa ininque incoacoqueri majirontatsica Sesa, ovashiantajiajerimequeate.

27

Yaajitanaquerigueti Paavoro Iromaqi

1-2 Icantajiaquequeate iroanaque Paavoro Itari-aqui. Icamantajiaqueri imajirojiate igoaretajiate majirontatsica Sesa Aogoshito irajaianaqueri. Iriatimpa ipajita Joorio. Itsipatacaantajianacari itsipapae yoguijaajiguequeca santanaqui. Naatimpa notsipajianacari Arishitarico noguijaguijaitanaqueri Paavoro. Irira Arishitarico ariguenti iponeaca Tesaronicaqui Maseroniaqui. Notejianaca inirojeguiqui quenajarontsi poneanquitsica Ataramitioqui, pajini oanaque Ashiaqui onquenanaque quinteninintsipaequi ontaniqui otsapijaqui quentija. Ariqueate noajianaquequeate namajatacojianaquequeate.

3 Osavincaguitetanajigueti nagatacojiaipojaque Shironequi. Irira Joorio icavintsajaqueri Paavoro icantiri:

—Pijashiatsi pinejajiaquiteri pitsipavijijiaca irojocajiaquempinijite taaca opajita pinintajiaqueca.

4 Arikea nogaajianaca aisa, noajianaque. Pajini oguipiacotajename tampija, irootaquequeate

nopitsocacotantanacaroca ovogore Tsipere antaqueronta.

⁵ Nosenaguijacojianacaro Shirishia aisa Pam-piria narejerejeipojaca Miraqui choocatanquitsica Irishiaqui.

⁶ Ariqueate inejapojaquero imajirote coarenta-jia quenajarontsi poneanquitsica Arejantiriaqui oananquitsineca Itariaqui. Irooqueate itetanta-jianaquena nogaajianaca aisa noajianaque.

⁷ Inchiquojisano nocantacojianaque namajatacojianaque nopomerentsijianacaro oshequi savincaguiteri. Osamani nantajiaquero cotanquitsi noquempejipojaquerogueti Guiniro oguipiacojiavaquena tampija, irootaquequeate nocononcacotantajianacaca nomontejacojianacaqueate niganquivogorequitica icantajitica Quereta. Nopitsocacotanaca araquerora ontaniqui oquempejiquegueti Saramona.

⁸ Nopomerentsijianajaro nosenaguijacojianacaro Quereta, irosati narejerejeivaetani nagatacojiapojaqueni agapiniquegueti quenajarontsi icantajitica Cameetsatatsica Agatapinitaquegueti, oquempejiquegueti quinteninintsi icantajitica Irasea.

⁹ Iroorijite oshequiacotanaquena savinca-guiteri noponeajiacagueti Sesareaqui pajini nontejaatacote, irootaquequeate arimpaqueate ojamajatiri ocoejencatanaqueni namajatacojianaquegueti, irootaquequeate icantantajiacarica Paavoro:

¹⁰ —Naatimpaqueate notsataque oajianaquegueti imaica mana antsipejianaquempa. Aato apaniro ojocajajigui quenajarontsi aisa

ajaararontsi aricampa ojocajajiaquempa
aatimpajia aisa.

¹¹ Cotanquitsi irira imajirote coaretajia
teequeate inquemisanteriji Paavoro, iriguenti
iquemisantajiaque taquijatanaqueroca
quenajarontsi aisa ashintaroca.

¹² Oraqueate agapiniquegueti quenajarontsi
teenicate oncameetsateji tejarontsiqui,
irootaquequeate inintantajiacaca oshe-
quini irogaajianajempa aisa, ijijiaqueji
iragavejajiaquempa irarejejiaquempaji
ontaniqui Penisequi chocatatsica aisa
Queretaqui, inchoocajiaquemequeate ontaniqui
iroosati irivoreanajeguerti catsirincaiteri.
Ontaniquiqueate Penisequi aato yarejeta choviga
poneanquitsica oquempejitacoqueroguetti
isotoguiguerti catsirincaiteri.

¹³ Ariqueate yamenajiavaqueroguetti
inchiquioji otampijatapojaque ijijiaqueji
cameetsataqueji iroajianaje arinijite aacoti-
mentajianaquerinijite iquenquejajiaquegueti,
ariqueate inoshicajatajiro cavorejatatsica
agaparancajatatsica itetajiroqueate, ariquea
noajianaque nopantsapijatacojianaquero
otsapijaqui quentija Queretaqui.

¹⁴ Cotanquitsi capichaji osamanijencaguitepo-
jatigui otampijatapojoqueate inirojencamajaca
choviga poneanquitsica oquempejitaco-
queroguetti isotoguiguerti catsirincaiteri,
ocantavaetanaquequeate jeoc jeoc jeoc.

¹⁵ Nonintajiavetacaquea nonquenajataco-
jianaqueme oquenapojaquegueti choviga,
taaja esho oguipiacotanaquena, ariquea

aacotanaquena intati choviga quenajarontsiqui. Naatimpajia noquemisantacojiavaca querocampate noncojiavajeroni.

¹⁶ Ariqueate noacojianaque antaqueronta ot-sipa niganquivogorequitica icantajitica Caraora, ariqueate teesaconaqueate ontampijamajatajeji. Osamani nantajianaquero chaajaniquitica que-najarontsi ishiticacojitica, najiricamajaquero.

¹⁷ Ariqueate itejiaquero. Ariquea ijijiaqueroji ontsiratsiraitanaque ogotapae ipeacaantacaroca inirojegui quenajarontsi, ariqueate yaguiaguiaataquero ishiticaquero. Aisa itsaroajianaquequeate irivanquetacojiaque-mparome onicoaquegueti impanequi icantajitica Shirete, ishiticarejaquero quitsaarentsimago yogaguijijaquero cameetsanijite aacojianaquena choviga.

¹⁸ Cotanquitsiqueate osavincaguitevetanacaguetai arimpaqueate ojatiri otampijamatanaqueri, ariqueate iparianacaro ipishoncاجuequero ajaararontsi yamajiavetacaca.

¹⁹ Ariqueate otsipatapojacaguetai savincaguiteri narosatiquesteate pishoncabajiaquero iniro-magotanquitsica, ovoapae, otsipapae ashincaca quenajarontsi.

²⁰ Oraquea oshequianaquegueti savincaguiteri opitsecanaquequeate teequeate irivoreajeji cat-sirincaiteri aisa impoquiropae. Arimpaqueate ojamajatatiguiri otampijamajatatiguinimaja no-jiqueji arijite nojocacojiaquempaji.

²¹ Naanaatacoguetanaque tee noshecajajempaji, icatianacaqueate Paavoro icantiri:

—Aviguentijiatarite cotanquitsi, pinquemisan-

tajiaquenamegueti iroaqueragueti nocantajiaive-quempigueti arimequeate anchoocajianaqueme Queretaqui, aatomecate atsipejigame imaica, aisa aatomequeate opeaguetame maasano pamajiavetacaca.

²² Imaica aato pitsaroajiguitsi ontsitiavetanaquempaqueate quenajarontsi, cotanquitsi aatimpajia aatoqueate ojocajajigatsi.

²³ Incajaranqui tsiteniriqui icatiimotapojaquena irashivantite Aapani Irioshi ashintanaca nantavaetinica,

²⁴ icampojaquena: ‘Paavoro, aato pitsaroguetsi, poanaquetarite pinejeri majirontatsica Sesa. Aato yojocajatimajigatsi apaniro pitsipajiacaca quenajarontsiqui, icavintsajaquempitarite Aapani Irioshi.’

²⁵ Nocantantajiaquempica aato pitsaroajiguitsi pishinejiguempa. Naatimpa notsataque irinet-sanataquero Aapani Irioshi maasano icanquenaca irashivantite.

²⁶ Cotanquitsi mana ovanquetacotacaji tampija ovogorequi.

²⁷ Ariqueate anaapojacaguetsi 14 savincaguiteri noquenacotashijianaca quentijaqui icantajitica Aririatico, oraqueate tampija ariqueate aacojianaquena. Oraqueate onianquiitepojiguetsi irira taquijajiaqueroca iquenquejajiaque quempejitapoji quepatsi.

²⁸ Igomarojiaquero osaanajataquegueti, ariqueate ovegarapojani 36 meetero. Ariquea osamanijencaguitepojiguetsi imajiajiro aisa, ariquea ovegarapoja 27 meetero.

²⁹ Itsaroajianaquequeate itsinacacotarotsi

mapi yogaguijitanjaciaca roca ovataquiqui cuatro cavorejatatsica agaparancajatanquitsineca quishotacaqueroneca quenajarontsi. Ishoshoguitejiana ca yoguijajavajiro savincaguiteri.

³⁰ Irira taquijajiguiroca inintajiavetaca irishijanaqueme irovashiantajianajenamequea, yantampeajianaca queate iroajiana que irojocajajiaquero cavorejatatsica quishotacaqueroneca otsovi, cotanquitsi iroguenti irojocajajiaqueme chaajaniquitica quenajarontsi inquenajata cotanjianaquempameca.

³¹ Cotanquitsi iquenquetsatana quequea Paavoro, icantajiguiri imajirojiate coaretajia jerijia aisa igoareti jiate:

—Iramerencapitsajianaquempigueti ariquestate pojocajajiaquempa aviatimpajia.

³² Iroompaqueate iquemavaquitigui ipeshacoji aquero chaajaniquitica quenajarontsi, ariquestate opariajatana quequeate.

³³ Ariqueate iroompaqueate osavincaguitemanaququitigui irira Paavoro icantajiguiri maasano irishecajiguempa, icantajiguiri:

—Manaqueate anaapojacaqueate 14 savinca guiteri irosati queate piquempoguijajavaquero, aisa teequeate pishecajajempa.

³⁴ Nocantantajiaquempica pishecajiguempa cameetsanijite pintampishitimentajiana que nijite, aatotarite opeimata capichajaniqui pimajeani qui.

³⁵ Iroompaqueate iteroncana querogueti icantajiaquerigueti, yaaquero pan, icatiimoji acariquestate maasano, icanqueriqueate Aapani

Irioshi: “Ariotesaa pojocajiaquenaro nosheca”, icotarejaquero ishecatacaqueate.

³⁶ Yamenacojiaquerigueti maasano itampishishirejianaji ishecajiacaqueate.

³⁷ Ari novegarajiaca 276 maasano quenajarontsiqui.

³⁸ Ariquea yagashecajaiyanacagueta ipishoncaya jiaquero tirigoitsoqui cameetsanijite ogajenocaja majatimentanaquempanijite quenajarontsi.

³⁹ Ariqueate osavincaguitemajatanajigueta tee queate intsajiajaperoji quepatsi, mana yamena cojiaquero ocasoguiroquiaatacagueta ariqueate ochoocaueni impanequi, inintantajiacaca impanquenajianaquemparo ijijiaqueji iragavejajiaque intsinampijatacojiaquempa.

⁴⁰ Ipeshacojiaqueroquea cavorejatatsica agaparancajatatsica quishotacaaqueroca quenajarontsi, ari ochoocataji quentijaqui. Ariqueate itsajacojiaquero itaquijatantajigaroca. Ariquea itinajacotajiro quitsaarentsimago choocatajatsica otsovi qui cameetsanijite aacotimentajianaquenanijite tampija impanequi qui.

⁴¹ Cotanquitsi aacojiajivetanaquena mana opishoncacojiaquena otampishijamajataquegueta oja, ovانquetantamajatapojacaroca impanequi otsovi. Oraqueate ovataqui otsirajanaquero otampishiaca ovore quentija.

⁴² Irira coaretajia inintajajivetaca irime tojajiaquerimequeate yoguijajiguetica santanaqui aatonijite yamajamajaitanaquetsi ishijaiyanacatsiqueate.

⁴³ Cotanquitsi irira imajirote coaretajia tee queate irininteji intsipatacantempari Paavoro,

icantantajiacarica:

—Ariotaque icojiacani. Quericaca tsajjatsica yamajajigui iriqueti jivajiananquitsine iramajama-jaitanaque iragajianaque.

⁴⁴ Iriraqueate teeca intsajigueji iramajajigueji irajaianaque inchacotapae aisa taaca opajitapae cameetsanijite iragatimentajianajenijite.

Ariqueate noquejetacaajianacaro imaica nagajiapojaque maasano otsapijaqui.

28

Ichoocajianaquegueti Paavoro Marataqui

¹ Iroompaqueate nagajiapojaquegueti maasano, icamantajitaquena ocatica ovogore opajita Marata.

² Irira guntenijiatsica oraniqui cameetsaqueate yaajiavaquena icavintsajajiajavaquena itsitacashijiavaquena paamari, catsincaguitevetaqueterite otejaqueterite incani.

³ Irira Paavoro yaviguetapojaque inchajempequi. Iroompaqueate itsitacavetacarogueti iquemaitatiguiri tac camaarini iracoqui, isoaancanaca oguishianaqueri paamari.

⁴ Iriraqueate guntenijiatsica oraniqui yamena-jiavaquerigueti itsatanaca iracoqui, icantavacaajianaca:

—Iriocajate metojantatsica, irootaquequeate yagavetajagueti yojocajavetacagueti, imaica irioqueate atsicaqueri camaarini. Aricajate yogashinoncajimentaqueri Irioshi.

⁵ Irira Paavoro ipotecaqueri paamariqui, cotan-quitsi teequeate ireeretanaqueri.

6 Iriatimpajiaqueate ijijiaqueji arijite ireeretanaque ariqueate inquenaque intejanaque irimetojanaque, cotanquitsi yoguijajiavecari intati tee iragavejeriji. Ariqueate icantajiaque:

—Iriocajate irioshitatsica.

7 Choocaqueate quempeji iguepatsitepae Povirio, irio jivatanquitsica ovogorequi. Iriatimpa yaajiavaquena icavintsajajiaquaquena, ariqueate nomaimojianaqueri 3 savincaguiteri.

8 Yojoquijitacaquea iriri Povirio, inorijaca, icatsirincajencatanaque, ishijatacotaquero iriraja. Ariquea yoanaque Paavoro irinejeri. Yamanacoventapojaqueri ipamitapojaqueri, ariqueate ipeanaja.

9 Iroompaqueate iquemacojiaquitiguiri icoraquetashijiaqueri maasano ashinoncajajatsica iroveajiajerita, ariqueate iriatimpa yovejajajiri.

10 Iriatimpajia ishineventajiaquenaqueate icavintsajajiaquaquena. Ariqueate nonetsanajianaja noajianaje, yojocajiaavaquenaqueate maasano nocoguitejajiaqueca.

Yarejetapojacagueti Paavoro Iromaqui

11 Ariqueate nochoocajianaqueni 3 taai ontaniqui ovogorequi. Notejianaqua quenajarontsiqui poneanquitsica Arejantiriaqui. Chooca isheroncaguetica ontaniqui otsoviqui, iquejetacaacari irioshivijirentsi tsipari, aparo icantajitica Caashitoro, itsipa Poroquishi. Irira ashintaroca ichoocavaetanaqueate oraniqui niganquivogorequitica nochoocatantajiacaca naatimpajia, yoguijavaquero osariapojajetaqueate.

12 Ariqueate noajianaji nagatacojiapanajanti Shiracosqui, ariqueate nochoocajianaque 3 savincaguitei.

13 Ariqueate nogaalianaca aisa, noquenacojianaque otsapijaqui narejevaetaniqueate Irejioqui. Osavincaguitetanajigueti otampijapo-jiiqueate aacojianaquena noquenquejaquegueti. Namajatacojianaque mavite savincaguitei, narejejiaca Potejoriqui.

14 Ariquea oraniqui nonejajiaipojaqueri napiguemisantarijateni. Iriatimpajia yaajiaavaquena icantajiaavaquenatarite: “Pinchoocatimojianaquenataja 7 savincaguitei.” Ariqueate noajianaque Iromaqui.

15 Irira napiguemisantarijateni Iromquitica iquemacojiavaquenagueti iconoagaranta-jiacaqueate icoraquejiaque itonquivojaji-avaquenaquea Pororeapioqui. Itsipa mana icoraquejiaque yoguijajiaavaquena ontaniqui icantajitica Tereshi Taverenaqui. Irira Paavoro iroompaqueate yamenajiaipojaquerigueti icampojiri Aapani Irioshi: “Ariotesaa”, ariqueate ishinevaetanaca.

16 Ariquea noajianaque narejejiaca Iromaqui. Irira imajirote coaretajia yaajianaqueri yashitacojitica, yojocajiaipojaqueneri imajirote coareta santanaqui. Icantajiqueriquea Paavoro inchoocatashiquempa iriatimpa, iramenaqueriqueate apaniro coareta.

17 Ichocatapofigueti 3 savincaguitei irira Paavoro icajemacaanqueri joriojia anaantajatisica icantajiguiri:

—Napijorijojateni, teequeate nonijashijiguem-

pariji agonorojia, aisa teequeate noncantashitatiguemparoji icanqueca avaesatinijiate coramani, cotanquitsi iriatimpajia yaajiaquena Jerosarequi, ariqueate yojocajiaquenari yaajianaquena Iromaquitica.

¹⁸ Ariquea yagajianaquegueti majirontajiatsica icoacojiaquenagueti inintajavetaca irampaquijajiajename, itsaquetarite teequeate taaca opajita nanteji querocampate irimetojimentajiquenaca.

¹⁹ Cotanquitsi irira agonorojia joriojia tee irinintajigueji irampaquijajiajena, irootaquequeate nocantantajiacarica Peshito noncoraquetaque acaniqui cameetsanijite incoacoquena Sesa. Cotanquitsi teequeate noncatsimajigeriji agonorojia, iroguenti nonintaque nonquenquetsaventaquempa.

²⁰ Irootaquequeate nocajemimentajiaquem-pica imaica cameetsanijite namenajiaquempi nonquenquetsatacaajiaquempi. Pinejantajiaquenaca ishiticajiaquena cavorejatsariqui mana notsavetanqueri irira Quirishito aguijajavaqueca aatimpajia ishiraerijia.

²¹ Iriatimpajia icantajiguiri:

—Irira quintenijatiatsica Joreaqui teequeate impacaantimajiguenaji paperi tsavetantaque-mpineca, aisa agonorojia coraquejianquitsica teequeate incantimajigueji: ‘Chooca yantaqueca’, teequeate incantagushetacojiguempiji.

²² Imaica nonintaque nonquemisantajiaquempi quero pincanteni aviatimpa. Noquemacojiaqueritarite maasano quinteninintsipaequi icatsimajiguiritarite quemisantajiguirica Jesoquirishito.

²³ Ariqueate yoajianajigueti icantajianaqueri querocaguetai savincaguiteri incoraquetantajiaquempaca inquemisantajiaqueri. Arikeate aapojacaguetai incoraquetantajiaquempaca icoraquejiaquequeate oshequi iquemisantajiaqueriqueate. Iriatimpa imapocanaquero iquenquetsatanaquequea iroaquerasano savincaguitetamananquitsi ariqueate itsitenijencaguitetacovaetanaque itsavetanqueri Aapani Irioshi quero icota imajirontagueti. Iquejejianaquerigueti imaica cameetsanijite inquemisantimentajiaquerinijite Jesoshi, iroguenti ipampiataque itioncacotanaqueca Moishishini jero aisa itioncacotanaqueca tsavetantajiguirinica Aapani Irioshi.

²⁴ Iconoagarantajiacaqueate inquemisantajiaqueri, choocaqueate itsipapae teeca inquemisanteriji.

²⁵ Arikea iriatimpajia yamenajiaquegueti tee inquemavacaajiguempaji, arikea yoajianaji. Irira Paavoro icantajiajavajiriqueate:

—Arimajasacanicate icantamajataque Ishire Aapani Irioshi coramani iquenquejacaaque rigueti tsavetantirinica Isaiashini, arikeate irioqueate cantajiaqueri avaesatinijiate icanti:

²⁶ ‘Pijashia pincantajiaquiteri irica caquintejia: “Pinquemajiaquequempaquea, cotanquitsiquea aato piquemajiajavajirotsi.”

Pamenajiaquequempaquea, cotanquitsiquea aato pitsatimajiajavajirotsi.”

²⁷ Iquishoshirentanaqueterarite iricajia. Oraquea iguempita tee inquemamajatantajem paro,

aisa imatsivocajataque,
 aatonijite inejantajiajarotsi iroquija,
 aatoniji iquemantajiajarotsi iguempta,
 aatoniji itsajigui ishirequi,
 aatoniji ipitsocashijigana nogueshishirentanta-
 jemparica.'

²⁸ "Imaica nonintaque noncamantamajajiaque-
 mpi iriotaquequeate inquenquetsatacaaajitaque
 teeca iriojia joriojia incamantajitaqueriqueate
 quero icota Aapani Irioshi imeshiantigueti. Iri-
 atimpajia inquemisantamajajiaque."

²⁹ Iroompaqueate icanquitigui Paavoro
 ariqueate yoajianaji joriojia, itampishijenca-
 jianaque inquenquetsatavacaajianaca.

³⁰ Iriraqueate Paavoro ichoocaguitini mavite
 ajagantsi. Ogantaga ivegaraqueri ashintacaroca
 tsovironaqui cameetsanijite irimaantimentaque-
 mparonijite. Yaajiavaqueri maasano coraquejiat-
 sica.

³¹ Itsavetantiri Aapani Irioshi quero icota
 imajirontagueti. Itsatacaaajiaqueriqueate
 itsavetanqueri Amajirote Jesoquirishito.
 Teequeate intsarogueji, aisa tecatsiqueate
 ticaguerineca.

**Iroaquerari Itioncacaantaqueca Aapani
Irioshi: Tsavetacoquerica Amajirote
Jesoquirishito**

New Testament in Caquinte (PE:cot:Caquinte)

copyright © 2008 Wycliffe Bible Translators, Inc.

Language: (Caquinte)

Translation by: Wycliffe Bible Translators, Inc.

Caquinte[cot], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Caquinte

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

clxxix

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-12-21

PDF generated using Haiola and XeLaTeX on 18 Apr 2025 from source files
dated 29 Jan 2022

a31aed44-e5b1-5420-8e3c-ccef224c4988